

ANG MGA DINIHOGAN SA KATAPUSAN NGA PANAHOON



Maayong buntag, mga tumatambong. Makigsulti ta karon ngadto sa atong Ginoo. Dakung Dios, Magbubuhay sa mga langit ug yuta, Kinsang dunay Langitnong pagpahiluna kanamo karong panahon niining buntaga, sa pagsimba diha Kanimo. Ug hinaut nga kami, Ginoo, sa among mga kasingkasing nagatugyan sa among mga kaugalingon nga bug-os gayud diha sa Imong Diosno'ng kabubut-on ug sa pagpamuhay sa Espiritu Santo dinhi kanamo, aron ipahayag kanang Imong buot nga among mahibalo-an. Ang among tinguha mao nga mamahimong mas maayong mga Cristohanon ug mas maayong mga tinugyanan alang Kanimo. Tugoti kini kanamo niining buntaga, samtang kami nagahulat Kanimo, sa Ngalan ni Jesus Cristo. Amen.

Makapanglingkod na. [Adunay usa nga nagaingon, “Kuhaon na ba ang mga panapto'ng alampan?”—Ed.] Oo.

² Malipayon kami kaayo nga ania na usab dinhi niining buntaga, diha—diha sa bulohaton sa gamhanang Hari. Ug among gikasubo, amo, na usab, nga wala na kami lugar alang sa katawhan, apan aduna ray among. . . Among paningkamotan ug buhaton ang pinakamaayo nga among mahimo, ubos niining kahimtang.

³ Karon, adunay daghan nga may mga panyo ug mga hangyo nga nagapundok dinhi aron nga maampoan. Ug ginapadaplin ko lang una sila; dili nga wala ko sila tagda, apan ako silang ginaampoan human nga ako sa una. . . sama, ug niining gabhiona. Ako buhaton niining buntaga, ug unya karong gabii usab, sa dihang. . . Dayon ako magampo ug maghulat diha sa Espiritu sa Dios alang sa pagpang-ayo, ug kana mao ang higayon diin nga gusto kong mag-ampo diha sa—sa mga panyo ug sa mga butang.

⁴ Ug diha sa mga pinasahi nga hangyo, kini sila gihatag ni Billy, ang matag usa, kanako. Adunay mga tulo ka gatus, ug bag-ohay pa ako migawas sa lawak niadto. Nakita ninyo, naatimanan ko gayud sila ingon sa kadali, ug ang kada usa, nga akong maatiman. Ug akong atimanan sila sa labing higayon nga akong mahimo. Dili ko mahimong matagad silang tanan. Mokab-ot lang, dapat mokuha'g usa, ug ingnon, “Ginoo, *kini* ba kaha ang usa, ug *kaning* usa?” Ingon lang niana, tungod kay sila, ang matag-usa, nanginahanglan, tinuod nga mga hangyo; usa ka butang, nga sa walay pagduhaduha, atong kinahanglan pagahisgotan nga magkauban. Ug ako. . . Gawas kon, nahibalo

na mo, usahay ang Espiritu Santo mahimong moingon sa maong usa nga akong gibasa, nga nagapabilin sa akong kasingkasing; akong balikan kana pag-usab, ug pangitaon didto hangtud nga akong hikaplagnan kini. Kondili, kuhaon na lang sila nga panalagma.

⁵ Karon, buot pud natong ingnon, niining buntaga, ug mangumosta niadtong mga sa gawas nga ubang bahin niining nasud. Gusto natong pangumostahon ang mga katawhan niining buntaga pinaagi niining pagkonekta sa telepono, ngadto sa Ciudad sa New York; Beaumont, Texas; Prescott, Arizona; Tucson, Arizona; San Jose, California; Connecticut; Gainesville, Georgia; ug New Albany, Indiana; latas sa nasud. Nagapangomusta kami kaninyo sa Ngalan ni Ginoong Jesus.

⁶ Niining kabuntagon, dinhi sa Indiana, usa ka maanindot nga buntag. Aduna kami pag-ulan kagabii nga maoy nakapabugnaw sa panahon. Ug kami... Ang tabernaculo napuno, ug ang matag usa nagapaabot, dinuyogan sa dakung mga kahinam, alang sa pagtulon-an sa Sunday school. Ug masaligon ako nga ang pinakabahandianong mga panalangin sa Dios maanaa kaninyo dinha.

⁷ Ug kami nagalaum, nga sa daling panahon, makahimo ug usa—usa ka paagi nga magkaanaa kita, diin mahimo natong madala kitang tanan sa panaghiusa, tingali ilalum sa usa ka dakung tolda, diin akong ginabati ang tinud-anay nga pagkaminandoan sa pagwali sa Pito ka katapusang mga Panaksan diha sa Biblia.

⁸ Busa karon, aron nga dili kita malangan kaayo diha sa usa ka pagtulon-an niining buntaga... Akong gipangita ang Ginoo, namalandong, “Unsay akong iga-ingon?” nga namalandong nga tingali’g kini na ang maong katapusan nga bulohaton nga atong mabuhat. Ang Pag-abot sa Ginoo nagakahiduol na kaayo!

⁹ Akong makita, nga human niadtong panagna nga gihimo sa California, adunay mga balay didto, ug mga dapit, nga nangaunlod ug nikabat sa katloan ka pulgada matag oras, mga kakahoyan nangaliki ug nangabuak. Ug wala sila nahibalo kung unsa ang nagapahimo niini. Ania na kita sa katapusan. Gatasan ka libo ka mga dolyar nga bili sa mga balay, nangaunlod. Adunay akong dakung ulohan diha sa mantalaan, mga retrato, nga akong ginalaum nga madala karong gabii, maingon nga buot kong maghisgot sa butang mahitungod niana karong gabii.

¹⁰ Ug, dayon, karong gabii adunay atong pagpangampo sa masakiton. Pag-anhi karong hapon, alas singko, alas seis ang takna, o bisan unsang oras niini. Magasugod ta ug sayo, tingali, aron ang katawhan makapanggawas ug sayo, ug madawat ang inyong mga kard alang sa pagpangampo. Ug magapangampo kami sa masakiton karong gabii, kon itugot sa Ginoo.

¹¹ Karon, human sa mainampoong pagpamalandong, “Unsay angay kong pagabuhaton?” nga nasayod sa umalabot panahon nga ako manubag gayud kung unsa may akong ginaingon dinhi. . . Ug nakahukom na ako, o nabati ang paggiya sa Espiritu Santo sa pagpakigsulti niining buntaga mahitungod sa profesiya, ingon aron sa pagpahibalo kanato. Kita n’yo? Kini maoy usa ka butang nga kita. . . Kung dili kita mapahibalo, ug dunay nagakahitabo nga wala lang damha, kinahanglan nga mahibalo kita mahitungod niini. Ang Espiritu Santo naghatag niini kanato, aron sa pagpasidaan sa katawhan sa mga umalabot. Nasayod kamo, ang Biblia nag-ingon, nga, “Ang Dios dili mobuhat ug bisan unsa gawas Iya unang ipadayag sa Iyang mga alagad, ang mga propeta.” Ug—ug kon giunsa ni Jesus ang pagpasidaan sa katawhan, sa kung unsay magakahitabo; kon giunsa sa mga profeta ang pagpasidaan sa katawhan, nga kana mahitabo gayud. Ug gikinahanglan kini kanato karon, sa maong bantugang takna nga ania kita karon, aron makita kung unsa nang panahona ang atong ginapuy-an, ug kung unsay nagakahitabo, kung unsay mahitabo sa niining panahona. Busa ang usa sa niining talagsaong hilisgotan nga tingalig ato nang nabasa sa makadaghang higayon, kini mituhop sa akong kasingkasing aron—aron magsulti sa katawhan mahitungod niini karong buntaga.

¹² Karon atong ablihan ang atong mga Biblia ngadto sa Mateo ang ika-24 nga capitulo ug basahon ang usa ka bahin sa Pulong. [Si Igsoong Branham nagaigham—Ed.] Pasayloa ako. Ingon nga sa usa ka paagi sa—sa pagkuha ug kinatibuk-ang kahulugan sa atong teksto ug hilisgotan.

¹³ Karon, hinumdumi nga atong igatudlo kini ingon nga sa usa ka tulonghaan sa Biblia, nga inanay. Kuhaa ang inyong mga lapis ug papel. Adunay akong daghan nga mga Kasulatan nga gipangsulat dinhi, nga—nga inyo tingali mahimong isulat ang mga kini diha. Dayon sa pag-uli ug tun-an kini sila, tungod kay kini sama lang sa Sunday school nga pagtuon, aron nga kita mahibalo, ug mapasidan-an ug mangandam alang sa mga takna nga karon ania kita.

¹⁴ Diha sa Basahon ni San Mateo. [Si Igsoong Branham nagaigham—Ed.] Pasaylo-a ako. Ika-24 nga bersiculo. . . O, ika-24 nga capitulo, diay, sugod sa ika-15 nga bersiculo, gusto kong basahon ang usa ka bahin sa Iyang Pulong.

Ug tungod niini inigkakita ninyo, sa gihisgotan sa profeta nga si Daniel, sa iyang gihisgotang malaglagon nga pasipala nga nagatindog sulod sa dapit nga balaan, (ang nagabasa, pasabta:)

Nan sila nga anha sa Judea pakalagiwa ngadto sa kabukiran:

Ug siya nga anha sa atop—sa atop ayaw na pakanauga aron sa pagkuha pag bisan unsa sulod sa iyang balay:

Ug siya nga anha sa uma ayaw na pabalika aron sa pagkuha pa sa iyang kupo.

Ug alaut gayud ang mga mabdos, ug ang may masoso niadtong mga adlawa!

Apan pag-ampo kamo nga unta ang inyong pagpangalagiw dili mahiatol sa tingtugnaw, o sa adlaw nga igpapahulay:

Kay unya moabot ang dakung kasakitan, nga ang ingon wala pa mahitabo sukad sa sinugdan sa kalibutan hangtud karon, ug dili na gayud, mahitabo pa.

Ug kon ang gidaghanon niadtong mga adlawa wala pa pagkubsi, wala untay tawong maluwas: apan tungod sa iyang mga pinili ang gidaghanon niadtong mga adlawa pagaubsan.

Ug unya kon adunay magaingon kaninyo, Tan-awa, ania ra ang Cristo, o atua ra siya; ayaw gayud kamo pagtoo niini.

Kay magatungha ang mga mini nga Cristo, ug mga mini nga profeta, ug magapakitag dagkung mga ilhanan ug mga katingalahan; aron sa pagpahisalaag, kon mahimo, bisan pa sa mga pinili.

Tan-awa, gisuginlan ko na kamong daan.

Busa kon sila magaingon kaninyo, Tan-awa, atua siya sa awaaw; ayaw gayud kamo pag-adto didto: tan-awa, anaa siya sa sulod nga lawak; ayaw gayud kamo pagtoo niini.

Kay maingon nga ang kilat magakilab gikan sa sidlakan, ug makita hangtud sa kasadpan; maingon man usab unya niini ang pag-abot sa Anak sa tawo.

Diin gani ang gipatay'ng lawas, atua usab didto magakatapok ang mga agila . . .

¹⁵ Karon, alang sa usa ka hilisgotan, gusto kong pagahisgotan ang ika-24 nga bersiculo, aron pagpalutaw sa niining bersiculo alang sa atong Sunday School nga pagtuon niining buntaga. Ug paminaw pag-ayo samtang akong utrong basahon kini, pag-usab.

Kay magatungha ang mga mini nga Cristo, ug mga mini nga profeta, ug magapakitag dagkung mga ilhanan ug mga katingalahan; aron sa pagpahisalaag, kon mahimo, bisan pa sa mga pinili.

¹⁶ Karon alang sa usa ka hilisgotan niining buntaga, o usa ka teksto, diay, akong hisgotan: *Ang Mga Dinihogan Sa Katapusan Nga Panahon*. Mao kana ang hilisgotan nga akong

buot ipakigsulti, o ang teksto: *Ang Mga Dinihogan Sa Katapusan Nga Panahon.*

¹⁷ Ako nagatoo nga ania na kita nagpuyo niining katapusan nga panahon. Ako nagtoo nga halos si bisan kinsa... Sa magbabasa sa Kasulatan, o bisan pa sa usa—usa ka magtotoo, nasayod nga kita ania na sa katapusan sa kasaysayan sa kalibutan. Wala nay kapuslanan ang pagsulat pa niini, tungod kay wala nay bisan usa nga makabasa pa niini. Anaa na kini diha sa katapusan nga panahon. Kung kanus-a, wala ako mahibalo. Unsa man ang kadugayon pa niini, ni gani ang mga Manulonda sa Langit wala mahibalo nianang gutlo-a o taknaa. Apan gisuginlan na kita ni Ginoong Jesus, nga, kon kining mga butanga nga atong makita karon nagasugod na sa pagpanghitabo, nan mao na ang paghangad sa atong mga ulo tungod kay ang atong katubsanang nagakahiduol na. Karon, unsa man ang ipasabot sa “nagakahiduol na,” wala ako mahibalo. Mahimong nagapasabot...

¹⁸ Sama sa giingon sa mga siyentipiko sa miaging adlaw, diha sa telebisyon, nga nagapanghisgot sa dakung linibo-ka-milyas nga pagkabuak sa yuta nga magakaunlod. Siya gipangutana, “Maunlod ba kini didto?” Kana mao ang Los Angeles, ang West Coast. Ug daghan kaninyo ang nakakita kung giunsa nga ilang gisundan kini pinaagi’g radar, ug mipaingon ngadto sa... nabuak ilalum sa San Jose, milatas ngadto sa Alaska, pagawas tadlas ngadto sa Aleutian Islands, mga hapit ug duha ka gatus ka milyas ang gilay-on paadto sa dagat, ug pabalik ngadto sa San Diego, milibot luyo sa Los Angeles, ug miabot didto, usa ka dakung lungag.

Ug kini nga mga linog nga atong nasinatian sukad pa mao ang mga nagagawas sa bulkan nga nanag-igo niining dakung gahong, sama, didto. Dili ko mahinganlan ang tawag nga ilang—ilang pagtawag niini. Apan bisan pa niana, sa panahong kana nagauyog, nga maong nagahatag niining mga linog nga nangasinatian nato sa mga katuigan sa West Coast. Karon buak na ang tanang palibot niini. Ug ang mga siyentipiko miingon, usa...

¹⁹ Ang tawo miingon ngadto sa usa, “Mahimo kanang mahugmo?”

Siya miingon, “Dili kay ‘mahimo,’ kondili mahitabo gayud.”

Matud pa, “Apan dili sa atong kaliwatan, tingali?”

Miingon, “Sulod sa lima ka gutlo, o sa sunod nga lima ka tuig. Wala ta mahibalo kung kanus-a gayud.”

²⁰ Niining semanaha, adunay gipadala kanako nga usa ka ulohan sa balita, mahitungod sa dagkung gatusan-ka-libo-ka-dolyares nga mga pinuy-anan nangakahugno ug nangasiak, ang mga tawo nagapangbalhin. Ug wala sila mahibalo kung unsaon pagpahunong niini. Walay laing paagi sa pagpahunong niini.

Kita n'yo, ang Dios makahimo sa bisan unsay Iyang gusto, ug walay bisan kinsa nga mahimo sa pag-ingon Kaniya kung unsaon sa pagbuhat niini.

²¹ Nanagpangbuhat kamo ug mga puloy-anan, makahimo kamo ug mga siyentipikong mga butang, ug ang Dios mao ang Mamumugna sa siyensiya. Unsaon mo man pagpahunong Kaniya? Mahimo Niyang gubaon ang kalibutan niining buntaga pinaagi sa mga pulgas kung maoy Iyang gusto. Naamgohan ba ninyo, mahimo Niya pagsulti nga motungha ang pulgas, ug mahimo silang mga kap-atan na ka milyas ang kalawmon sa sulod sa tunga sa oras, kita n'yo, walay...ug panganon ang mga tawo nga mangahanaw sa yuta. Siya Dios. Siya nagabuhat lang sa kon unsa man ang gustohon Niya. Siya maoy pinakamakagagahum, sa Iyang Kaugalingon.

²² Karon, nga nakita kining tanang natigum nga kalig-onan, nga sa maong takna nga atong ginapuy-an karon, akong gihunahuna nga usa ka maayong butang ang pagbatbat niining mga butanga ug kuhaon sila gikan niana, kay ang mga Timri naablihan na, ug hibaloon ang kamatuoran niining mga butanga, maingon nga ang Dios maminatud-on gayud kanato, pinaagi sa Iyang grasya, aron ipadayag kanato kining mga butanga.

²³ Gusto ko nga inyong matikdan dinhi sa Mateo 24, si Jesus migamit sa pulong nga “Mga Cristo,” C-h-r-i-s-t-s, “Mga Cristo.” Dili Cristo, kondili “Mga Cristo,” dinaghan, dili nga pang-usahan. “Mga Cristo.” Busa, ang pulong nga *Cristo* nagkahulogan nga “ang Usa nga dinihogan.” Ug unya kung kini “dinihogan,” dili nga aduna ray usa, kondili daghan, dinihogan, “ang mga dinihogan.” Nakita ninyo?

²⁴ Sa laing paagi, kung buot Niya nga bahin-bahinon kini aron nga sa bisag unsa mas masabtan nato kini, moingon Siya, “Sa katapusan nga mga adlaw adunay magapanungha nga mini, nga mga dinihogan.” Karon, kana morag imposible, kita n'yo, ang terminong “dinihogan.” Apan matikdi ang pinakasunod nga mga pulong, “ug mini nga mga profeta,” p-r-o-p-h-e-t-s, dinaghan.

²⁵ Karon, ang *usang dinihogan*, maoy, “ang usa nga may mensahe.” Ug ang paagi lamang nga ang mensahe mapadayag maoy pinaagi sa usa nga *dinihogan*, ug kana usa ka profeta, dinihogan. “Magapanungha ang mga mini, dinihogan nga mga magtutudlo.” Ang usa ka profeta nagatutudlo kung unsay iyang mensahe. Dinihogan nga mga magtutudlo, apan dinihogang mga tawo nga adunay mini nga pagtulon-an. Mga dinihogan, “Mga Cristo,” dinaghan; “mga profeta,” dinaghan. Ug kung aduna may nianang butanga ingon nga usa—usa ka Cristo, usa ra, nan kini sila kinahanglan ang maong “mga dinihogan,” nga ang ilang mga panagna kung unsay ilang gipanudlo maoy lahi, tungod kay sila mga dinihogan, dinihogan.

26 Karon, kini maoy usa ka pagtulon-an sa Sunday school, gusto nato nga—nga sulayan pagdala niini ngadto sa usa ka tinuod nga pakigsangka, pinaagi sa mga Kasulatan, dili nga pinaagi sa kon unsa may giingon sa usa ka tawo mahitungod niini, kondili sa pagbasa lamang sa mga Kasulatan.

Tingalig moingon ka, “Unsaon man pagkahimo niini? Mahimo ba nga ang mga dinihogan. . .”

27 Unsa man kaniadto sila? “Mga Cristo,” C-h-r-i-s-t-s, dinihogan. “Mga Cristo, ug mini nga mga profeta.” Mga dinihogan, apan mini nga mga profeta!

Si Jesus nag-ingon, nga, “Ang ulan nagakatagak diha sa matarung ug sa dili matarung.”

28 Karon, tingalig adunay usa nga moingon kanako, “Nagatoo ka ba nga kanang pagdihog sa maong mga tawo nagkahulogan nga kini pagdihog sa Espiritu Santo?” Oo, sir, ang matuod nga Espiritu Santo sa Dios diha sa usa ka tawo, ug bisan pa niana mga mini sila.

Karon paminaw pag-ayo ug tan-awa kung unsay Iyang giingon. “Ug sila magapakitag mga ilhanan ug mga katingalahan, nga kung mahimo magpahisalaag sa Pinili kung mahimo pa.” Ug sila mga dinihogan sa matuod nga Espiritu Santo. Nahibalo ako nga kini binuang kaayo paminawon, apan mogamit kitag panahon ug isaysay kini pinaagi sa Pulong, nga kana sa walay pagduhaduha maoy MAO KINI ANG GINAINGON SA GINOO, ang Kamatuoran.

29 Karon atong ablihan ang atong mga Biblia, sa makadiyot lang, ngadto sa Mateo sa ika-5 nga capitulo, ug sugod sa—sa ika-45 nga bersiculo, ug tan-awa karon samtang atong basahon sa hamubo lamang nga higayon diha niining mga Kasulatan. Ug dayon, tapus nga makaabot ta diha, aba, atong ihatag kaninyo. . . Aron kamo, kung mapakyas ta pagbasa nilang tanan, sa ingon inyong kuhaon ang inyong Biblia; ug—ug usab mahimo ninyong basahon human nga makapanggawas na kita gikan dinhi ug mamauli na kamo, ug—ug inyong basahon kung unsay ginaingon sa Biblia mahitungod niini.

30 Karon aron sa paggamit sa atong panahon, aron sa pagkuha ug usa—usa ka lintunganay nga kamatuoran, tungod kay ako nagahimog usa ka pamahayag nga makapatingala. Unsaon nga madihogan man sa Espiritu Santo ang usa ka mini nga magtutudlo? Apan mao kana kon unsa ang giingon ni Jesus nga mahitabo.

Karon, sa Mateo, ang ika-5 nga capitulo, ang ika-45 nga bersiculo, atong basahon karon. Atong kuhaon, sugod sa usa—usa nga medyo nahauna niini, ang ika-44.

Apan magaingon ako kaninyo, Higugmaa ang inyong mga kaaway, pag-ampo kamo alang sa mga magalutos

kaninyo, buhati ug maayo sila nga nagadumot kaninyo, . . . pag-ampo kamo kanila nga nagatamay kaninyo, ug nagalutos kaninyo;

Aron mahimo kamong mga anak sa inyong Amahan nga anaa sa langit: kay siya nagapasubang sa iyang adlaw sa ibabaw sa mga dautan ug . . . ug sa mga maayo, ug nagpadalag ulan ngadto sa mga matarung ug . . . mga dili matarung. (Ang ulan nagaabot ibabaw sa mga dautan mao ra usab sa matarung.)

³¹ Karon aron pasundan kini, ngadto sa usa pa ka profesiya mahitungod niini, mahimo nga ablihan ta karon diha sa Mga Hebreohanon ang ika-6 nga capitulo, alang sa usa pa ka pangsunod nga bersiculo diha niini, diin ginapabalik ni Pablo sa hunahuna ang samang butang nga giingon ni Jesus. Si Pablo, nga nagasulti karon. Samtang inyong ginapangita kini . . . Ug kamo nga anaa sa diha sa sibyaanan, kuhaa ang inyong Biblia duol kaninyo ug usa ka papel, ug pangitaa kini karon. Mga Hebreohanon, ang ika-6 nga capitulo, si Pablo nga nagasulat ngadto sa Mga Hebreohanon, ginapakita kanila ang mga anino ug ang mga tipo, ginadala sila gikan sa ilalum sa Judayismo ngadto sa Cristianismo, ginapakita kanila nga kung unsa ang tanan nga karaang mga butang nag-anino lamang sa mga butang nga umalabot. Si Pablo nga nagasulti karon, Mga Hebreohanon 6.

Busa biyaan ta na ang nahaunang mga tuloohan mahitungod kang Cristo (C-r-i-s-t-o, usa ra), manag-uswag kita ngadto sa pagkahamtong; sa dili na pagpahimutang pag-usab sa sukaranan sa paghinulsol. . . patay nga mga binuhatan, ug sa pagtoo ngadto sa Dios.

Sa . . . pagtulon-an mahitungod sa mga bautismo, ug sa pagpamandong sa mga kamut, ug sa pagkabanhaw sa mga patay, ug sa hukom sa silot nga dayon.

Hinoon buhaton ta kini, kung itugot man sa Dios.

Kay bahin niadtong mga tawo nga sa makausa nalamdagan na unta, nga nakatilaw na sa langitnong gasa, ug mga nakaambit na sa Espiritu Santo,

Awhagon ko ang inyong pagtagad sa makadiyut lang. Nahimatikdan ba ninyo, kana maoy “gasa”; ug dili “mga gasa,” mga nakaambit na sa “langitnong mga gasa”? Kondili, “ang langitnon nga gasa,” usa ra; “Cristo,” usa ra; “gasa,” usa ra.

. . . langitnon nga gasa, ug . . . mga nakaambit na sa Espiritu Santo,

Ug nakatilaw na sa . . . pulong sa Dios, . . . (nakatilaw na sa unsa?) . . . sa pulong sa Dios, ug sa gahum sa kapanahonan nga umalabot,

Ug unya managpanibog sila, dili na gayud mahimo ang pagpabalik pa sa ilang kaugalingon sa paghinulsol; sanglit gituyoan man nila ang pagpalansang pag-usab sa Anak sa Dios, ug sa pagpakaular kaniya sa dayag.

Kay, (paminaw) ang yuta . . . nakasuyop na sa ulan nga sa masubsub nangatagak niini, ug maga-patubo sa mga tanum nga kapuslan sa mga tawo alang kang kinsa giugmad kini, ang maong yuta nagakadawat ug mga panalangin gikan sa Dios:

Apan kini kon mamunga man ug mga sampinit . . . mga kudyapa kini walay bili, ug hapit na matinunglo; ang katapusan niini mao ang pagkasunog.

³² Karon itandi kana sa Mateo 5:24 pag-usab. Timan-i, si Jesus nag-ingon nga ang ulan ug ang adlaw nagaabot sa ibabaw sa yuta, nga ang Dios nagapadala kini aron pag-andam sa pagkaon ug sa mga butang alang sa mga katawhan sa yuta. Ug ang ulan gipadala alang sa pagkaon, sa mga pananum. Apan ang mga bunglayon, mga sagbot, nga anaa sa uma, nagadawat sa managsamang butang. Ang mao rang ulan nga nagapatubo sa trigo mao sa gihapon nga ulan ang nagapatubo sa mga sagbot.

³³ Kon daw sa unsa ko pagkabaton ug ingon-anang katunanan sa usa ka higayon, sa dihang una kong nahimamat ang mga katawhang Pentecostal! Ug kato nahimong dakung tunanan alang kanako. Akong nakita ang duha ka tawo, ang usa . . . Wala pa gayud ko sukad makadungog ug mga pagpanulti'g mga dila. Ang usa nagsulti sa mga dila, ang laing usa nagahubad niini, nagbalibali. Ug magsugilon sa kamatuoran, moingon nga, "Adunay daghan dinhi nga kinahanglan maghinulsol niining gabhiona. Adunay mga kababayan-an ug kalalaken-an, pareho." Ug ang mga tawo manindog ug moadto sa altar.

Akong nahunahuna, "Unsa kamahimayaon!"

³⁴ Ug dayon uban sa gamay'ng gasa sa Espiritu Santo, nagpakigsulti ako niadtong mga tawhana, igo lamang, nasayod na kamo kung unsaon, diha sa pag-ila, sa usa lamang ka gamay'ng pamaagi aron hibaloan. Ug ang usa kanila matuod nga Cristohanon, ug siya usa ka matuod nga alagad ni Cristo, ug ang laing usa usa ka tigpakaaron-ingnon. Ug ang usa kanila, ang usa nga mao ang tigpakaaron-ingnon, nanginabuhi na uban sa usa ka babayeng itum ug buhok, nagpuyo-puyo uban sa usa ka bulagaw ang buhok ug diin aduna siyay mga anak. Bueno, atua kini mismo sa panan-awon; dili mahimong ilimod. Ug gisultihan ko siya mahitungod niini. Mitan-aw siya kanako ug milakaw palibot sa tigumanan.

³⁵ Karon ako naglibog, gayud kaayo. Gidahum kong nakaadto ako sa mga manulonda, unya ako nagduha-duha na kung dili ba ako anaa sa taliwala sa mga yawa. Giunsa man pagkahitabo

niini? Wala ko kini hisabti. Ug sa mga katuigan wala ko tagda kini, hangtud nga usa ka adlaw niana diin . . .

Si George Smith, ang lalake nga nagapangolitawo sa akong dalaga, miadto kami kagahapon, didto sa ibabaw sa karaang dapit diin ako nagaadto aron sa pag-ampo.

Ug human sa pipila ka adlaw didto, gibalik sa Espiritu Santo kanako kining Kasulatan. “Maingon nga ang ulan sa masubsub gayud nagaabot sa ibabaw sa yuta aron sa pag-ugmad niini uban sa mga tanum, apan ang mga sampinit ug mga kudyapa nangabuhi pinaagi nianang mao ra nga ulan, ug ang katapusan niini pagasunugon.” Nagkinabuhi pinaagi sa mao rang tinubdan sa kinabuhi gikan sa Dios. Dayon ako kadtong nasabtan. “Pinaagi . . .” Si Jesus nag-ingon, “Pinaagi sa ilang mga bunga mahibaloan sila.”

³⁶ Karon, tungod niini, ang ulan nga nangatagak diha sa ibabaw sa natural nga mga katanuman sa yuta, maoy usa ka tipo sa Espirituhanon nga ulan nga nagahatag sa Kinabuhing Walay Katapusan, nga nagapangatagak sa Iglesia, sanglit kay ginatawag ta kini nga nahaunang ulan ug ang naulahing ulan. Ug kini ang ulan, nga nagabunok gikan sa Espiritu sa Dios, nganha sa Iyang Iglesia.

³⁷ Matikdi, usa ka katingad-ang butang kini dinhi. Nakita ninyo? Sa dihang silang mga binhi niadto sa yuta, kon giunsa man nga nahiadto sila didto, sila mga kasampinitan na sa sinugdan pa. Apan didto ang trigo nga nahiadto sa yuta, ug ang mga tanum nga kapuslan, mga tanum na nga kapuslan sa sinugdan pa. Ug ang matag tanum nga kapuslan nagapadaghan sa ilang kaugalingon, pag-usab, nagpakita nga kini tua na daan sa orihinal nga sinugdanan.

³⁸ “Ug ilang ipahisalaag ang mga Pinili kung mahimo pa,” tungod kay sila nagadawat man sa mao ra nga ulan, mao ra nga panalangin, nagapakita sa mao ra nga mga ilhanan, mao ra nga mga katingalahan. Kita n’yo? “Ilang ipahisalaag, o mapahisalaag ang Pinili kung mahimo pa.” Karon, ang usa ka tunok dili mapugngan nga mahimong tunok, ug ingon man ang trigo nga dili usab mapugngan ang pagka-trigo; mao kini kon unsa ang gibuot sa Magbubuhay sa matag usa sa sinugdanan pa. Mao kana ang Pinili. Ang mao ra nga ulan!

³⁹ Ang adlaw nagasubang sa kabuntagon ug nagalukop sa tibuok yuta, maingon sa ginahimo na kini sa yuta ug sa adlaw nga atong ginapuy-an. Ug ang adlaw, mao ra nga adlaw nga nagasubang sa Sidlakan ang mao ra sa gihapon nga adlaw nga nagasalop sa Kasadpan. Ug kanang maong adlaw gipadala aron pagpahinog sa mga lugas sa ibabaw sa yuta, diin ang atong mga lawas nahimo gikan niana.

⁴⁰ Kita nagakabuhi pinaagi sa patay nga mga butang. Mao lamang kana ang paagi nga kamo mabuhi. Ug kung adunay

butang nga kinahanglan mamatay kada adlaw aron nga kamo mabuhi, sa natural, nan dili ba kini tinuod nga kung ang inyong. . . Ang inyong lawas kinahanglan nga mabuhi pinaagi sa patay nga mga butang, alang sa natural nga kinabuhi, nan inyong kinahanglan gayud nga adunay Usa ka Butang nga mamatay, sa espirituhanon, aron pagluwas sa inyong kinabuhing espirituhanon. Ug ang Dios, nahimong lawasnon, unod, ug namatay aron nga kita mabuhi. Walay iglesia, walay bisan unsang butang sa kalibutan nga makaluwas kaninyo kondili ang Dios. Mao lamang kana ang bugtong butang nga ilang ginakabuhian.

⁴¹ Karon padayona ang mga Kasulatan. Si Jesus mao ang Pulong. “Sa sinugdanan mao na ang Pulong. Ug ang Pulong nahimong unod ug miipon uban kanato. Sa sinugdanan mao na ang Pulong, ug ang Pulong uban sa Dios. Ug ang Pulong nahimong unod, ug Kinsa nagkinabuhi, ug mipuyo ipon kanato.” “Ug ang tawo dili mabuhi sa tinapay lamang,” alang sa lawasnon, “kondili sa matag Pulong nga nagagula gikan sa baba sa Dios.” Dayon, nakita n’yo, kita nagakabuhi pinaagi sa Pulong, ug kana mao ang Dios.

⁴² Karon ang adlaw nagasidlak ug nagapahinog sa lugas. Karon, dili kini makapahinog niini dayon. Samtang kini nagatubo, nagakagulang, kini sa walay-hunong nagakahinog hangtud kini nagakahimo ngadto sa bus-ok nga uhay.

Mao pud kini, karon, sa Iglesia. Nagsugod kini diha sa iyang pagkabata, kaniadtong mangitngit nga panahon, diin kini atua pa sa ilalum sa yuta. Mitubo na kini karon ngadto sa pagkahamtong. Ug ato kining makita, sa hingpit, kung giunsa sa Dios pinaagi sa kinaiyahan kanunay’ng. . .

⁴³ Dili mo mahimong samukon ang kinaiyahan. Mao kana kon unsa ang mga nagakahitabo karon. Nagapalupad ta ug mga bomba, ug didto nianang kadagatan, ginaguba kini ug ginapabuthan kini sa palibot ug mga bomba atomika. Ginabungkag lang ninyo samut kanang yuta sa kanunay, nga ginahulogan kini. Inyong ginapamutol ang mga kakahoyan; pagaabtan mog bagyo. Ginadikihan ang suba; kini magaawas.

Inyong kinahanglan mahikaplagan ang pamaagi sa Dios sa pagbuhat ug mga butang ug pagpabilin niini. Ato nang nadenominasyon ang mga tawo sa kaiglesiahanan ug mga organisasyon; tan-awa kung unsay atong nangakuha! Pagpabilin diha sa gikataganang pamaagi sa Dios alang niini.

⁴⁴ Apan, nakita ninyo, “Siya nagapadala sa ulan,” pabalik sa atong ginahisgotan, “diha sa matarung ug sa dili matarung.” Si Jesus nagasulti kaninyo karon dinhi, diha sa Mateo 24, kini mamahimong usa ka ilhanan sa katapusan nga panahon.

Karon, kung kining ilhanan mahibaloan lamang sa katapusan nga panahon, nan kini mamahimong paghuman na

sa pag-abli niadtong mga Timri. Kita n'yo? Usa kini ka ilhanan sa katapusan. Mamahimo kana, sa dihang kining mga butanga nagakahitabo na, kini mahitabo sa katapusan nga panahon. Ug kini mahimong usa ka ilhanan, karon, aron sa ingon ang mga Pinili dili mangalibog sa niining mga butanga. Nakita ba ninyo kini? Unya, kini maipadayag gayud, mabutyag.

⁴⁵ Hibaw-i, pareho ang trigo ug ang mga sagbot nangabuhi sa mao ra nga Dihog gikan sa Langit. Ang matag usa nila nangalipay Niini.

Akong nahinumduman kini, may kalabutan ngadto niining panghitabo didto ibabaw sa Green's Mill niadtong adlaw. Ako—akong nakita katong panan-awon nga miabot. Ug dihay usa ka dakung yuta, ug kini nadaro na tanan. Ug dihay mitungha nga usa ka Magpupugas, una. Gusto ko magpabilin kana diha sa inyong atubangan. Bantayi kung unsay unang nagatungha, dayon kung unsay nagasunod niini. Ug maingon nga kining Tawhana nga nagasul-ob ug puti nga milibot sa tibuok kalibutan, nagapamugas ug binhi, unya sa Iyang luyo nagasunod ang usa ka tawo, nagasul-ob ug bisting itum, hilabihan kainukoy kung tan-awon, nagasubay sa likod Niya, nagapamugas ug mga sagbot. Ug samtang nga kini nagkahitabo na, dayon akong nakita ang duha ka mga tanum nga nagatubo. Ug sa ilang pagtubo, ang usa trigo ug ang laing usa mga sagbot.

Ug dihay miabot ang usa ka ting-init, nga kung, samang tan-awon, managsama ang ilang mga ulo nanagduko nga nanagpangamuyo alang sa ulan. Unya dihay nagaabot ang usa ka dakung panganud ibabaw sa yuta, ug miulan. Ug ang trigo mibarug ug miingon, "Dalaygon ang Ginoo! Dalaygon ang Ginoo!" Ug ang sagbot mibarug ug misiyagit, "Dalaygon ang Ginoo! Dalaygon ang Ginoo!" Parehas ug mga resulta. Pareho silang himalasyon na, pareho silang magakahanaw na. Ug unya ang trigo mitungha ug nagkauhaw. Ug kay kini diha man sa mao ra nga uma, mao ra nga tanaman, mao ra nga dapit, ilalum sa mao ra nga sandayong, diha nagatubo ang trigo ug diha nagatubo ang mga bunglayan pinaagi sa mao rang butang. Timan-i, ang mao rang nagadihog nga tubig nga nagapatubo sa trigo, nagapatubo sa sagbot.

⁴⁶ Ang mao ra nga Espiritu Santo nga nagadihog sa Iglesia, nga nagahatag kanila sa tinguha pagluwas sa mga kalag, nga nagahatag kanila'g gahum aron sa pagbuhat ug mga milagro, Kini nagaabot sa dili matarung maingon man usab sa matarung. Ang mao ra mismo nga Espiritu! Karon, dili ninyo kini mamahimo sa lain nga paagi ug sabton ang Mateo 24:24. Siya miingon, "Magapanungha ang mini nga mga Cristo," mini, nga mga dinihogan. Dinihogan diha sa matuod nga Butang, apan mamahimong mini nga mga profeta Niini, mini nga mga magtutudlo Niini.

Unsa man ang makapahimo sa usa ka tawo nga buot mahimong usa ka mini nga magtutudlo sa usa ka butang nga Kamatuoran? Karon mopadulong kita ngadto sa marka sa mapintas nga mananap sa mga pipila ka mga gutlo, ug inyong makita nga kini ang denominasyon. Kita n'yo? Mini nga mga magtutudlo; mini, nga dinihogan. Dinihogan nga mga Cristo, apan mini nga mga magtutudlo. Mao lamang kana ang paagi nga makita ninyo kini.

⁴⁷ Sama lang sa usa ka higayon kaniadto dinhi, ako nang nahisgotan kini. Ako tingali kining hisgotan tungod kay nakakonekta ta latas sa kanasuran. Usa niadto ka adlaw ako nagapakigsulti sa akong higala, diin kini madunggan niining buntaga, sa Arizona. Ug siya adunay usa—usa ka umahan sa citrus. Ug adunay iyang usa ka punoan didto nga usa ka punoan sa orange nga kaniadto nagapamunga'g mga kahil, ug lemon, ukban, ug mga tangelo. Ug nahikalimot na ko kung pila ka nagkalainlaing mga bunga nga didto niadtong usa ka punoan. Ug ako miingon ngadto sa—sa—maong tawo, matud ko, “Giunsa man kini? Unsa man nga matang sa pagkakahoy kana?”

Siya miingon, “Ang punoan, mismo, maoy usa ka punoan sa orange.”

Matud ko, “Unsay anaa niini nga nakapabunga ug mga kahil? Nganong anaa man mga lemon kini?”

Matud niya, “Gipangsumpay kini sila diha niini.”

Matud ko, “Nakita ko na. Bueno, karon,” matud ko, “karon, sa sunod tuig kung kanang maong punoan magapamunga na ug sunod pa nga mga bunga,” diin silang tanan mangahinog sa mao rang panahon, matud ko, “nan kini magapamunga na ug mga orange tanan. Kung kini usa ka punoan sa navel nga orange, ipamunga kini ang mga navel orange, dili ba, sir?”

Matud niya, “Dili, sir. Ang matagsinumpay nga sanga magapamunga sumala sa ilang matang.”

Matud ko, “Ang buot mong ipasabot nga kanang lemon nga sanga mobunga ug usa ka lemon gikan sa punoan nga orange?”

Matud niya, “Oo, sir.”

“Ang kahil ba mamunga ug usa ka kahil gikan nianang punoan nga orange?”

Matud niya, “Oo, sir. Mao kana ang kinaiya sa sanga nga gisumpay diha niini.”

Matud ko, “Dalaygon ang Dios!”

Matud niya, “Unsay imong buot ipasabot?”

Matud ko, “Usa pa ka pangutana. Karon, kanang punoan nga orange magapamunga pa ba gayud ug mga orange pag-usab?”

Matud niya, “Kung kini mosalingsing pa ug usa ka sanga.” kon kini mosalingsing pa ug bag-ong sanga, dili sa dihang kini gisumpayan ug usa. Apan, silang tanan mga bunga’ng citrus, ug sila nangabuhi sa kinabuhi sa citrus nga anaa nianang punoang citrus.

⁴⁸ Matud ko, “Tan-awa! Ang Methodist magapamunga ug mga Methodist, sa tanang panahon. Ang Baptist magapamunga ug mga Baptist, sa tanang panahon. Ang Katoliko magapamunga ug Katoliko, sa tanang panahon. Apan ang Iglesia sa buhi nga Dios magapamunga’g Cristo gikan sa gamut, ang Pulong sa tanang panahon, kung kini manalingsing man ug usa pa ka sanga sa Iyang Kaugalingon.”

⁴⁹ Karon, mahimo mo sa pagsumpay kini diha, nakita n’yo. Ang matag kahil, lemon, tangelo, ukban, bisan unsa man nga bunga sa citrus, ang matag usa kanila mahimong mabuhi diha nianang maong punoan; apan nagapamunga ug sayup nga pagpamatuod sa punoan, nangabuhi pinaagi sa maong punoan. Nakita ba ninyo kini? Sila nangabuhi ug nangalambo diha sa matuod nga kinabuhi nga anaa nianang maong punoan.

Karon, anaa diha sa Mateo 24:24, nangabuhi pinaagi sa mao gihapon nga Kinabuhi, apan sila dili ang husto, sa sinugdanan. Sila nanagpamunga ug mini nga pagpamatuod nianang maong Punoan! Usa kini ka punoan sa orange, apan sa gihapon kini usa ka punoan sa citrus. Ug sila nagaingon, “Kining iglesia, kining denominasyon nagapamatuod man kang Cristo,” ug anaay sayup nga pagbautismo, sayup nga pagpang saksi sa Pulong, nagapaninguha pag-ingon nga ang gahum sa Dios alang lamang niadtong mga tinun-an.

Si Jesus, Mismo, miingon, “Panglakaw kamo sa tibuok kalibutan ug iwali ang Maayong Balita ngadto sa matag sanga nga mahimo gayud. . . punoan nga manalingsing gayud, sanga gayud nga manalingsing sa punoan. Ug kining mga ilhanan maganunot sa matuod nga mga sanga.” Diin? Hangtud nga kini usa pa ka Punoan, hangtud nga Kini nagapananga pa, hangtud sa katapusan sa kalibutan. “Sa Akong Ngalan ilang pagahinginlan ang mga yawa; magasulti sa laing mga dila; makakupot ug mga bitin; makainom ug makahilo’g mga butang; makapandong sa ilang mga kamut sa mga masakiton ug mangaayo sila.” Nakita ba ninyo ang takna nga atong ginapuy-an? Nakita ba ninyo kung unsay giingon ni Jesus?

⁵⁰ Hinumdomi, kini sa katapusan na nga panahon, dili pabalik ilalum sa panahon ni Wesley ug pabalik kaniadto. Karon na, sa katapusan nga panahon, kini magakahitabo.

Karon bantayi ang mga Kasulatan; tugoti Sila sa pagpamatuod. Si Jesus nag-ingon, “Susiha ang mga Kasulatan, tungod kay naghunahuna man kamo nga diha Kanila, o nagatoo, nga makaangkon kamo ug Kinabuhing Dayon, ug Sila Maoy

nagapanghimatuod mahitungod Kanako.” Sa laing pagkasulti, kung kining punoan gayud magapananga . . . “Ako mao ang Punoan sa parras, ang Kahoy; kamo mao ang mga sanga. Siya nga nagatoo Kanako, ang mga buhat nga Akong ginabuhar pagabuhaton usab niya,” San Juan 14:12.

⁵¹ Karon, “Siya nga nagapabilin Kanako, siya nga . . . siya nga tua na daan sa Akong gamut sa sinugdan.”

Mao kana ang hinungdan nga si Jesus mao pareho ang Gamut ug Kaliwat ni David. Mao na Siya sa wala pa si David, diha kang David, ug human kang David, pareho nga Gamut ug Kaliwat ni David; ang Bituon sa Kabuntagon, ang Rosas sa Sharon, ang Lirio sa Kawalogan, Alfa ug Omega; Amahan, Anak, ug Espiritu Santo. “Diha Kaniya nagapuyo sa pagkalawas ang bug-os kinatibuk-an sa Pagka-Dios.” Parehong Gamut ug Kaliwat ni David!

“Siya nga pinili sa Kinabuhi, ang gitakda nang daan sa Kinabuhi, nga ania Kanako,” ug Siya mao ang Pulong, “sukad pa sa sinugdan; sa dihang siya nagasalingsing na, iyang ipanghimatuod ang Akong mga bunga.” San Juan 14:12.

Apan ang uban magkinabuhi pinaagi sa mao gihapong butang, nagatawag sa ilang mga kaugalingon nga mga Cristohanon ug mga magtotoo. “Dili ang tanan nga naga-ingon, ‘Ginoo, Ginoo,’ makasulod.”

Karon, kini mahitabo ug maipadayag sa katapusan nga mga adlaw, “sa dihang ang mga tinago sa Dios pagatumanon na,” maingon nga atong hisgotan ug diyutay unya.

⁵² Kining mga kahoya, ang tinuod nga punoan ug ang mini nga punoan! Nakadungog na mo kanako nga nagwali niana kaniadto pa, sa nanglabay na nga mga tuig, kung giunsa nila nga dungan pagtubo. Gidala sila ingon nga mga indibiduwal ug gipakita nga, gikan kang Cain ug kang Abel, ang duha ka mga punoan nga nagtagbo sa usa ka halaran; silang duha mga relihiyoso, silang duha nga dinihogan, silang duha nagatinguha ug kinabuhi, ug nagasimba sa mao ra nga Dios. Ug ang usa gisalikway ug ang usa gidawat.

Ug ang bugtong paagi nga ang usa nga gidawat mahimong may nabuhar ug unsa man nga nakalahi sa iyang igsoon, kadto gipadayag kaniya. Kay ang Biblia nag-ingon, “Pinaagi sa pagtoo . . .” Mga Hebreohanon, ika-11 nga kapitulo, “Pinaagi sa pagtoo si Abel naghalad ngadto sa Dios ug mas maayong halad kay sa iya ni Cain, nga gipamatud-an sa Dios nga siya matarung.”

Si Jesus, miingon, sa espirituhanon nga pinadayag mahitungod sa kung Kinsa Siya! “Sumala sa gikasulti sa tawo kinsa man kono ang Anak sa tawo?”

Siya miingon, si Pedro miingon, “Ikaw mao ang Cristo, ang Anak sa buhi nga Dios.”

“Bulahan ka gayud, Simon—Simon, nga anak ni Jonas; unod ug dugo wala gayud magpadayag niini kanimo. Ang Akong Amahan nga anaa sa Langit maoy nagpadayag niini. Sa ibabaw niining maong bato Akong pagatukoron ang Akong Iglesia,” (unsa?) ang matuod nga pagpadayag sa Pulong. Anaa na usab ang matuod nga Punoan. “Si Abel, pinaagi sa pagtoo!”

Miingon ka, “Dili kadto usa ka pinadayag.”

⁵³ Unsa man ang pagtoo? Ang pagtoo mao ang butang nga gipadayag kanimo; nga wala pa, apan ikaw nagatoo na nga kini mahitabo. Ang pagtoo maoy usa ka pinadayag sa kabubot-on sa Dios. Busa, pinaagi sa pinadayag!

⁵⁴ Ug ang mga kaiglesiahanan karon dili gani nagatoo sa espirituhanong pinadayag. Sila nagatoo sa usa ka pagtulon-an sa tawo sa kon unsang sistema. “Pinaagi sa pinadayag si Abel naghalad ngadto sa Dios ug mas maayong halad kay sa iya ni Cain, nga gipamatud-an sa Dios nga siya matarung.” Amen. Nanghinaut ako nga inyong nakita kana. Nakita ba ninyo kung asa kita nagakinabuhi? Nakita na ba ninyo ang maong takna?

Nagapakigsulti ako sa usa ka—usa ka lalake dili pa dugay kaniadto, usa ka Cristohanong may kinaadman ug maayong tawo. Matud niya, “G. Branham, ginasalikway namo ang tanang pinadayag.”

⁵⁵ Matud ko, “Nan imong ginasalikway gayud si Jesus Cristo, kay Siya mao ang pinadayag sa Dios, ang Dios nga nadayag sa tawhanong lawas.” Gawas sa kung makita mo kini, ikaw nahisalaag.

Si Jesus miingon, “Gawas kung nagatoo kamo nga Ako mao Siya, mangamatay gayud kamo diha sa inyong sala.” Siya mao ang pinadayag sa Dios, ang Espiritu sa Dios nga gipadayag diha sa tawhanong porma. Dili kamo makatoo niana, kamo mahisalaag. Inyo Siyang ginapahimutang nga ikatulung persona, ikaduhang persona, o unsa pang pagkapersona nga gawas sa Dios, kamo nahisalaag. “Gawas kung nagatoo kamo nga Ako mao Siya, mangamatay kamo diha sa inyong mga sala.” Ang pinadayag!

⁵⁶ Dili ikatingala nga dili nila Siya makita. “Walay si bisan kinsa ang makaduol Kanako gawas kon pagadanihon siya sa Akong Amahan. Ug ang tanan nga gihatag kanako sa Akong Amahan,” diha sa gamut, “moduol ngari Kanako.” Kita n’yo? Nakuha ba ninyo kini? Oh, daw sa unsa nato dapat higugmaon Siya, simbahon Siya, daygon Siya; nga makita ang bunga sa Espiritu sa katapusang mga adlaw, ug ang Punoang Pangasawonon nagakahinog na diha sa kinatumyan sa panahon!

⁵⁷ Ang matuod nga punoan ug ang mini nga punoan, parehong adunay managsama nga dihog. Ang tubig nagbisbis diha nilang duha. Dili ikatingala nga Iya kitang gipasidan-an, “Kini mopahisalaag sa Pinili kon mahimo pa.”

⁵⁸ Matikdi, pareho silang tan-awon. Pareho silang dinihogan. Apan hibaw-i, “Pinaagi sa ilang bunga . . .” Unsaon man ninyo pagkahibalo niini?

Unsaon man ninyo pagkahibalo nga dili kini usa ka orange? Tungod kay kini nagapamunga ug kahil. Kanang sanga maayo man, kini nagakinabuhi diha sa punoan, apan kini nagapamunga ug kahil. Dili kini sama sa nahaunang usa.

Ug kon ang usa ka iglesia nagaingon nga sila “nagatoo kang Jesus Cristo nga mao sa gihapon kagahapon, karon, ug hangtud sa kahangturan,” ug nagapanghimakak sa Iyang Gahum, nagapanghimakak sa Iyang mga buhat, nagapanghimakak sa Iyang Pulong; kon—kon . . . Ang Iglesia nga nagatoo kang Jesus Cristo, magabuhat sa mga buhat ni Jesus Cristo, maanaa niini ang Kinabuhi ni Jesus Cristo. Ug kon kini dili man, bisan pa kung ang Kinabuhi ginabubo diha niini; kung kini dili gipili nang daan, gikan pa sa gamut, kini magapamunga ug kahil sa tanang panahon, o usa ka butang nga lahi. Apan kung kini mao ang gipili nang daan nga Kinabuhi, diha sa mga gamut, ipamunga kini si Jesus Cristo nga mao sa gihapon kagahapon, karon, ug hangtud sa kahangturan, kon kini mao ang Pulong nga nagagikan sa Gamut. Kinsa, Siya mao ang Gamut, ang sinugdanan sa panahon.

⁵⁹ Matikdi, apan kung unsay ilang ginapamunga mao ang nagasulti kaninyo sa kalainan. “Pinaagi sa ilang bunga,” si Jesus nag-ingon, “mailhan ninyo sila.” “Ang tawo dili nagapamupo ug mga ubas gikan sa usa ka sampinit,” bisan nga kon ang sampinit anaa mismo diha sa punoan sa ubas. Mahimo kanang posible, apan ang bunga maayo magpaila niini.

Unsa man ang bunga? Ang Pulong, kay ang bunga alang sa tukmang panahon. Mao kana kung unsa kini, ang ilang pagtulon-an. Ang pagtulon-an sa unsa? Ang pagtulon-an sa maong panahon, kung unsang panahon na kini. Doktrina nga iya sa tawo, doktrina nga iya sa denomenasyon, apan, o Pulong sa Dios alang sa maong panahon?

Karon, ang panahon nagalabay sa dali kaayo, kana mamahimo pa nato sa hataas nga panahon. Apan nakasiguro ko nga kamo nga ania dinhi, ug nakasiguro ko kaninyo nga anaa diha sa gawas latas sa nasud, makita kung unsay akong ginapaningkamotan pagsulti kaninyo, tungod kay wala na kitay panahon kaayo nga magpabilin pa niini.

⁶⁰ Apan tingalig inyong makita nga ang Dihog nagaabot diha sa dili-matarung, sa mini nga mga magtutudlo, ug nagapaaghat kanila sa pagbuhat ensakto kung unsay giingon sa Dios kanila

nga dili pagabuhaton; apan ilang buhaton kini, bisan unsaon. Ngano man? Dili nila mapugngan kini. Unsaon man sa sampinit nga mahimong lahi pa kondili usa lang gyud ka sampinit? Bisan unsaon pa ka daghan sa maayong ulan nga gibisbis diha niini, kini sampinit gayud. Mao kana ang hinungdan nga si Jesus nag-ingon, “Sila hapit kaayo magapareha nga mopahisalaag sa Pinili,” kinsang anaa sa mga gamut, “kung mamahimo pa,” apan dili kini mamahimo. Ang usa ka trigo walay mahimo kondili ang pagpamunga ra ug trigo; mao lamang kana ang mamahimong ipamunga niini.

⁶¹ Hibaw-i. Hinumdomi, ang Dios dili mao ang tigpasugod sa organisasyon. Ang Yawa maoy tigpasugod sa organisasyon. Ako nang gipamatud-an kana pinaagi sa Pulong, ngadto-nganhi, ug pabalik-balik; dili na kinahanglang hisgotan pa kana niining buntaga. Nahibalo kita nga ang Dios wala gayud nag-organisa sa mga tawo sa ingon niana, magbuhat ug usa ka organisasyon. Gatusan ka mga katuigan human sa pagkamatay sa kaulahiing tinun-an, kaniadtong wala pa gayud sila nagkaadunay unang organisasyon. Kini kaniadto pay gipamatud-an na nga usa ka kapakyasan. Kung kini dili pa, nganong wala man kita naghiliusa sa gugma karon, Methodist, Baptist, Presbyterian, Katoliko ug tanan na? Nganong wala man ang mga buhat sa Dios naganunot kanato, kon in-ana, ang matag-iglesia nga anaa diha sa samang butang, sa Pulong? Kadtong mga butang nga nagabuwag sa tawo, sa pagkamanagsu-on...Kita mas nahipalayo na sa Dios kaysa kaniadto, ang mga kaiglesiahanan, ang ginahisgotan.

⁶² Karon, kita nasultihan, nga, “Ang tanan nga kaniadtong mga butang nangahitabo alang sa mga panag-ingnan, alang sa atong katun-anan, pagpamadlong, pagpangpasidaan.” Nga, tanan nga kaniadtong mga butang sa Daang Tugon nahitabo, nag-anino, aron makita kung unsay mahitabo sa Bag-ong Tugon, sa atong adlaw.

Sama ra sa kung wala pa nimo gayud nakita ang imong kamut, ug ikaw mihangad ug imong nakita ang usa ka anino diha sa bongbong, maingon sa akong kamut nga gikan sa suga, kung kini adunay lima ka mga tudlo diha sa anino, kon ang negatiba; ug imong ipaduol ang imong mga kamut, ingon nga mao ang positibo, padulong sa—padulong sa negatiba, kini dapat mahimo nga lima ka mga tudlo.

Sama sa ginaingon kanato sa Biblia, nga, “Ang Daang Tugon ingon nga anino, tipo sa bag-ong mga butang, o mga butang nga umalabot; dili mismo ang maong mga butang, kondili usa kini ka anino, ang tipo sa mga butang nga umalabot.”

⁶³ Atong balikon ug tan-awon kon kining butanga diha na ba sa uban pang panahon. Muoyon ba kamo? [Ang kongregasyon nagaingon, “Amen.”—Ed.] Aron nga atong mahibaloan, sa

pagpamatuod niini, kaniadto ug karon, pinaagi sa Pulong; dili pinaagi sa pipila ka mga hunahuna sa tawo, pipila ka teorya.

Dili ko igsapayan kung kinsa man siya; kinsa pang laing tawo, ako o si bisan kinsa pa, “Kon dili siya nagasulti nga sumala sa kasugoan ug sa mga profeta, walay Kahayag diha kaniya.” Kita n’yo? Mao kana kon unsay giingon sa Biblia. “Ang tanang mga pulong sa tawo mahimong bakak, ug ang Ako maoy tinuod,” bisan pa kon kinsa kini.

⁶⁴ Karon balikon ta ug tan-awon kon nahitabo ba kini gayud, aron sa paghatag kanato’g usa ka panag-ingnan.

Mahimo ta mobalik karon diha sa Basahon sa Exodus ug hisgotan ang usa ka tawo nga ginganlan ug Moises, nga maoy usa ka dinihogan nga profeta nga gipadala sa Dios, nga dala ang Pulong sa Dios ug ang kabubut-on sa Dios alang sa iyang kaliwatan. Maingon nga ang Pulong sa Dios kanunay nagapadayon nga walay pagkausab, Siya nag-ingon, “Dili gayud Niyay gibuhat hangtud nga Iyang gipadayag una Kini ngadto sa Iyang mga profeta.” Dayon Iya kining gibuhat. Uh-huh.

Karon, dili Niya mahimong mamakak. Dili Siya makapamakak ug mahimong Dios. Dili, sir. Siya kinahanglan magpabilin gayud nga matuod. Walay pagpamakak Kaniya. Siya maoy . . .

Ug dili Niya mausab Kini. Kon iya man Kining ginabuhat, nan dili Siya Dios; nakabuhat Siya ug sayup. Siya kinahanglan nga walay kinutoban. Ug ang walay kinutoban dili gayud makahimo’g sayup. Kita n’yo? Busa kung unsa man gayud ang ginaingon sa Dios, kanay husto hangtud sa Walay Katapusan. Kita n’yo? Ug Iya kanang gisaad. Busa, bantayi, walay bisan diin diha sa Biblia gawas nga kini nagasunod sa walay pagkausab mismo niini.

⁶⁵ Karon, ang Dios nagsaad kang Abraham nga ang iyang binhi mahimong dumoloong sa usa—sa usa ka langyaw’ng yuta sulod sa upat ka gatus ka tuig, dayon Iyang ipagawas siya pinaagi sa usa ka dakung kamut nga kusgan ug gahum, ipakita ang Iyang mga ilhanan ug mga katingalahan sa taliwala sa mga katawhan nga kauban nilang nanagpuyo. Ang panahon sa saad nagkahiduol na. Ang mga katawhan nahikalimot na niini. Sila adunay mga Fariseo ug mga Saduceo, ug uban pa, mga denominasyon. Apan, sa kalit lamang, nag-inusarang miabot ang Dios ug gikuha gikan, paggawas, pahilayo gikan kang bisan kinsa kanila.

Ang Dios wala sukad, diha sa bisan unsang adlaw o sa bisan unsang panahona, bisan kanus-a man nagtawag ug usa ka profeta gikan sa usa ka denominasyon. Wala, sir. Nahimo siyang hiwi na kaayo, dili niya mabuhat kini; kinahanglan niyang mopabilin nianang denominasyon.

⁶⁶ Si Moises, usa ka tawong gipadala gikan sa Dios, dala ang Pulong sa Dios, ug diha sa iyang panaw nga ginadala ang Israel paadto sa yutang gisaad, nga hingpit gayud sa kasugoan sa Dios, iyang gikahibalag ang usa pa ka profeta, ang usa pa ka dinihogan nga adunay usa ka matuod nga dihog sa mao ra nga Espiritu Santo nga diha kang Moises. Husto kana. Siya usa ka profeta. Ang Espiritu Santo anaa niining tawhana. Ang iyang ngalan mao si Balaam. Kitang tanan nakaila na kaniya. Bueno, ang mismong mga butang, parehas, ang mga butang—ang mga butang nga giingon sa maong tawo, nagakahitabo pa, mga kaluhaan ug walo ka gatus na ka tuig ang milabay. “Ikaw sama sa usa ka bakang ihalas, O Israel. Ang nagapanalangin kanimo pagapanalanginan. Ang nagapanghimaraut kanimo pagapanghimarauton. Ang imong kusog, ug gahum, daw unsa kamatarung gayud ang imong mga balong-balong, O Jacob!” Kita n’yo, dili niya mapugngan ang iyang kaugalingon. Siya miadto didto nga ang tuyo sa iyang kasingkasing mao ang pagtunglo sa maong katawhan.

⁶⁷ Oh, kamong mga mini nga magtutudlo nga nagapaminaw niining mga teyp niining mga katuigan na, ug nakasud-ong nga ang Dios nagapamatuod niini sa tukma gayud kung unsay Iyang giingon, ug kamo nagalingkod diha sa inyong pagtoon ug nasuta nga kini ang Kamatuoran; ug tungod sa inyong pangdenominasyon nga panagkalahi, gipanghisayup ninyo ang mga niini ug ginasultihan ang inyong mga tawo nga dili tinuod ang mga niini. Alaut kamo! Ang inyong panahon hapit na matapus.

⁶⁸ Si Balaam, dinihogan sa mao ra nga Espiritu nga diha kang Moises. Unsa man ang kalainan? Ang pagtulon-an ni Moises hingpit. Ang Biblia nag-ingon dinhi sa Ikaduhang Pedro, nga mao kadtong “pagtulon-an ni Balaam” nga gidawat sa Israel, nga dili gayud gipasaylo sa Dios. Sala nga dili mapasaylo! Walay usa kanila naluwas, bisan pang nigula sila ngadto sa ilalum sa mga panalangin sa Dios, ug nakita ang kamut sa Dios nga nagalihok pinaagi niining gamhanang profeta, ug nakita kini nga ensaktong gipamatud-an sa Dios. Ug, tungod kay, adunay usa pa ka profetang nagaduol dala ang usa ka pagtulon-an, nga supak, ug nakiglantugi kang Moises, ug misuway pagpamatuod sa katawhan nga si Moises sayup. Ug si Dathan, Korah, ug daghan pa kanila, miuyon uban kaniya ug gitudloan ang mga anak sa Israel sa pagpakasala sa pakighilawas, aron pagsunod sa iyang organisasyon, nga, “Kitang tanan managsama ra.”

“Bisan pa kung kita Methodist, Baptist, Presbyterian, o mga Pentecostal, ug unsa pa man, kitang tanan managsama ra.”

⁶⁹ Dili kita managsama! Kamo mga linain na nga katawhan, balaan ngadto sa Ginoo, hinalad ngadto sa Pulong ug sa Espiritu sa Dios, aron pagpamunga sa Iyang saad niining panahon. Ug dili kamo kauban nila! Nahibalo ko nga bug-at kaayo kana, apan

sa gihapon mao kana ang Kamatuoran. Hinalad ngadto sa usa ka bulohaton alang niining katapusang mga adlaw! “Panggawas kamo gikan niini.”

⁷⁰ Karon, “ang pagtulon-an ni Balaam,” dili ang panagna ni Balaam. Husto kadto. Dios kadto. Pila man ang nagatoo niana? [Ang kongregasyon nagaingon, “Amen.”—Ed.] Ang panagna ni Balaam husto kaayo, tungod kay dili man siya makasulti ug uban pa. Ang dihog sa Dios dili mosulti ug laing uban pa, ug gipaluyohan kini sa Dios pinaagi sa pagpanghimatuod nga kadto mao ang Kamatuoran. Apan kadto mao ang “pagtulon-an ni Balaam.”

⁷¹ Karon itandi kana sa Mateo 24:24. Mga dinihogan, apan ang ilang mga pagtulon-an mini. Ang mga trinidad, ug ang tanang butang nga sama niana; sayup, anticristo!

Naghinaut ko nga dili masakitan ang inyong mga pagbati. Ug ayaw’g lisoa kana, palungon silang mga telepono. Ug ayaw pagtindog ug paggawas. Pagpabilin lang sa paglingkod, ug tanawon nato kung dili ba ipadayag sa Espiritu Santo kini kanato, ug pamatud-an kini kanato. Moingon, “Apan kana . . .” Bisan unsa pa man ang inyong ginatooohan, pagpabilin lang paglingkod ug magpaminaw. Ug hangyoa ang Dios nga ablihan ang inyong kasingkasing, ug unya inyong mahibaloan kung kamo usa ka tunokon, o usa ka sampinit, o kon asa man kamo nagabarug. Kita n’yo?

⁷² Karon, bisan pa si Judas, “gikatagana na siyang daan ngadto sa pagkahinukman sa silot,” milingkod didto sa atubangan ni Jesus. Ug giingnan siya ni Jesus, “Ikaw ang maong magabudhi. Kung unsa man ang imong pagabuhaton, ug unsa man ang imong kinahanglan nga buhaton, buhata sa madali.” Siya nga nahibalo na kung unsay iyang ginabuhat, apan, alang kanilang katloan ka buok nga salapi, ug sa popularidad, gibaligya ang Ginoong Jesus Cristo. Ang usa sa Iyang mga tinun-an, ang tinugyanan sa salapi sa iglesia, gitawag siya ni Jesus nga Iyang “higala.” Kita n’yo? Ang Biblia nag-ingon, “Siya natawo nga anak alang sa kalaglagan,” sama lang maingon nga si Jesus natawo nga Anak sa Dios. “Ipahisalaag ang Pinili kung mahimo pa.”

⁷³ Matikdi pag-ayo samtang padayunon ta ang pagtoon. Mokuha ta ug usa pa ka panghitabo, diha sa Basahon sa mga Hari. Dihay usa ka—usa ka profeta, ug ang iyang ngalan mao si Micheas. Siya ang anak ni Imlah, ug siya usa ka profeta. Siya gayud.

Ug dihay usa pa ka profeta, ang pangulo sa usa ka organisasyon sa mga profeta, mga dinihogan. Ang Biblia nag-ingon nga sila kaniadto “mga profeta,” tukma gayud nga sama sa Iyang giingon nga si Balaam kaniadto usa ka profeta, mga dinihogan.

Ug dihay usa pa kanila nga gihinganla'g Micheas, nga dinihogan sa Dios ug gipadala sa Dios, nga uban ang Pulong sa Dios.

Adunay usa, si Zedekiah, nga nagdahum nga siya gipadala sa Dios. Siya dinihogan sa Dios, apan ang iyang pagtulon-an sukwahi sa Pulong sa Dios. “Magapanungha, ang mga mini nga Cristo, magapakita ug mga dagkung ilhanan, magapahisalaag sa Pinili kung mahimo pa.”

⁷⁴ Matikdi, silang duha, silang duha mga dinihogan. Karon, unsaon mo pag-ingon kung kinsa ang husto, ug sayup? Bantayi kung unsa ang Pulong nga gisaad alang kang Ahab. Ang profeta nga nauna kaniya, nga mao si Elias, usa sa labing bantugan nga profeta sa maong panahon, nga usa ka gipanghimatud-an nga profeta. Katong gipanghimatud-an nga profeta nag-ingon, nga, “Tungod kay gibuhat ni Ahab kining dautan, nga ang mga iro magatilap sa iyang dugo; nga mikuha sa kinabuhi ni Nabot. Ug nga ang mga iro magakaon kang Jezebel, ug ang . . . ug ang iyang lawas mamahimong kinalibang diha sa kapatagan.” Karon, unsaon man ninyo pagpanalangin sa gitunglo na sa Dios? O unsaon man ninyo sa pagtunglo, sama sa giingon ni Balaam, sa gipanalanginan na sa Dios? Kita n'yo?

Apan kining mga profeta mga matinuuron. Walay pagduhaduha kung unsa sila kaniadto kondili maayong mga tawo, dungganong mga tawo. Tungod kay, aron nga mamahimong usa ka profeta sa Israel, kinahanglan ikaw dungganon, o bisan pa aron mahimong usa ka Israelinhon. Gibato ka na, kon dili pa. Mga dungganon silang mga tawo. Mga utokan silang mga tawo. Sila mga tawong edukado. Sila ang mga pinili ni Ahab, sa nasud. (Nakita mo kana, Igsoon nga babayeng Wright?) Ang pinili sa nasud, haum kaayo alang sa pagka- . . .

⁷⁵ Ug karon, sa nakita ni Micheas ang iyang panan-awon, nahibalo siya sa iyang kasingkasing kon unsa nay giingon sa Pulong, apan buot niyang tan-awon kung unsay igaingon sa Espiritu nga anaa sa sulod niya.

Busa ilang gisultihan siya, matud nila, “Imong isulti ang samang butang nga ginasulti niining ubang mga profeta. Ug kung pagabuhaton mo, aba, mamahimo kang, pagaubanon ka namo sa panagtipon, sa walay duhaduha, pag-usab. Kita n'yo? Buhaton ka namong usa sa among kauban. Amo kang dalhon pagbalik sulod sa among denominasyon. Ikaw . . . Nahibalo kaming ikaw usa ka profeta, apan kanunay ka nagasulti'g mga butang nga pagpanghimaraut. Kanunay mo nga gipanghimaraut si Ahab. Karon, si Zedekiah, ang tawo'ng punoan, ang papa, o ang . . .” kon unsa man kaniadto siya. “Karon iyang gipanalanginan si Ahab, ug miingon, ‘Lakaw ug buhata kini.’ Karon isulti mo ang samang butang, Imlah. Aba,

usa ka lang ka tawong kabus. Walay imong kongregasyon, halos, wala man lang. Ug kining mga tawhana adunay mga minilyon. Ang tibuok nasud miuyon kanila. Karon isulti mo ang sama sa ilang gisulti, makita mo kung unsay imong pagabuhaton, ikaw—ikaw magakaon sa katambok sa yuta.” Sayup nga tawo ang ginapakigsultihan niya didto!

⁷⁶ Unsa kaha kung kini pa ang giingon, “Makakaplag ka ba ug bisan unsang sayup diha kang Zedekiah, Micheas?” “Wala.” “Nakasapon ka na ba kaniya sa sala?” “Wala.” “Nakadungog ka na ba kaniya sukad nga nagpanghimaraut kang bisan kinsa?” “Wala.” “Nakasapon ka na ba kaniya nga nahubog?” “Wala.” “Mapanghimakak mo ba ang iyang edukasyon?” “Dili.” “Nagatoo ka ba nga ang iyang titulo sa pagkadoktor mini?” “Dili.” “Nagatoo ka ba sa iyang—iyang Ph.D. nga maayo?”

“Sigurado. Pinaagi sa konseho sa Sanhedrin; tingali kining tanan sa konseho, maoy akong hunahuna nga kini maayo.”

“Bueno, nan, nganong dili man ka makighiusa uban kaniya?”

“Tungod kay siya wala na sa pulong!”

⁷⁷ Bueno, adunay atong usa ka pakigsangka niini, kon in-ana, sama kang Elias nga profeta sa una pa niana. Ug kung ikaw usa ka anak sa Dios, magpabilin ka uban sa maong profeta niining Biblia. Kini mao ang Pulong. Ilha ang takna, ang panahon.

⁷⁸ Bueno, unsa man kon si Zedekiah moingon, “Oh, nasayod ako nga ang profeta nagsulti niana, apan kana alang pa sa umalabot nga kaliwatan. Kana alang pa sa dugay’ng panahon gikan karon?”

Siya miingon, “Paghulat hangtud nga makakita ako ug usa ka panan-awon gikan sa Dios, ug unya sultihan ko kamo.”

Miingon, “Dayon isulti mo ang mao rang butang?”

Siya miingon, “Isulti ko lamang kon unsay ginaingon sa Dios; wala nay lain pa, wala nay bisag unsa pa. Dili ko makadugang ug usa ka pulong Niini, o magakuha ug usa ka Pulong gikan Niini.”

Busa niadtong gabhiona, diha sa pag-ampo, ang Ginoo mianha kaniya diha sa usa ka panan-awon. Migawas siya pagkasunod buntag, miingon siya . . .

Diha ang duha ka mga profeta!

⁷⁹ Ang labing bantugan nga tawo sa maong nasud, diha sa kasundalohan ug sa panan-aw sa tibuok nasud, mao si Zedekiah. Siya mao ang pangulo nga profeta, tungod sa hari. Siya mao ang ulo sa tanang uban pang mga profeta, pinaagi sa organisasyon. Siya gihimo, pinaagi sa iyang organisasyon, ang pangulo nilang tanan; tingali ang pinakadaghang nabasa, ang pinakaedukado, mas may katakos alang sa maong buhat. Ug siya dinihogan sa

Espiritu Santo, tungod kay siya gitawag nga usa ka “profeta.” Sigurado, dili lamang kay usa ka yano’ng profeta, siya usa ka Hebreohanon nga profeta. Karon bantayi siya.

⁸⁰ Si Zedekiah nag-ingon, “Ang Ginoo nakigsulti kanako, ‘Buhati Ako niining duha ka mga sungay nga puthaw,’ usa ka timaan.” Ang profeta kasagaran nagahatag ug mga timaan. “Siya miingon, ‘Buhata kining mga sungay nga puthaw.’ Ang Espiritu Santo nag-ingon kanako, ‘Kuhaa ang mga kini,’ ang Dihog nga nagpanalangin kanako.” Ayaw pag-isipa kini nga usa ka sakripesiyo, apan mao ang pagkuha sa usa ka punto. “Ang Espiritu Santo nga nagasulti’g mga dila pinaagi kanako, ang Usa nga nagpaluyo kanako, Siya miingon, ‘Kuhaa kining mga sungay, ug, pinaagi niini, sultihi ang hari nga iyang ipahawa ang Syria diretso paggawas sa nasud. Ug akong ihatag kaniya pagbalik ang yuta nga sa tinud-anay iya sa Israel, ang iglesia.”

Igsoon, masukaranon kana gayud, halos sama gayud kang Balaam nga nia pa kaniadto. Si Balaam ingon-ana kamasukaranon kung isulti sama gayud kang Moises. Si Moises. . . Ang husto nga numero sa Dios mao ang pito. Ug si Balaam nag-ingon, “Tukori kog pito ka mga halaran; pito ka mga mahinlo nga mga halad, lakeng mga baka, ug pito ka mga lakeng carnero.” Kana nagahisgot ug pag-abot sa Anak sa Dios. Sa sukaranan, siya ingon kahusto nga sama sa uban kanila.

⁸¹ Ug ania si Zedekiah, ingon gayud kahusto sa sukaran, “Tungod kay kining yutaa sakop kanato. Aba, silang mga Sirianhon ug mga Filestehanon didto nga nagapaburot sa ilang mga tiyan, ang ilang mga anak ug uban pa, ang atong kaaway, sa mga pagkaon nga unta alang sa atong mga anak! Sa dihang, ang Ginoo naghatag kanato kining yuta!”

Igsoon, usa kana ka maayong pangatarungan. Nagtoo ko nga mahimo niyang isinggit kana ngadto sa atubangan sa Israel, ug mahimo nila ang pagsinggit sa kakusog nga kutob nilang mahimo. Karon, nagahisgot ako mahitungod niining panahon karon. Hinaut ko nga nagsubay kamo kanako. Ang tanang mga pagsinggit, ug pagsiyagit!

⁸² Nahinumdoman ba ninyo si David sa miaging Dominggo? Kita n’yo? Kamo nga nagapaminaw diha sa radyo, o diha sa dapit niining mga nakakonekta sa telepono; wala kamo makakuha sa Mensahe sa miaging Dominggo, siguradoha nga makakuha mo niini. *Nagatinguha Pagbuhat Ug Bulohaton Sa Dios Nga Wala Giordenahi Sa Pagbuhat Niini*, bisan pa kung unsa kamatinuuron, kamaayo, wala gayud kini gidawat sa Dios. Kita n’yo?

Karon, ania si Zedekiah, nagadahum nga siya husto.

⁸³ Si Micheas nag-ingon, “Itugot nga pangutan-on ko ang Dios.” Busa milugsong siya pagkasunod buntag nga dala ang

MAO KINI ANG GINAINGON SA GINOO. Iyang gisusi ang iyang panan-awon pinaagi sa Pulong.

⁸⁴ Karon kung giingnan niya kaha si Zedekiah, “Nahibalo ka ba kung unsay giingon sa profeta sa Biblia dinhi ang mahitabo niining maong lalake?”

⁸⁵ “Apan dili niining higayona, tungod kay kining tawhana usa ka usa ka dungganon nga tawo. Siya nagapaningkamot.” Ayaw’g pakyasa ang pagkuha niini. “Iyang ginapaningkamotan pag-uli ngadto sa iglesia ang mga butang nga iya sa iglesia. Iyang ginapaningkamotan pag-uli balik ang mga kabtangan niini,” dili ang Espirituhanong mga butang; kung kini mao pa, iya na untang natay-ug ang tibuok nasud sama sa gibuhay ni Elias. Apan, nagapaninguha sa paghatag kanila sa mga materyal nga butang, “Nanag-iya kitag kabtangan. Usa kita ka dakung organisasyon. Nahisakop ta niini. Kitang tanan, kamong tanan nga katawhan, kamong mga Protestante, kinahanglan nga moipon uban kanamo.” Uh-huh.

Padulong na kita niana sa makadiyot na lang. “Kining tanan mga manag-igsoonay, bisan unsaon.” Dili kini mao! Dili sa kaniadto ug bisan sa umalabot pa, alang diha sa tinuod matuod nga Iglesia sa Dios. Dili mahimo!

⁸⁶ Matikdi, nakakita siya ug panan-awon. Ug mao nga miingon siya, “Nakigsulti ang Dios kanako.” Karon, tan-awa, matinuuron ang maong tawo. Miingon siya, “Matud Niya, ‘Buhata kining mga sungay, ug saka didto sa atubangan sa hari ug pagsulong paingon sa kasadpan,’” o bisan asang dalana paingon diin ang gikahimutangan sa yuta gikan sa ilang ginatindogan. “‘Sulong, ug kana ang mahimong MAO KINI ANG GINAINGON SA GINOO, nga iyang maangkon ang kadaugan ug mobalik, usa ka kadaugan alang sa iglesia.’ Pagahinginlan sila pagawas!” Morag haduol baya kana, dili ba? Unsa man ang nagakahitabo?

Ania na si Micheas nga nagalugsong. Miingon, “Karon ihatag ang imong panagna.”

⁸⁷ Miingon, “Padayon mo! Apan akong nakita ang Israel nga sama sa mga carnero, nagkatibulaag, nga wala nay magbalantay.” Whew! Tukma gayud pagkabali.

⁸⁸ Karon, kamo ang kongregasyon. Karon hain man ang husto? Silang duha, mga profeta. Ang bugtong paagi nga mahimo mong masulti ang kalainan tali kanila, mao, ang pagsusi niini sa Pulong.

Miingon, “Ginaunsa mo kini pagkuha?”

Matud niya, “Nakita ko ang Dios nga nagalingkod diha ibabaw sa usa ka Trono.” Miingon, “Akong nakita ang tibuok konseho palibot Kaniya.”

⁸⁹ Karon hinumdomi, si Zedekiah bag-ohay pa nag-ingon nga nakita niya ang Dios, usab, ug ang mao ra nga Espiritu. “Nakita ko ang Dios. Gisugo Niya ako pagbuhat niining mga sungay gikan sa—gikan sa puthaw. Lakaw didto ug ipahawa ang mga nasud pagawas dinhi, tungod kay kini ato man. Ang uban walay katungod mismo niini.” Ilang mahimo kung nagpabilin pa sila sa Dios. Ila unta nakuha kato, apan mipahilayo sila sa Dios.

Mao kana sa organisasyon, ang iglesia. Kini adunay katungod ngadto niining mga butanga, apan nalimbongan kamo gikan niini, tungod kay nagpahilayo kamo gikan sa Pulong sa Dios ug sa Espiritu sa Dios, sa dihog, sa pagpanghimatuod sa Pulong alang sa maong panahon. Ayaw gayud pakyasa pagkuha niining Mensahe.

⁹⁰ Matikdi kung unsay nahitabo karon. Siya miingon, “Nakita ko ang Dios,” nakita ni Micheas, “nga nagalingkod ibabaw sa Trono sa Langit. Ang Iyang konseho gitipon palibot Kaniya. Miingon Siya, ‘Kinsa man ang atong mapaadto sa ubus ug limbongan si Ahab, aron mapatuman ang mga pulong ni Elias; ang Akong profeta nga gipanghimatud-an. Akong gisulti nga siya moabot. Ug atua kang Elias ang Akong Pulong. Ug ang mga langit ug yuta mangahanaw, apan ang Akong Pulong dili mapakyas. Dili Ko igsapayan kung unsa na sila ka moderno, o kung unsa na sila ka maayo, o kung unsa na sila ka edukado, o kung unsa na sila kadaku, ang Akong mga Pulong dili gayud mapakyas.’

“Ug ang usa kabakakon nga espiritu migawas gikan sa impyerno, miyukbo sa iyang mga tuhod, ug miingon, ‘Kung Imo lang ako tugotan, mahimo kong ihatag kanila ang akong dihog, ipabuhay kanila ang bisan unsang ilhanan o katingalahan, basta mapahilayo ko lang sila sa Pulong. Dili man lang gani niya mahibaloan nga Kana mao ang Imong Pulong. Dili niya Kini tagdon, tungod sa popularidad.’” Igsoon, ang dagan sa panahon walay pagkausab. Igsoong Neville, tinuod kana. Hinumdomi, kanay tinuod. “Moanha ko kaniya, ipabuhay kaniya ang samang mga butang nga ginabuhay sa uban kanila. Ipapanagna ko siya, ug pasultihon ug bakak.” Unsaon nga mahimo kining bakak? Tungod kay kini sukwahi sa Pulong.

⁹¹ Inyong dawaton ang bisan unsa niining sayup nga mga bautismo, sayup nga *kini-ug-kana-ug-kadto*, dili ko igsapayan kung unsa man kini ka tinuod paminawon, kon giunsa man nila pagtinguha sa pagsundog, usa kini ka bakak kung kini sukwahi sa Pulong sa Dios niining taknaa. Tukma kaayo kana.

Kamo nagaingon, “Bueno, ang sa amoa, bueno, nagbuhat kami *niini*, ug nagabuhay kami *niini*, ug ang among iglesia mao *kini* ug *kana*.”

Dili ko igsapayan kung bisan unsa pa kini. Kung kini supak sa sinulat nga Pulong alang niining taknaa, kini usa ka

bakak. Ang Dios walay pagtagad niini, bisan pa kung unsa kamatinuuron, unsa pa kaedukado, unsa pa kautokan, unsa pa ka tinuod kini paminawon, unsa pa ka makatarunganong paminawon, kung kini supak sa Pulong niining panahona. Mopaingon kita diha palalum pa ug diyutay sulod sa hamubong mga gutlo, kon motugot ang panahon kanato. Kon dili nato mahimo, atong hisgotan kini pag-usab karong gabii.

⁹² Matikdi, siya matinuuron, maayong tawo, sa walay pagduhaduha. Ug miingon siya... Unya, sa laing paagi, si Micheas miingon ngadto kaniya, dili nga pasukmat, apan sa laing panulti, “Ikaw dinihogan sa usa ka bakakon nga espiritu.” Dili ba kaha basta-basta lang nga butang kana nga isulti sa usa ka obispo? Apan nabuhat niya kini.

⁹³ Ug busa kining obispo miduol ug miingon, “Wala ka nay panagkatipon gayud kanamo,” ug gisagpa siya sa nawong. Miingon, “Nahibalo ka nga ako usa ka tawong gipaluyohan. Ang akong iglesia maoy naghimo kanakong pangulo niini, niining maong butang. Ang kinadaghang pagboto sa mga katawhan sa Dios maoy nakapahimo kanako niini. Ang akong organisasyon maoy naghimo kanako niini. Ug ang Dios naghatag kanato niining yuta, ug Iyang ginatuyo kini pagpaangkon kanato. Ug ako adunay MAO KINI ANG GINAINGON SA GINOO.” Gisagpa siya, ug miingon, “Asa nang dalana miadto ang Espiritu sa Dios paggikan Kini kanako?”

⁹⁴ Si Micheas miingon, “Imong mahibaloan, usa niining mga adlaw,” sa diha ang California anaa na sa ilalum sa dagat didto, ug kining tanang mga butang. Kita n’yo? “Makita mo kung hain na Kini mipaingon, sa dihang ikaw napahimutang na diha sa labing kinasuloran nga mga bilanggoan.”

⁹⁵ Karon, Ahab, unsa man ang imong ikasulti? “Ako nagatoo sa akong profeta,” matud niya. Unsa kaha kung gisusi lang niya ang Pulong? Kita n’yo, dili niya gusto nga makita ang iyang kaugalingon nga gitunglo. Paminawa ako! Dili siya gusto nga makita ang iyang kaugalingon nga tinunglo. Walay tawo nga gusto.

Ug ang akong organisas... makig-organisasyon nga igsoon, mao kana kon unsa ang problema kanimo. Gusto mong hunahunaon nga husto ka, sa dihang, ikaw nahibalo sa imong kasingkasing, nga kon ikaw magbautismo nga nagagamit sa “Amahan, Anak, Espiritu Santo,” ikaw nagapamakak. Nahibalo ka sa dihang imong gipredi... ginasulti katong mga butanga nga imong ginabuhay, ug ginadawat nga mga maong pasiunang kalig-onan, ug tanan nga mga butang sama niana, sayup ka. Unsaon nga mahimong pasiunang kalig-onan ang pagsulti sa laing mga dila, ug unya mosulti ug supak sa saad sa Dios niining panahona? Unsaon man pagkahimo niini? Dili ka gusto sa tunglo, dili ba? Apan *Dinhi* kini nahisulat na, mao nga kini

mahitabo. Kana mao ang marka sa mapintas nga mananap, magkahaduol kaayo nga mahimo ang paglimbong sa Pinili kung mahimo pa.

⁹⁶ Ang matag-ilhanan, matag-katingalahan, tawong dinihogan, panagna, tanan nga matang sa mga butang nga nagapanungha; tanang matang sa mga ilhanan, tanang matang sa mga katingalahan, unsaon mo man pagsulti sa kalainan? Bantayi ang Pulong alang niining panahona. Mao kana kung unsaon mo pagkuha . . .

⁹⁷ Bantayi si Moises, kon giunsa niya tingali pagpakahimo pagsulti kang Balaam. Bantayi si Micheas dinhi, giunsa man niya pagkahibalo nga siya husto? Ang Pulong, nga nauna kaniya, nagtagna na kana alang kang Ahab.

Ug ang Pulong, nga nauna kanato, gitagna na kining mga organisasyon alang niining adlaw, ug kining tunglo nga anaa kanila. Ug ang mga butang nga magakahitabo pinaagi sa Iyang matuod nga dinihogan nga Iglesia, magabaton sa Pulong, usa ka Pangasaw-onon nga Pulong. Ania na kita. Ania na kini, karon, maingon sa gihapon kaniadto.

⁹⁸ Ang Biblia nag-ingon, “Gikan sa baba sa duha o tulo ka mga saksi ang matag-pulong mapalig-on.” Ako nagahisgot mahitungod kang Balaam, ako naghisgot mahitungod kang Balaam ug mahitungod kang Moises. Ug karon naghisgot ako mahitungod kang Micheas ug kang Zedekiah. Karon magahatag pa ako ug usa. Kinsa, adunay gatasan kanila, apan usa pa, aron himoon nga tulo ka saksi. Adunay akong sunod-sunod kanila nga sinulat dinhi; apan aron sa pagdaginot ug panahon.

⁹⁹ Si Jeremias nga usa sa gipanghimatud-an, sinalikway, apan usa ka gipanghimatud-an nga profeta sa Dios. Ilang gidumtan ang maong tawo. Ilang gilabayan ug dil. . . gilabayan siya ug lata nga mga prutas, ug bisan unsa na lang. Ug iyang gibutang ang tunglo ngadto kanila. Ug ang mga butang nga iyang gibuhat, ug nahimutang didto sa iyang kilid, ug maong mga butang, ug mihatag sa mga ilhanan nga ang Israel sayup.

Matag profeta, matuod nga profeta nga mitungha bisan kanus-a sa kalibutan, gitunglo kadtong mga denominasyon nga mga organisasyon sa iglesia. Unsaon man pagkausab niini, sa dili mausab nga Dios?

¹⁰⁰ Ang Espiritu Santo mao ang Profeta alang niining panahona; Siya nga nagapaluyo sa Iyang Pulong, nagapanghimatuod Niini. Ang Espiritu Santo mao ang Profeta sa panahon ni Moises. Ang Espiritu Santo mao ang Profeta sa panahon ni Micheas. Ang Espiritu Santo, nga maoy nagsulat sa Pulong, nagaabot ug nagapanghimatuod sa Pulong.

¹⁰¹ Karon unsa man ang nahitabo sa panahon ni Micheas? Si Ahab gipatay, ug ang mga iro mitilap sa iyang dugo, sumala sa Pulong sa Dios.

Tanan kamong mini nga mga magtutudlo, sa ingon nagasulti ang Dios, sa umalabot inyong pagaanion kon unsay inyong ginapugas, kamong mga pangulong buta sa mga buta! Wala ako masuko. Ginasulti ko lang kaninyo ang usa ka Kamatuoran. Ug dili ko unta nasulti kini kung sa ibabaw dinhi, diha nianang lawak, kung dili pa gisulti sa Espiritu Santo, “Isulti kini sa nianang paagi.” May nasulti na ba ako kaninyo sukad ug bisan unsang butang nga sayup kondili ang unsa lang nga gipamatud-an sa Dios nga husto? Pagmata, akong mga kaisgonan, sa dili pa kini ulahi!

¹⁰² Apan tugoti ako pagsulti niini. Unsaon man sa usa ka tunok ang pagmata ug mahimong usa ka sampinit, kung kini gikabut-an nang daan nga niana? Unsaon man sa Pinili pagpugong sa kaugalingon nga makita kini? Tungod kay, kamo mga pinili na aron makita kini. “Ang tanan nga gihatag Kanako sa Amahan moduol,” miingon si Jesus, “apan walay usa kanila nga makaduol gawas kon Iya kining nahatag na Kanako sa wala pa ang pagkatukod sa kalibutan, sa dihang ang ilang mga ngalan nahibutang na diha sa Libro sa Kinabuhi sa Cordero,” dili kon sa usa ka pari sa simbahan, apan diha sa Libro, Libro sa Kinabuhi sa Cordero.

¹⁰³ Matikdi, si Jeremias mitindog, gipanghimatud-an na sa atubangan sa katawhan, apan bisan pa gidumtan nila siya.

¹⁰⁴ Ug busa nanagpanggula sila ug nagbuhat ug usa ka yugo, gibuhat niya, ug gibutang kini diha sa iyang liog, ug miadto sa atubangan sa katawhan. Sila miingon, “Oh, kami mga bantugang mga katawhan sa Dios. Aba, mga Israelinhon kami. Mga matinuuron kami kaayo sa among mga sinagoga! Nagapanambong kami matag Domingo, kami, nagapanghalad kami ug mga halad, ug nagapanghatag kami sa among salapi. Unsaon man sa pagkupot ni Nabucudonosur sa balaang mga butang sa Dios?” Huh! Ang inyong mga kasal-anan maoy nakapahimo niini.

Ang Dios nag-ingon, “Kung inyong pagatumanon ang Akong mga kasugoan, dili Ko pagabuhaton kini. Apan, kung dili, kini nagaabot na diha kaninyo.” Ensakto gyud kana. Mao ra gihapon. Tumana ang Iyang kasugoan, ang Iyang Pulong sa maong panahon, kon unsa ang Iyang gisaad.

¹⁰⁵ Karon matikdi. Karon, si Jeremias, pinaagi sa kabubut-on sa Dios, gipanghimatud-an nga profeta, bisan nga gidumtan. . . Ang matag-usa kanila gidumtan sa ilang mga adlaw. Ilang nabuhat ang maong mga talagsaong butang nga supak sa denominasyon niadtong adlaw, ang matag-usa nagdumot kaniya, bisan pa ang mga hari ug tanan na. Busa iyang gibutang ang usa—usa ka yugo diha sa iyang liog, ug miingon, “MAO KINI ANG GINAINGON SA GINOO. Mahiadto kamo didto sulod sa

kapitoan ka mga katuigan,” tungod kay siya adunay pagpanabot nga gikan sa Pulong sa Dios. “Kapitoan ka tuig!”

¹⁰⁶ Unya si Hananiah, Hananiah, siguro inyong ginalitok kining, H-a-n-a-n-i-a-h. Hananiah, usa ka profeta taliwala sa katawhan, miadto, gikuha ang yugo gikan sa liog ni Jeremias, ug gibali kini. Ug miingon, aron mahimong akong tawo sa taliwala sa katawhan, kita n’yo, sa dihang siya nagasulti supak sa Pulong sa Dios. Ug siya miingon, “Duha ka tuig mahibalik na sila. MAO KINI ANG GINAINGON SA GINOO.”

Duha ka dinihogan nga mga profeta. Unsa man ang kalainan tali kanila? Ang usa adunay pagsulti sa Pulong, ug ang laing usa wala. Si Jeremias miingon, “Amen.”

¹⁰⁷ Sa atubangan sa tanang mga anciano ug sa kongregasyon, sa tanang Israel, kita n’yo, gusto niyang ipakita nga mahimo niyang sama kadaku kang Jeremias. “Nasayod ka nga dili sila nagkagusto kanimo, bisan unsaon. Ngani ako usa ka profeta, usab. Ako labaw pa man nga profeta kay kanimo, tungod kay nagapanagna ka ug bakak. Ginasulti mo kanako nga ang katawhan sa Dios mapasailalum sa *ingon niini-ug-ingon nianang* butanga?”

Mao kana kon unsa ang ilang ginaingon karon, apan mahiadto ka sa gihapon didto, ingon nga usa ka iglesia. Tinunglo ka na sa usa ka tunglo. Kamong tanan nga mga kaiglesiahanan, mga denominasyon nanagkupot sa ilang tawhano’ng kalagdaan inay nga sa Pulong sa Dios, tinunglo ka sa Dios.

¹⁰⁸ Karon matikdi, ania siya nagaabot. Gilabnot ni Hananiah kining yugo gikan sa iyang liog, usa ka simbolo sa Dios, gibalibali kini, ug miingon, “MAO KINI ANG GINAINGON SA GINOO. Mabalik sila sulod sa duha ka tuig.” Alang lang sa usa ka pagpangandak, “Ako mao *Kini-ug-kana*.” Tungod kay siya mibarog sulod niini, siya usa ka profeta sa organisasyon.

¹⁰⁹ Si Jeremias usa ka tawo sa kamingawan nga nagkinabuhi sa iyang kaugalingon. Kanunay siyang nanagna ug dautan bahin kanila sa tanang panahon, tungod kay sila mga dautan.

Ug kining tawhana nagasulti kanila, “Oh, maayo pa man mo basta lang nga nahisakop pa kamo. Basta lang kay Israelinhon kamo, mao lang kana ang gikinahanglan. Kita n’yo, ikaw, kami. . . Dili man kana buhaton sa Dios. Nahibalo ako nga adunay gamay’ng butang nga nahitabo dinhi, apan ayaw kalisang, ayaw’g kahadlok.”

Oh, igsoon, buhi pa sa gihapon sila karon. “Ayaw’g kabalaka, maayo ra ang tanan. Atong kontrolado ang tanan. Kita ang Iglesia.” Ayaw gayud ninyo kana hunahunaa. Oo.

¹¹⁰ Busa miingon siya, “Ang tanan mamaayo ra. Mahibalik sila sulod sa duha ka tuig. Gamay ra kana nga butang nga nahitabo. Dili kini talagsaon. Adunay ato niana. Si Nabucudonosor lang

ang motungas dinhi, apan ang atong Dios maoy bahala niining tanan.”

Apan ang Pulong nag-ingon nga mahiadto sila didto sa kapitoan ka tuig; hangtud nga kanang kaliwatan mangahanaw, ug ang bag-o nga kaliwatan. Ang kap-atan ka tuig maoy usa ka kaliwatan. “Sa halos duha kini ka mga kaliwatan nga maatua kamo didto.” Ug gisulti kini ni Jeremias sumala sa Pulong sa Dios.

¹¹¹ Gibali kana ni Hananiah! Si Jeremias nag-ingon, “Sige. Amen. Apan, Hananiah, atong hinumdoman kini, kitang duha mga profeta. Kita mga ministro.”

Ug ginasulti ko kini kanimo, akong igsoon. Atong hinumdoman nga adunay mga profeta nga nag-una na kanato, ug nagpanagna sila batok sa mga gingharian, ug nagpanagna sila batok sa pipila ka maong mga butang. Apan, hinumdomi, sa dihang ang maong profeta nagsulti na sa kon unsa man nga butang, kinahanglan niyang ipanagna ang sumala sa maong Pulong. Sama ni Micheas, ug ni Moises, ug ang tanan nga uban pa kanila. Kini kinahanglan sumala gayud sa Pulong. Kung kini dili gani, nan hinumdomi kung unsay nahitabo.

¹¹² Unya, si Hananiah, sa iyang patarung nga kasuko misilaob. “Ako si Hananiah” (sa walay duha-duha), “ang profeta sa Ginoo, ug ako nagaingon, ‘Duha ka tuig.’” Sa ubang pinulongan, “Dili ko igsapayan kung unsa ang ginaingon sa Pulong.” Ang dihog kaniya, “Ako nagaingon, ‘Duha ka tuig, mahibalik na sila.’”

¹¹³ Si Jeremias mibiya gikan sa iyang atubangan, migawas, miingon, “Ginoo, dili ko tagdon kung unsay iyang giingon, sa gihapon ako nagatoo ug nasayud nga kanang Pulong nagaingon nga mao gayud. Magpabilin ako nga matinud-anon Kanimo. Dili niya ako malimbongan.”

¹¹⁴ Ang Dios miingon, “Lakaw ug sultihi si Hananiah, ‘Akong buhaton kini gikan sa puthaw, ang sunod nga yugo.’” Tungod kay iya katong gibuhat, siya gikuha gikan sa ibabaw sa yuta, si Hananiah gikuha, niadtong mao ra nga tuig.

Mao kana ang atong mga panag-ingnan, silang duha mga profeta. Aduna pay daghan kaayo ang mahimong isulti ug hisgotan niining higayona.

¹¹⁵ Apan bantayi. Si Jesus miingon, nga, niining katapusan nga panahon, pag-usab, ang maong duha ka mga espiritu mahimong magkaduol na usab gayud. Husto ba kana? [Ang kongregasyon nagaingon, “Amen.”—Ed.] Karon matikdi. Kini mahimong mas magkaduol pa kaysa kaniadto. Kini mao na ang katapusan nga panahon. Oh, mga anak! Ang Ginoo malooy kanato! Hangtud nga, “Kini mahimo pa gani nga morag tinuod gayud hangtud nga kini mopahisalaag sa Pinili kon mahimo pa.” Karon unsaon man nimo, giunsa man nato pag-ila niini diha sa ilang mga adlaw? Unsaon man ninyo pag-ila niini karon? Sa mao ra nga

paagi, pagpabilin sa Pulong, “Si Jesus Cristo mao ra sa gihapon kagahapon, karon, ug hangtud sa kahangturan.”

Karon atimana kining tanan nga Mensahe. Ug sa diha nga kamo nagapatalinghug sa teyp, bisan pa tingalig wala na ako sa umalabot sa dihang ang Ginoo human na kanako dinhi sa yuta, modangop kamo pagbalik niini. Paminawa ang akong tingog, kung unsa ang akong ginasulti kaninyo. Kung kuhaon na Niya ako sa wala pa ang Iyang Pagbalik, hinumdomi lang, ako nagsulti kaninyo sa Ngalan sa Ginoo, pinaagi sa Pulong sa Ginoo. Oo.

¹¹⁶ Matikdi, “Mahimong magkaduol kaayo nga kini mopahisalaag sa Pinili kon mahimo pa,” mohimo sa samang mga ilhanan, mao ra nga mga milagro, pinaagi sa mao ra nga Espiritu. Husto ba kana? [Ang kongregasyon nagaingon, “Amen.”—Ed.] Sama sa mga profeta kaniadto nga atong bag-ohay pa gihisgotan, mga profeta. Karon, ingon nahisulat na kini. . .

¹¹⁷ Atong ablihan kini, alang niining usa, kung gusto ninyo, Ikaduhang Timoteo 3. Dili ta pagbiyaan kining usa. Ug dili ko buot. . .

¹¹⁸ Akong gitan-aw kanang orasan diha sa ibabaw, ug akong—akong buot laktawan ang daghan niini, ug siguro dili na nato himoon kini karon. Kita n’yo? Matikdi. Gayud. . . Kung ako nagabarug dinhi, ginapaningot sama karon, kita n’yo, apan malipayon ako. Ug ako nasayod nga kini maoy tinuod. Ikaduhang Timoteo 3:8.

¹¹⁹ Si Pablo, ang tawo nga nag-ingon, “Kung usa ka Manulonda nagaabot gikan sa Langit ug nagasulti’g lahi nga pulong diha kaninyo nga supak sa ako nang gikasulti, ipatunglo siya,” karon, usa ka Manulonda mikanaug. Mao kana ang sa Ikaduhang Mga Taga Tesalonica. . . Oh, pasayloa ako.

¹²⁰ Matikdi diha sa Ikaduhang Timoteo 3:8. Bantayi si Pablo nga nagasulti karon. Atong sugdan sa. . . Atong sugdan diha sa nauna’ng bersiculo, ug paminaw pag-ayo karon. Kamo nga anaay inyong mga Biblia, pagbasa uban kanako. Kamo nga walay inyong Biblia, paminaw ug maayo. Ang. . .

Apan sabta kini, nga sa kaulahiang mga adlaw. . .

Badlisi ang ubos niana, “kaulahiang mga adlaw.” Mao kana kon kanus-a kini mahitabo.

. . . managpangabot ang mga panahon nga malisod.
(Ania na kita niini.)

Kay ang mga tawo unya mga magamahigugmaon man sa ilang kaugalingon, mga hinapi, tigpagawal, hambogero, tampalasan, masukihon sa mga ginikanan, walay igabalus, dili diosnon,

¹²¹ Tan-awa kining mga pundok nga ania kanato karon, daut na. Bisan sa lalake gawas diha sa dalan, batan-ong lalake, nga nagapadunghay sa ilang buhok ubos sa ilang agtang, sama sa buhok nga pinutlan sa agtang nga sama sa babaye. Kahiwian! Mga Sodomanhon!

¹²² Inyo bang nabasa karon nga tuig, ang *Reader's Digest* karong bulana? Nag-ingon, "Ang mga katawhang Amerikano sa maong edad," nga sa akong panghunahuna kini anaa sa, "tunga sa kaluhaan ug kaluhaag lima ka tuig ang panuigon, anaa na sa ilang katunga-sa-edad nga kahimtang." Impas na sila! Sila nangadaut na! Ang siyensiya maoy nagaingon niana, nga ang lalake anaa na sa iyang katunga-sa-edad nga kahimtang, ug ang babaye, samtang anaa pa sila sa ilang sayo sa kaluhaan nga panuigon. Ang ilang mga lawas nangadaut na ug ayo nga nangatugyan na ngadto sa kahugawan.

¹²³ Oh, Amerika, sa makadaghan ang Dios mipaibabaw na unta kanimo, apan karon ang imong takna miabot na! Imong gipangulohan ang kalibutan diha sa kahugawan.

*. . . mga tampalasan, masukihon sa mga ginikanan,
walay igabalus, dili diosnon,*

Walay mga pagbati sa paghigugma, . . .

Wala nay tinuod nga gugma bisan pa sa usag-usa, lalake ngadto sa babaye, babaye ngadto sa lalake. "Ni pagbati sa paghigugma." Kahugawan, sa kaulag!

*. . . mga mabudhion, mga mabutang-butangon,
mapatuyangon, mabangis, ug madinumtanon sa maayo,*

Sa laing pagkasulti, ginaingon, "Kamong pundok sa mga holy rollers." Adunay usa nga nangutana sa miaging adlaw mahitungod sa pag-anhi dinhi sa simbahan. Matud pa, "Ayaw pag-adto didto. Ang tanan lang niini maoy usa ka dakung pundok sa kasaba ug dili pagkaangay."

Kita n'yo, "mga madinumtanon niadtong."

*Mga maluibon, madali-dalion, tigpaburot, mga
mahigugmaon sa kalipayan inay unta sa Dios;*

Moingon kamo, "Igsoong Branham, mga komyunista kana." Unsa man ang sunod nga bersiculo?

*Nga nagabaton sa dagway sa pagkadiosnon, apan
(unsa?) nagapanghimakak sa gahum niini: (ang Pulong,
si Jesus Cristo nga mao sa gihapon kagahapon, karon,
ug hangtud sa kahangturan, nga gipadayag, ang saad
alang sa maong adlaw) . . .*

Tukma gayud nga sama kang Hananiah, tukma gayud sama kang Zedekiah, tukma gayud nga sama kang Balaam, kaniadto pa, uban pang mga mini nga profeta.

Nga nagabaton sa dagway sa pagkadiosnon, dinihogan . . . Kita n'yo?

Nga nagabaton sa dagway, dinihogan, tinudlo nga mga ministro . . .

Nga nagabaton sa dagway sa pagkadiosnon, apan nagapanghimakak nga Siya mao sa gihapon kagahapon, karon . . . Nagapanghimakak sa Iyang Pulong!

Giunsa man nila pagsalikway kang Jesus niadtong adlaw? Kinsa man ang ilang gisalikway sa dihang ilang gisalikway si Jesus? Ang Pulong. Sila kaniadto mga relihiyoso. Sila nagpanudlo gikan sa ilang Biblia, apan gipanghimakak ang karong-adlaw nga Pulong.

Unsa na man sila karon? Mao ra sa gihapon, dinihogan, nagawali sa Maayong Balita sa pentecostes, apan ginapanghimakak ang gisaad nga karong-adlaw nga Pulong ingon nga gipanghimatud-an, “Si Jesus Cristo mao sa gihapon kagahapon, karon, ug hangtud sa kahangturan.” Nakita ba ninyo kini? [Ang kongregasyon nagaingon, “Amen.”—Ed.]

Kay kini ang mga tawong ingon kanila nga mao ang mga nagapanakasaka sa kabalayan, ug nagapamihag . . . sa mahuyang nga kababayenhan nga nahimug-atan sa sala, ug ginadal-dal sa mga nagkalain-lain pangibog,

“Ang atong mga salusalong pangpanahi ug ang atong mao *kini-ug-kana*.” Usa ka tawo nagaduol ug nagapaninguha paghubad ug sayup sa Pulong, ug nagaingon niini, “Puede ra, igsoong babaye, alang kanimo ang adunay mubo nga buhok. Ayaw’g hatagi pagtagad kanang kulang-kulang. Kita mo? O, kung imong—imong isul-ob kini; dili man ingon niana, ‘kung unsa ang nagagula gikan sa kasingkasing sa tawo maoy nagapahugaw kaniya.’” Kita n’yo? Ug nakabantay ka ba nga ikaw gidihogan sa usa ka dautan, maulagon, mahugaw nga espiritu? Wa koy labot, kon ikaw tingalig nagaawit pa sa koro, nga mubo ang buhok, apan duna kay dautang espiritu. Supak kana sa Pulong. Husto kana. Mao kana ang giingon sa Biblia. Ug moingon ka, “Bueno, ako nagasul-ob man ug mga purol. Wala may nagapanghimaraut sulod kanako niini.”

“Ang si bisan kinsa, kung ang usa ka babaye nagasul-ob ug usa ka bisti nga iya sa lalake, kini usa ka dulomtanan sa atubangan sa Dios.” Ang walay pagkausab nga Dios maoy nag-ingon niana.

¹²⁴ Oh, kadaghang mga butang, unsaon man nato nga mahisgotan kini tanan; ang atong oras mahurot na. Apan igo na ang inyong nahibaloan aron sa pagkasayud kung unsa ang husto ug sayup. Ug unsaon ko man pagpabuhat kanila niini? Unsaon ko man pagbuhat niini? Moingon, “Bueno, unsa man ang imong ginasinggit diha?” Ako usa ka saksi batok kanimo. Sa umalabot

nga adlaw, sa Adlaw sa Paghukom, walay imong usa ka dapit nga madangpan.

¹²⁵ Unsaon man ni Micheas pagpahunong niana? Unsaon man ni Moises; nagasinggit, ug nagatinguha pagpahunong niini, ug si Joshua ug silang nagadagan taliwala sa katawhan, ug si Levi mihulbot sa iyang espada ug gipatay sila, bisan pa? Sila nanagpadayon sa gihapon.

Gisulti nang daan nga ilang pagabuhaton kini. Ug ilang pagabuhaton kini, tungod kay MAO KINI ANG GINAINGON SA GINOO nga ilang pagabuhaton kini. Nagahunahuna pa ba kamo nga silang mga nominasyon magkabungkag pa, ang ilang denominasyon magabalik sa Pulong? MAO KINI ANG GINAINGON SA GINOO, dili nila himoon! Mopaingon ba sila ngadto sa anticristo? Mao gayud. Kini MAO ANG GINAINGON SA GINOO, paingon gayud sila! “Busa unsa man ang imong ginapasabot?” Kinahanglan mahimo akong saksi, ug maingon man usab kamo, ang tanang magtotoo. Bantayi.

*. . . mahuyang nga kababayenhan nga nahimug-atan
sa . . . nagkalainlaing mga pangibog,*

¹²⁶ “Bueno, ang kadaghanan sa mga babaye mao na man kana.” Mini nga mga profeta! Karon paminaw. Mini nga mga profeta, mao ang akong ginahisgotan. Karon unsa man ang ilang buhaton sa katapusan nga adlaw?

*. . . nagapamihag sa mahuyang nga kababayenhan . . .
gipanagdaldal sa nagkalainlaing mga pangibog,*

“Bueno, nasayod na man ako sa tanang uban pang mga babaye . . .” Sige, ipadayon mo.

¹²⁷ Unsay akong masulti sa dili pa mahitabo kining dakung panghitabo dinhi sa California? “Kamong mga katawhan dinhi sa Los Angeles, matag tuig sa akong pagbalik adunay nagkadaghan pang mga babaye nga mugbo’g buhok ug nagkabayot nga lalake kay sa tua kaniadto sa unang higayon, nagkadaghan pang mga magwawali nga nangsulod sa organisasyon. Dili gayud kamo makaipso! Kon ang mga gamhanang buhat gihimo pa sa Sodoma ug Gomora nga gihimo diha kaninyo, kini nagapabilin pa unta hangtud karon. Oh, Capernaum, ikaw nga nagatawag sa imong kaugalingon pinaagi sa ngalan sa mga manulonda, Los Angeles!” Nakita ninyo kung unsay nagakahitabo? Siya nagapaingon na ngadto ilalum sa dagat. Kanus-a? Wala ako mahibalo kung kanus-a kini mahitabo, apan mahitabo kini. Kamong mga batan-on, kung dili ko kini makita sa akong adlaw, bantayi ninyo. Siya wala na!

*Nga kanunay’ng managtoon, . . . apan bisan unsaon
dili gayud managpakakab-ot sa kahibalo sa
kamatuoran.*

Karon ania ang makapauyog, ania kining bahin nga makapatay-og. Paminaw niini.

Karon maingon nga si Jannes ug si Jambres misupak kang Moises, maingon man usab kining mga tawhana nagasupak sa kamatuoran: mga tawo nga dunot ug pagpanghunahuna, sinalikway bahin sa pagtoo nga sa makausa pa gikatugyan ngadto sa mga balaan, tinuod.

“Bahin sa Pagtoo.” “Ug iyang pabalikon ang Pagtoo sa mga amahan, o sa mga anak, balik ngadto sa mga amahan.”

128 “Sinalikway bahin sa Pagtoo.” Uh! Nasayud ba kamo kung unsay kahulogan sa *sinalikway*? Kung adunay imong Biblia nga Scofield, adunay usa ka “h” diha. Diha mismo, nga nagaingon, “ang pagtalikod sa pagtoo.” Usa ka pagtalikod, mao kana kon unsa kini.

129 Karon, sa makadiyut lang. Buot kong tan-awon ang usa ka butang dinhi. Ang pagtoo ko nga ako nang nasulat mismo kini. Wala ko makasiguro, apan buot nga isulti kini, ug tan-awon kini sa dili ko pa—ko pa isulti kini. Karon, sa makadiyut lang. [Blangko nga bahin sa teyp—Ed.] “Mga sinalikway mahitungod sa Kamatuoran, bahin sa Pagtoo.” “Ang Pagtoo,” adunay usa lamang ka Pagtoo. Husto kana. “Bahin sa Pagtoo, mga sinalikway!”

Karon buot kong basahon ang Lukas 18. Sa makadiyut lang. Wala ka. . . Mahimo ninyo kining isulat; dili na kinahanglan pa nga basahon.

Ug unya gisuginlan niya sila sa usa ka samingay, ngadto sa pagpahayag nga kinahanglan magampo sila sa kanunay, ug dili . . . magkaluya;

Nga naga-ingon—nagaingon, Sa usa ka lungsod dihay usa ka maghuhukom, nga walay pagkahadlok sa Dios, ug wala nagatahud sa tawo:

Ug sa mao rang lungsod dihay usa ka babayeng balo; ug siya nagbalikbalik sa pag-adto kaniya, nga nagaingon, Hatagi akog hustisya batok sa kaaway ko.

Ug siya wala naga—ug siya wala lang una manumbaling: apan sa kaulahiay siya miingon sa iyang kaugalingon, Bisan tuod wala ako mahadlok sa Dios, ni magtahud sa tawo;

Apan kay nagsamok man kanako kining babayeng balo, ako na lang siya panalipdan, basi unya hinoon . . . maugtas ako sa iyang pagbalik-balik kanako.

Ug ang Ginoo miingon, Patalinghugi ninyo ang ginaingon sa dili matarung nga maghuhukom.

Ug dili ba hatagan sa Dios ug hustisya ang iyang . . . pinili, nga nagatuaw ngadto kaniya sa maadlaw ug sa magabii, langay-langayan ba niya sila?

Sultihan ko kamo nga sa madali iyang hatagan silag hustisya. Ngani inig-abot sa Anak sa tawo, makakaplag ba kaha siyag pagtoo dinhi sa yuta?

¹³⁰ Karon kana mao ang pangutana. Dinhi mao kon diin ang gusto kong paingnan, diha sa Pinadayag 10. Mopaingon ta niini sa pipila ka mga gutlo, ngadto sa usa pa ka bersiculo sa Kasulatan. Siya miingon, “Sa mga adlaw sa Mensahe sa ikapitong manulonda, ang mga tinago sa Dios dapat pagatumanon na.” Ania na ang pangutana, nga mao, kung magsunod kamo diha nianang linyaha niining takna, matuman ba kini? “Makakaplag ba ako ug Pagtoo?” Ang Malaquias 4 matuman ba niining panahona, “Ipasig-uli ang Pagtoo sa mga anak, balik ngadto sa Pagtoo sa mga amahan, ang orihinal, ang Pulong”? Kita n’yo?

¹³¹ “Mga sinalikway, si Jambres ug si Jannes, maingon nga sila misupak.” Karon, usab, paminawa, Ikaduhang Timoteo 3:8. “Maingon nga si Jan-. . .misupak kang Moises, usab niining katapusang mga adlaw kini silang mga managsamang sinalikway mangtungha,” karon tan-awa kon asa Kini nagaingon dinhi, “nga anaay dagway sa pagkadiosnon,” mga dinihogan. Karon ato lang. . .Balik kamo ug—ug basaha kini sa dihang nakauli na mo, aron nga mahuman ko kini, niining buntaga, kung mahimo ko. “Mga sinalikway bahin sa. . .” Dili nga mga sinalikway diha—diha—diha sa pagkinabuhi; mga maayo sila, mga tawong may pamatasan.

¹³² Karon matikdi sa dihang si Moises milugsong didto sa Ehipto, nga dala ang mensahe nga MAO KINI ANG GINAINGON SA GINOO, ug gipanghimatud-an; gitawag ang Israel, nga usa ka katawhan, dili usa ka iglesia. Ang Israel usa ka katawhan; dili gayud sila usa ka iglesia. Tungod, kay ang pulong nga *iglesia* nagkahulogan nga “mga tinawag pagawas.” Sila mao ang katawhan sa Dios. Unya sa dihang nahimo silang dinihogan ilalum sa Pulong, ug gitawag pagawas, nahimo silang iglesia sa Dios. Ug unya mibalik sa naandan, tungod kay wala nila toohi ang Pulong sa Dios, ug nagpatalinghug ngadto sa mini nga profeta. Nanghinaut ako nga kana nagatuhop gayud.

Ang Israel, ingon nga katawhan sa Dios, ninggawas pinaagi sa ilalum sa kamut sa Dios, gidihogan pinaagi sa Pulong. . . uban sa Gahum sa Dios, nakita ang mga ilhanan ug mga katingalahan sa Dios. Ug unya sa dihang ang Dios nagakuyog diha uban kanila, usa ka mini nga profeta miabot, dinihogan, ug nagpanudlo sa mga butang nga supak sa orihinal nga Pulong sa Dios nga ilang nadunggan; ug ang matag-usa kanila nangamatay sa kamingawan, gawas sa tulo ka mga tawo. Karon kadyut lang.

¹³³ “Maingon sa nahitabo kaniadto sa mga adlaw ni Noe, diin walo ka mga kalag ang nangaluwas latas sa katubigan, maingon usab niini sa pag-abot sa Anak sa tawo.” “Maingon sa nahitabo

kaniadto sa mga adlaw ni Lot, diin adunay tulo ang migula gikan sa Sodoma, maingon usab niini sa panahon nga igapadayag na ang Anak sa tawo.” Igo lamang ako nagakutlo sa Kasulatan, ang Pulong nga iya sa Ginoo, nga, “Ang mga Langit ug ang yuta mangahanaw. . . .” Kini maanaa sa usa ka kinadiyutayan!

¹³⁴ Matikdi dinhi. Si Moises nagapaingon kang Aaron. Si Moises ang maingon nga Dios. Ang Dios nag-ingon kaniya nga maingon siyang Dios, miingon, “Ikaw mahimong Dios, ug si Aaron nga imong igsoon himoong maoy imong profeta. Imong igabutang ang mga pulong diha sa iyang baba kung dili ka makasulti ug maayo.” Giingon, “Apan kinsa ang naghimo sa tawo aron maamang? Kinsa man ang naghimo sa tawo nga makasulti?” Ang Ginoo mao ang nagbuhat.

Ug milakaw siya ngadto. Unsa man ang iyang gibuhat? Iyang gibuhat ang usa ka matuod ug mao gayud nga milagro nga gisulti kaniya sa Dios nga buhaton. Ang Dios nag-ingon kaniya nga, “Lakaw ug iitsa ang imong sungkod.” Gipunit kato, ug usa kato ka halas. Iyang gipunit kato, ug nahibalik sa pagka-sungkod. Miingon, “Lakaw’g buhata kana sa atubangan ni Faraon, ug ingna, ‘MAO KINI ANG GINAINGON SA GINOO.’”

¹³⁵ Ug sa nakita kato ni Faraon, maingon nato, “Aba, unsa ka barot nga lingla sa salamangkero.” Miingon, “Wala ra na. Kini usa ka telepatiyang panghunahuna o usa ka butang, nasayud kamo. Adunay atong mga tawo sa atong organisasyon nga makahimo sa samang butang. ‘Umari ka, Obispo *Kini-ug-kana*. Ug, ikaw, gawas ka dinhi.’ Adunay among makahimo sa mao gihapong butang.” Kadto mao si Satanas nga nakigsulti pinaagi kang Faraon.

Kadto mao ang Dios nga nakigsulti pinaagi kang Moises.

¹³⁶ Apan bantayi kining tawo nga migawas. Si Jannes ug si Jambres milakaw sa atubangan ni Moises, ug nga dayag sa atubangan sa katawhan, ug gibuhat ang matag milagro nga mahimo ni Moises. “Ilang ipahisalaag ang Pinili kung mahimo pa.” Husto ba kana? Gibuhat ang samang butang nga gibuhat ni Moises. Nakuha ba ninyo kini? Karon hinumdomi, KINI MAO ANG GINAINGON SA KASULATAN, nga kini mahitabo balik niining katapusang mga adlaw.

Unsa man ang kalainan tali kang Moises ug kang Jambres?

Si Moises nag-ingon, “Maadunay dugo ang tubig.”

Ug kining mini nga mga profeta miingon, “Sigurado, mobutang kami ug dugo diha sa tubig, usab.” Ug kini nahitabo.

¹³⁷ Busa si Moises miingon, “Motungha ang mga pulgas.” Sa unsa man niya ginakuha kini? Diretso gikan sa Dios. Kita n’yo?

Ug unsa man ang iyang gibuhat? Siya miingon, “Buena, sigurado, makapatungha kami ug mga pulgas, usab.” Ug ilang

nahimo kini. Bisan unsa nga milagro nga mabuhat ni Moises, ilang mahimo, usab!

Hinumdomi, ipabilin kana sa hunahuna, paingon na ta diha niini, sa dili madugay. Mabuhat nila ang bisan unsang butang nga mahimo sa uban pa kanila, apan dili sila makapabilin sa Pulong. Dili sila makapabilin sa Pulong.

¹³⁸ Karon matikdi, nahimo nila kini. Apan si Moises, ang tinuod nga pinadala nga profeta gikan sa Dios, sinugo sa Dios, wala gani siya nakiglantugi kanila, miingon, “Ania, dili kamo makabuhat niana! Dili gyud!” Gipasagdan lang Niya sila, iya silang gipapadayon. Mga profeta sila sa organisasyon, apan ipadayon n’yo.

Si Moises mipadayon lang, nagpatalinghug sa Dios. Bisan unsa may giingon sa Dios, “Karon buhata *kini*,” si Moises milakaw ug gibuhat kini. Iyang nabuhat ang bag-ong butang. Sa dihang ila nang nabuhat, matag-usa kanila adunay pagbati o unsa man nga butang, ania na sila. Ilang gihimo kini, usab, sa tukma gayud sama sa gibuhat ni Moises.

¹³⁹ Karon matikdi. Nanungha kining mga tawhana... Oh, kamong katawhan, ayaw ninyo kini pagpakyasa! Kining mga limbongan, mga manunundog, nanungha human nga ang usa nga matuod nauna na. Kita n’yo? Nanungha sila aron sa pagsundog. Kita n’yo, ilang kinahanglan buhaton. Ang yawa dili makamugna sa bisan unsang butang; usa ra siya ka tigtuis sa orihinal.

Ug unsa man ang sala? Mao ang pagkamatarung nga gituis. Unsa man ang pagpanapaw? Ang hustong buhat nga gituis. Unsa man ang bakak? Ang kamatuoran nga gituis. Usa ka pagpanuis!

Tan-awa si Hananiah, usa ka pagpanuis sa orihinal nga Pulong. Tan-awa si Balaam, usa ka pagpanuis sa orihinal nga Pulong. Tan-awa si Zedekiah, usa ka pagpanuis sa orihinal nga Pulong.

Ug ang Biblia nag-ingon nga kining mga tawhana manungha, human ang pagtuis... aron sa pagtuis sa orihinal nga Pulong nga gipaluyohan ug gipanghimatud-an nga mao ang Kamatuoran.

¹⁴⁰ “Buhata ang bulohaton sa usa ka ebanghelista,” nianang dapita didto, “tumana ang imong buluhaton ingon nga ministro. Kay nagasingabut ang panahon nga dili na sila mamati sa matuod nga Pagtulon-an, hinonoa subay sa ilang kaugalingong mga pangibog magapaalirong sa ilang kaugalingon ug mga magtutudlo, nga magahapohap sa ilang mga nagakatol nga mga dalunggan; unya magapadayon ug magapatuyang pagbuhat sa bisan unsang butang nga ilang gusto, ug, ‘Maayo man kini, aduna na man kitay samang mga ilhanan ug mga katingalahan.’ Ug molingiw gikan sa Kamatuoran, ug madala ngadto sa mga sulugilanon, nga pagtulon-an sa tawo.”

¹⁴¹ Oh, ang pagpakasayud sa Espiritu Santo, ang kataha nga nagaigo sa kalag sa tawo sa dihang nagahunong siya aron pagpamalandong kung unsa ka tinuod ug katin-aw kini nga ania sa atong atubangan! Kaloton kanang batong patukurangan dinhi ug basahon ang usa ka papel nga ginabutang diha, katloan ug tulo na ka tuig ang milabay. Tan-awa kung unsay Iyang giingon sa dapit didto—didto sa Seventh Street, niadtong buntaga sa dihang kining maong batong patukurangan gipahimutang. Karon bantayi kini. Bantayi sa ubos dinhi sa suba, sa dihang ang Manulonda sa Ginoo mikanaug diha sa dagway sa Haligi nga Kalayo, gatusan sa mga kaiglesiahan, o mga tawo sa iglesia, nanagtindog palibot sa pangpang; kung unsa ang Iyang giingon, tan-awa kung kini ba nahitabo. Tan-awa kung unsay nahitabo.

Malisod kini kaayo. Nasayod ako nga kini morag malisod, mga kaigsoonan, nga anaa sa gawas. Apan kini maoy. . . Ang Biblia nag-ingon, si Jesus Mismo nagsulti, “Kini mopahisalaag sa sa Pinili kon mahimo pa.” Wala nay paagi niini. Dili gayud nila mahimong makita Kini. Kung mahimo pa, ang mga Pinili mapahisalaag pa niini.

¹⁴² Matikdi, kining mga tawhana nanungha human na nga ang matuod nga dinihogan sa Dios gipadala; pinaagi sa Iyang matuod nga profetang, si Moises. Ug sa dihang magabuhat si Moises ug bisan unsang butang, ilang sundogon kini.

¹⁴³ Karon, igsoong lalake, igsoong babaye, ako. . . Kini akong kaugalingon nga iglesia. Adunay akong katungod sa pagwali kung unsay akong gusto, basta gikan lang sa Pulong sa Dios. Ug wala ako nagahukom kaninyo nga mga tawo, apan atong susihon lang kana tungod sa panahon ug takna nga atong ginapuy-an karon.

Mga pangomusta alang kang Igsoong Ruddell, alang kang Junior Jackson, ug kanila nga anaa dinhi, atong igsoong mga kaiglesiahan. Nahikalimot ako kanila, kaganiha. Nagtoo ako nga sila nakakonekta niining buntaga, usab, tungod kay walay—wala nay lugar dinhi sa simbahan.

¹⁴⁴ Pamalandungi lang kini karon, sa makadiyut lang. Ilang nabuhat ang mao gihapong mga milagro nga gibuhat ni Moises. Si Moises nagpatungha ug mga pulgas; ilang nasundog kini ug nakapagula usab ug mga pulgas. Kita n’yo?

Ang Dios nag-ingon, “Sa adlaw nga mokaon kamo niini, nianang adlawa kamo mamatay.”

¹⁴⁵ Si Satanas mitungha ug miingon, “Sigurado, dili ka mamatay. Mamahimo hinoon ka nga makinaadmanon. Maaduna kay mas maayong organisasyon, usa ka mas maayong. . .” Nahibalo ka na. “Nasayud ka, nga ang tanan mahimong mas maayo alang kanimo, maaduna kay labaw pang Kahayag.” Kita n’yo, usa lang ka pagpanuis. Kinahanglan. . .

Ug hinumdomi, MAO KINI ANG GINAINGON SA GINOO, sumala sa Ikaduhang Timoteo 3:18, nga, “Sa katapusan nga mga adlaw, nga kining si Jambres ug si Jannes manungha sa yuta.” Karon, gusto ko nga inyong himatikdan nga adunay duha sila, kita n’yo, nga manunundog.

¹⁴⁶ Karon moadto kita pagbalik sa Sodoma, sa makadiyot lang, silang tulo, mahikaplagan silang tulo nga mga Manulonda nga milugsong, ug tan-awa ang pagpanundog, ug uban pa, kita n’yo, tan-awa kung hain ang husto ug sayup. Kita n’yo? Kita n’yo?

¹⁴⁷ Matikdi, ilang gibuhat ang samang mga milagro. Apan, matikdi, sila nanundog human nga ang matuod nga Pulong nadihogan na, pinaagi sa usa nga matuod nga gipadala sa Dios; nangsunod, pang-ikaduha.

Unsa kaha kung mapamalandongan nato sa makadiyut lang. Ginagunitan ang mga tawo sa kamut, dili pa dugay kaniadto, mga kaluhaan na ka tuig ang milabay, usa ka ilhanan nga gipakita. Aba, nagkaaduna nay daghang mga ilhanan sa tanan nang butang, ug ang tanan nang mga tawo. . . Ang usa anaa kini diha sa iyang toong kamut; ang usa anaa diha sa iyang wala nga kamut; ang usa pa ginapanimaho kini. Kita n’yo, tanan na nga matang sa. . . Ug unsa kaha. . . Dili buot sa Dios nga suginlan ko kamo niining higayona kung unsa gayud ang kamatuoran niini, apan sa usa ka adlaw mahibaloan ra ninyo. Kana igo lang nga ang ilang mga binuang mapadayag. Kana dili husto, sa sinugdanan pa. Sultihan ko kamo, usa ka adlaw, kung itugot sa Ginoo.

¹⁴⁸ Matikdi, ilang gibuhat ang samang mga milagro, apan wala sila. . . Matikdi, wala nila kini gibuhat hangtud nga ang orihinal nga Pulong nakagawas na, una. Mao kana nga paagi ang gibuhat ni Satanas sa tanaman sa Eden. Kana mao ang pamaagi nga iyang nabuhat sa tanang panahon. Kinsa man ang unang nagpanagna? Si Moises. Kinsa man ang unang nagatungha sa eksina, si Moises o si Balaam? Si Moises. Kinsa man ang unang nagatungha sa eksina, si Jeremias o si Hananiah? Nakita ba ninyo kung unsay akong buot ipasabot? [Ang kongregasyon nagaingon, “Amen.”—Ed.]

¹⁴⁹ Matikdi, ilang gikopya. Unodnon nga mga manunundog, matinuuron, nagadahum nga sila “nagabuhat ug bulohaton sa Dios,” maingon sa gibuhat ni David, sa miaging semana, apan unodnon nga pagpanundog. Nagapaabot lang ako sa makadali. Gusto ko nga inyong pamalandungan ang tali niining dapita. Kung dili ko kini ginasulti, sigurado ang Espiritu Santo igapadayag kini, ilabina ngadto sa mga Pinili. Kita n’yo?

¹⁵⁰ Ang denominasyon ni Faraon nagaingon, “Kami adunay tawo nga makahimo nianang samang butang,” ug ilang gibuhat kini. Kita n’yo? Nganong gibuhat man ni Faraon kini? Nganong gitugotan man sa Dios kini? Nganong mopadala man ang Dios

ug usa ka matuod, dinihogan nga profeta didto aron pagbuhat ug usa ka ilhanan sa atubangan ni Faraon, ug unya tugotan ang usa ka pangdenominasyon nga kopya sa pagtungha aron sundogon kini sa atubangan sa katawhan? Ngano man nga tugotan Niya ang usa ka manunundog motungha aron pagbuhat niini, ug buhaton ang samang butang nga tukma gayud sa matuod nga nabuhat na sa Espiritu sa Dios? Kita n'yo, ang Kasulatan kinahanglan nga matuman.

¹⁵¹ Matikdi, Iyang gibuhat kini aron Iyang pagahion ang kasingkasing ni Faraon ug mga Ehiptohanon, aron sa pagpamatuod nga si Moises dili kay mao ra ang bugtong nga adunay Pulong. Ilang mahimo ang tanang butang nga sama gayud sa mabuhat ni Moises.

Ug ngano man nga gitugotan sa Dios kining butang nga mahitabo niining katapusan nga mga adlaw? Sa ingon, mao rang butang sama sa bakakon nga espiritu nga nagsulti kang Zedekiah, “Unsaon man natong mapaadto si Ahab didto, aron matuman kining mga butanga?” Kung unsaon Niya paghaylo niining mga tawo, nga nagasalig sa ilang mga kaiglesiahanan, sa paggawas dinhi aron matuman kining maong butang, nga Iyang gitagna? Sila, niining Panahon sa Iglesia sa Laodicea, “Tungod kay ikaw naga-ingon nga ‘ikaw dato, ug walay nakulang. Ako nagalingkod ingon nga usa ka reyna.’ Walay nakulang! Wala ka ba nakahibalo nga ikaw makalolooy, alaut, buta? Ug tambagan Ko ikaw nga mopalit Kanako,” Siya miingon, “Iana ug bulawan.” Nganong gibuhat man Niya kini?

¹⁵² Nganong gitugotan man Niya kining pagpanundog nga motungha niining katapusan nga mga adlaw, sa dihang kining mga butanga nagakatuman na pinaagi sa matuod nga Pulong sa Dios; ug tugotan ang mga manunundog sa pagtungha ug buhaton ang samang butang, ug ipanghimakak ang matuod nga Pulong sa Dios? Iyang gibuhat kini alang kang Moises. Ug gibuhat kini ni Faraon batok kang Moises; ug kadtong, si Jannes ug si Jambres, gibuhat kini batok kang Moises. Ug ang Biblia nag-ingon nga kini mahitabo pag-usab sa katapusan nga mga adlaw. Ania na kita. Karon, kung dili kana ang Kasulatan nga natuman, hain man kini karon?

¹⁵³ Si Moises ba nakiglantugi kanila ug nagaingon, “Dinhi! Dinhi! Dili ninyo mabuhat kana. Ako lamang ang bugtong gikatudlo sa pagbuhat niana. Dinhi! Ihunong ninyo kana, karon dayon?” Gipasagdan lang niya sila.

Pasagdi sila pagpadayon. Hinumdomi, ang Biblia nag-ingon, “Kon unsa nga ang ilang binuang nadayag, mao man kini sila niining katapusang adlaw madayag usab,” sa dihang gisakgaw na ang Pangasaw-onon ug gidala na sa kawanangan. Matikdi.

¹⁵⁴ Si Moises, ang matuod nga nadayag nga Pulong, walay gisulti gayud bisan unsa, gipasagdan lang kini. Apan Iyang

gibuhat kana aron Iyang mapagahi ang kasingkasing ni Faraon, limbongan si Faraon.

Iyang gibuhat kanang samang butang aron Iyang malimbongan si Ahab. Ug katong gamay'ng lalake nga nagabarog didto nga nag-inusara, si gamay'ng Micheas, nagasulti kanila'g, "MAO KINI ANG GINAINGON SA GINOO." Ania mitindog ang usa pa, dinihogan, "MAO KINI ANG GINAINGON SA GINOO." Ug nagkasukwahi, ang usa sa usa.

¹⁵⁵ Kita nagabarug karon uban sa MAO KINI ANG GINAINGON SA GINOO, nga ang bautismo sa tubig niining katapusang mga adlaw mao sa Ngalan ni Jesus Cristo. Ug dunay usa pa ka tawo nagatindog ug nagapamuhat ug mga milagro, ug, usa ka nagatoo sa trinidad.

Ipakita kanako ang pulong nga *trinidad* sa Biblia. Ipakita kanako kon diin adunay tulo ka mga Dios. Ipakita kanako kon diin adunay mga butang nga ingon niana. Wala kini diha sa Pulong sa Dios. Walay ingon nianang butang nga si bisan kinsa nabautismohan sa ngalan sa "Amahan, Anak, Espiritu Santo," nga ginagamit kadtong mga titulo. Tanan kining mga butanga, "Oh, Puede ra man, mga igsoong babaye. Puede ra man na, pagpataas lang. . . ang imong hamubong buhok. Puede ra man kana, dili mo man kinahanglan buhaton pa *kini, kana, o ang uban pa*. Oh, wala kanay mga pulus, mga kinaraang tiniguwang."

Apan ang Biblia nag-ingon! Ug Iyang gisaad, "Sa katapusang mga adlaw, Iyang ipadala ang Espiritu ni Elias, ug pagatawgon ang katawhan, ang mga anak sa Dios, balik sa orihinal nga Pagtoo sama kaniadto sa sinugdanan, sa Pulong." Kanang Pulonga gipamatud-an, ang Anak sa tawo sa katapusan nga mga adlaw, sama kaniadto sa Sodoma; kagahapon, karon, ug hangtud sa kahangturan. Iyang gisaad nga buhaton kini. Saad kini sa Dios. Kini MAO KINI ANG GINAINGON SA GINOO.

¹⁵⁶ Matikdi, ilang gibuhat ang samang butang, maingon sa gibuhat ni Moises, hangtud nga ang Dios napuno na niini.

Karon hinumdomi, kini MAO KINI ANG GINAINGON SA GINOO, mamatuman kini niining panahona. Karon, susiha sa tibuok kalibutan; tan-awa ang matag kulto, tan-awa ang matag kaliwat, tan-awa ang matag tawo, tan-awa ang matag iglesia! Ginasugo ko kamo, sa Ngalan ni Cristo, sa pagbuhat niini, kamong mga magwawali. Ginasugo ko kamo pagbasa sa mga mantalaan o pamalandonga bisan asa mo moadto, ug tan-awa kung wala ba kini sa kalibutan mismo karon. Kita n'yo?

Kon ing-ana, ang Mateo 24:24 tukma gyud kaayo. "Mini, nga mga dinihogan manungha sa katapusang mga adlaw, ug mamahimong mini nga mga profeta, ug magapahisalaag sa daghan." Bantayi kini sa mga tipo karon, maingon nga ania kini

karon, kita n'yo, "Magapahisalaag sa daghan." "Mga profeta," dinaghan; "mga Cristo," mga dinihogan, dinaghan; daghang nagkalain-lain pa, ang Methodist, nasayud kamo, ug Baptist, ug ang Pentecostal, ug ang uban pa. Kita n'yo?

Apan adunay usa lamang ka matuod nga Cristo, Espiritu, ug mao kana ang Pulong nga nahimong unod sama sa Iyang gisaad kini nga buhaton.

Karon moisug ta ug diyutay pa, ngadto sa dugang pang mga Kasulatan.

¹⁵⁷ Hangtud, nga ang Dios napuno na niini, dayon kini tapus na. Ang ilang binuang nadayag na.

¹⁵⁸ Matikdi. Hinumdomi, ang tipaka kung tan-awon sama gayud sa lugas sa trigo. Kita n'yo? Karon, dili ka makaingon, didto balik sa panahon ni Luther, "ang lindog mao ang trigo," bisan niana anaa kini Kinabuhi. Ang lindog maayo man, ang Kinabuhi nga anaa sa lindog maayo man, apan, hinumdomi, ang maong Kinabuhi nagpadayon; nagpadayon gikan kang Eliseo ngadto kang Elias. Ang maong Kinabuhi sa gihapon nagapadayon. Apan, hinumdomi, kini anaa na sa laing hugna. Dili kini makapabilin diha nianang maong hugna. Dili kita makahimo pagkaon sa dunot nga unod nga iya sa laing panahon. Dili kita makakaon sa Pentecostal nga dubok, Methodist, o Baptist. Kita n'yo, kini usa na ka dubok. Adunay atong lab-as nga Pagkaon, ang Pulong niining taknaa, ug uban pa.

¹⁵⁹ Hinumdomi, ang tipaka pariha gayud nga sama sa lugas sa trigo. Dili ninyo. . . Dili kini ing-ana ka susama tan-awon sa dihang sa dahon pa kini, dili kini ing-ana ka susama tan-awon sa dihang sa uhay pa kini, apan sigurado nga susama na gayud kini tan-awon sa dihang nahimo nang tipaka. Dili sama nga tan-awon sa. . . Si Jesus Cristo mao sa gihapon kagahapon, diha kang Luther; dili sama tan-awon diha kang Wesley; apan kini sigurado diha sa Pentecostal, ang "pagpahisalaag sa Pinili kung mahimo pa." Kita n'yo? Kana ang inyong mga kapanahonan.

¹⁶⁰ Apan hinumdomi, kanang Pentecostal nga iglesia, sa katapusan nga mga adlaw, mao ang Laodicea; ug si Cristo napagawas, ang Lugas, ang Trigo, Mismo. Sa dihang Iyang gisulayan. . . Hinumdomi, sa dihang Iyang gisulayan pagpadayag sa Iyang Kaugalingon diha sa iglesia, Siya gipagawas. Usa pa gihapon kadto ka iglesia, nagaangkon nga mao; dinihogan.

Apan *ania* ang Pulong, si Cristo Mismo, kana mao ang dinihogang Pulong nga moabot alang sa uban pa sa Iyang Lawas, ang Pangasaw-onon. Ang dinihogan, sa mao ra nga tubig nga nagbisbis sa trigo, sama sa atong gihisgotan, ang mao ra usab nga nagabisbis sa mga bunglayon, mga dinihogan. Ang mga Pinili lang, o ang gikabut-an nang daan, mao ra ang makahimatikud sa

kalainan tali kanila. Karon, sa Mga Taga Efeso 5:1 nagasugilon kaninyo sa ingon, ug bahin sa kung unsa kadto.

¹⁶¹ Sila mga dinihogan. Ang matag-usa nagaingon, “Himaya sa Dios! Aduna kitay kagawasan dinhi. Hallelujah! Kami... Oh, hallelujah! Nanagpanulti ta ug laing mga dila, ug nanagpanglukso. Adunay atong kagawasan sa mga kababayan-an; kamong mga tawo nga nagapaninguha pagpailalum kanila niining tanan matang sa mga butang.” Kita n’yo? Padayona n’yo. Wala namay lain inyong mahimo. Magaingon, “Bueno, nagapanulti kami ug laing mga dila. Nanagsinggit kami. Nanagpanayaw kami diha sa Espiritu. Nagapangwali kami ug Pulong.” Walay duhaduha. Wala ni usa ka butang ang masulti batok niini. Mao usab niining mga tawhana dinhi kaniadto sa Biblia.

Si Jesus miingon, “Kini magapahisalaag sa Pinili gayud kung mahimo pa, ang Pinili gayud.”

¹⁶² Karon matikdi ang tipaka. Gikan sa orihinal nga Lugas, ang Lugas nga nahiadto sa yuta, dili Kadto organisasyon. Usa Kadto ka Lugas, sa Kaugalingon niini. Apan sa dihang mitubo kini, dili kadto usa ka Lugas; usa na kadto ka organisasyon, kita n’yo, mga dahon, lagas.

Dayon mipaingon Kini ngadto sa usa pa ka hugna, nga mao ang uhay. Sa gihapon kini dili sama sa sinugdan. Usa kadto ka organisasyon.

Mipaingon kini ngadto sa tipaka, daghang mga dahon, Pentecostes, hapit na mamao ang dagway karon. Tan-awa kini. Kini kanunay nagakabag-o ang dagway, hapit na tukma magkapariha, hapit nga mao ra sa usa ka Lugas sa trigo kung inyong tan-awon kanang gamay’ng panit diha.

Apan sa katapusan Kini napadayag na, ug walay organisasyon. Wala na ang mga tighatud. Ang organisasyon usa ra ka tighatud. Wala nay mga tighatud; ang lindog kinahanglan nang mamatay, ang tipaka kinahanglan nang mamatay, ang tanan kinahanglan nang mamatay, apan ang trigo nagapadayon nga buhi. Kana mao ang lawas sa pagkabanhaw, mokanaug ug puniton sila. “Sila nga naulahi mahiuna, ug sila nga nahiuna maulahi.” Kita n’yo, pagapuniton sila diha-diha sa pagkabanhaw. Ginasundan ba ninyo kini? [Ang kongregasyon nagaingon, “Amen.”—Ed.] Bueno. Matikdi, ang lugas maoy...

¹⁶³ Ang tipaka sama gayud sa lugas tan-awon. Ug ang usa tawo nga nagaatiman sa usa ka uma sa trigo, o uban man nga lain, motan-aw ug moingon, “Dalaygon ang Dios, aduna nay akong tanum nga trigo,” sa dihang wala pa siya bisag usa ka lugas sa trigo. Mora ug tan-awon ra kini nga sama gayud sa trigo, apan kini ang tipaka.

¹⁶⁴ Karon, mga higala, balik uban kanako. Asa man ang una nga rebaybal miabot, human (sa kamatayon) sa mga adlaw

nga ang lugas sa trigo kinahanglan mahulog diha sa yuta, ang Lawas, ang Pangasaw-onon ni Cristo? Inorganisa ni Cristo ang Iyang Pangasaw-onon, husto ba kana, ang Iyang Iglesia? Wala gayud Kini Niya giorganisa; Nagpahimutang lang Siya ug mga apostoles, ug mga profeta, ug uban pa, sa Iglesia, aron nga Kini magpabilin nga hinlo. Apan didto sa Nicaea, sa Roma, tulo ka gatus ug unom ka tuig human niadto, ilang giorganisa kini ug nagbuhat ug organisasyon gikan niini. Husto ba kana? Ug namatay kini. Ang tanan nga dili miuyon niadtong maong iglesia gipatay. Ug nagpabilin kini, sa gatusan ka mga katuigan, sa yuta.

Apan, paghuman sa pipila ka panahon, mitubo siya diha kang Luther. Ang unang gagmay'ng mga turok sa lugas migitib. Ang ikaduha, kini miudlot gikan didto. Nanagpadayon sila, anaa si Zwingli ug uban pa, ug ang uban pa nga mga organisasyon ug uban pa. Unya, sa pipila ka panahon, subay niini miabot ang Anglican.

Ug unya unsay nahitabo? Ania miabot si Wesley subay sa usa ka bag-ong rebaybal, ang uhay, nga kung tan-awon mas mora na ug Trigo diyutay. Dayon unsa man ang nahitabo niana? Nag-organisa kini, ug nauga ug namatay.

Ang maong Kinabuhi mipaingon dayon sa tipaka, ug ang tipaka mitungha nga mora na gayu'g Trigo. Apan, sa katapusan, ang kabuang niini nadayag ra sa ulahing walo o napulo ka katuigan, ilabina diha sa kaulahiang tulo ka tuig niini. Karon unsa man ang ginahimo niini? Nagapahilayo gikan sa Trigo.

¹⁶⁵ Karon nganong wala pa may usa ka organisasyon nga nasugdan sulod niining katapusang kaluhaan na ka tuig alang niining dakung rebaybal; kini mga dinihogan nga profeta, dinihogan nga mga magtutudlo, ug uban pa, apan nganong wala man? Wala namay mosunod pa sa Lugas. Kita n'yo, Kini mibalik na, nga walay organisasyon. Oh, na, ang usa ka buta nga tawo makakita niana. Dili kini makahimo pag-organisa; Hugot ang pagsupak Niini batok niini. Kini mao ang lugas sa Trigo, Mismo. Ang Anak sa tawo madayag na. Ang lugas sa Trigo magabalik sa Iyang Kaugalingon pag-usab, ang Anak sa tawo sa katapusang mga adlaw.

“Ug adunay mangabot nga mini, mga pagpanundog Niini, sa katapusang mga adlaw, nga halos mopahisalaag sa Pinili kon mahimo pa.” Tan-awa ang ilang mga organisasyong tipaka nagabu wag na karon.

¹⁶⁶ Ginapadayag lang niini ang Trigo, ngadto sa Pinili, nga mga kabahin Niini. Matikdi kung unsa ang pagkatahum niining gidala dinhi karon. Ang bugtong . . . Matikdi, ang mga dinihogan makahimo; ang matuod, mga Pinili, mga gikabut-an nang daan, Mga Taga-Efeso 5:1, o 1:5, diay, ang igatudlo, pinili. Sila mao ra ang bugtong nga dili mapahisalaag.

Matikdi, ang mga dinihogan nga mga profeta mamahimong mini, ug anaa diha sa ilang taliwala ang mahimong tinuod nga dinihogan. Unsaon man ninyo pag-ila niini? Pinaagi sa Pulong. Sama, nga anaa kita niini diha sa anino. Nakita ba ninyo kini? Ingon, “Amen.” [Ang kongregasyon nagaingon, “Amen.”—Ed.] Kita n’yo?

¹⁶⁷ Matikdi, ang mga dinihogan, ang Pulong lang maoy makahimo pagpalain kanila, dili ang mga ilhanan. Oh, dili. Buhaton nila ang mao ra nga mga ilhanan, apan ang Pulong mao kon unsa ang nagpalain kanila. Sigurado. Silang tanan nagpanagna. Ilang tanan nahimo *kini, kana*, ug ang *uban* pa, sigurado, nga pariha ra. Si Jesus miingon nga ilang buhaton ang samang butang. Apan ang Pulong mao kon unsa ang nagpalain kanila, matikdi, dili mga ilhanan.

¹⁶⁸ Namatikdan ba ninyo? Si Jesus nag-ingon dinhi, sa Mateo 24. Wala niya ingna, “Adunay magapanungha nga mini nga mga Jesus sa katapusang mga adlaw.” Oh, dili, dili gayud sila motugot pagatawgon niana. Dili. Kuha ka ug usa ka Pentecostal kanang usa ka tinuod gayud nga Pentecostal, moingon, siya mismo, siya mao si “Jesus”? Kita n’yo? Kuha ka ug usa ka mini nga Methodist, o usa ka Baptist, o tawo nga ingon niana, o usa sa mga organisasyon, moingon, “Kami mga Jesus”? Mas nahibalo pa man sila niana. Dili nila buhaton kana. Apan ang Biblia nag-ingon sila mahimong mga “mini nga mga Cristo,” dili mga Jesus, kondili, “mini nga mga Cristo.” Dili nila ilhon, moingon, “Ako mao si Jesus.” Oh, dili.

¹⁶⁹ Apan sila mga “mini nga mga Cristo,” ug wala mahibalo niini, tungod kay sila mga sukwahi man sa Pulong. Ug ang Dios nagapaluyo sa mga mao ra gihapon. Karon, igo ko lang ginadala kini diha sa usa ka pakigsangka karon, tungod kay nakita na ninyo ang mao rang butang nga nabuhat na niining mga tawhana nga nahimo na diha sa matuod. Ug si Jesus nag-ingon niana.

¹⁷⁰ Karon, sa ako nang gikaingon, karon kaninyong mga katawhan diha sa gawas, nagapaminaw diha sa telepono, ako—ako wala nagahukom kaninyo, apan kini mao ang akong iglesia ug—ug akong pundok nga gitugyan kanako sa Espiritu Santo, ug kinahanglan nga isulti kanila ang Kamatuoran. Ang takna nagkahinapus na.

¹⁷¹ Karon, dili sila makatugot nga tawgon niana, apan, “mini nga mga Cristo,” mini, mga dinihogan, halos uban sa matag ilhanan ug matag sinulat sa Pulong. “Sila nagatoo sa bautismo sa Espiritu Santo?” Sa walay duhaduha. “Nagatoo *niining* tanan?” Oo. “Nagatoo sa pagpanulti ug laing mga dila?” Oo. “Nagatoo sa mga ilhanan ug mga katingalahan nga naganunot, ang mga ilhanan maganunot kanila?” Oo. Dili kana ang mga Methodist, dili kana ang mga Baptist. Dili, dili. Kana mga Pentecostal. Kita n’yo, mao na kini ang katapusang mga adlaw.

Karon, ang unang panahon sa iglesia wala gayud nakamatikod niana. Ang panahon sa Methodist nga iglesia wala gayud nakamatikod niini; ang panahon sa iglesia sa Baptist, wala gayud nila namatikdan kini; ang panahon sa Presbyterian nga iglesia, wala gayud sila nakamatikod niini. Apan, ang Pentecostal, haduol kaayo sama sa matuod nga maong Butang! Mao kana diin, ang Trigo, ang tipaka hapit na kapariha sa Trigo. Dili gayud nila kini himatikdan. Kita n'yo? Dili gayud. Apan kini mao na ang katapusang mga adlaw, kining adlaw. Oo, sir.

¹⁷² Matikdi, sama kini kaniadto sa sinugdanan, maingon man kini usab sa katapusan. Maingon nga gisayup pagsabut ni Eba ang usa ka Pulong, gibuhat ni Satanas ngadto kang Eba, ug iyang gitoohan kini. Ang babaye, dili ang lalake; ang iglesia, dili Siya. Kita n'yo? Ang iglesia mao ang usa nga nagkaadunay mini nga pulong. Kita n'yo? Dili si Adan; si Eba. Dili ang Cristo; ang iglesia, ang pangasaw-onon, ang dinihogan, ang mao unta, nagatawag sa iyang kaugalingon nga Pangasaw-onon, kita n'yo, nagkaaduna siyay mini nga pulong.

Dili ba ninyo makita kana? Aba, kini nagalambid pag-uban sama sa higot sa sapatos, sama sa mga pilok sa inyong mata. Aba, ang tanan nga inyong lingian, sa Biblia, Ginagahigot lamang Niini kini pagdungan. Si Eba, dili si Adan; si Eba ang nagtoo niini, dili si Adan. Ang pangasaw-onon karon, nga gapatawag, mitoo niini; dili ang Cristo. Ang pangasaw-onon adunay tanang matang, ang gapatawag nga pangasaw-onon; mao ra nga mga ilhanan, mao ra nga mga katingalahan, mao rang tanang butang; apan dili ang maong Usa nga matuod. “Magpahisalaag sa Pinili kon mahimo pa.”

Karon sa pagdali, kon mahimo nato sa pagtapus niini sulod sa napulog lima ka mga gutlo, mamahimo tang mosibo sa takna. Matikdi ug maayo karon, aron nga dili kamo—dili kamo masayup pagsabut, alang kaninyo.

¹⁷³ Karon, dili, dili nila matugotan nga pagatawgon “mini nga Jesus.” Dili nila mahimo, matugotan nga tawgon, “Jesus.” Siguradong dili. Klaro ra kaayo. Si bisan kinsa makahibalo niana. Si bisan kinsa mahibalo nga sila dili si Jesus. Dili ko igsapayan kon adunay ilang lana diha sa ilang likod, ug dugo diha sa mga kamut ug sa taas-ug-ubos sa ilang mga mata, sa gihapon sila nahibalo nga kini... Ang si bisan kinsa nga tarung, nahibalo nga kini dili si Jesus. Kita n'yo? Dili nila matugotan kana. Apan ilang ginatawag ang ilang kaugalingon “ang dinihogan.” Ug sila nagapamuhat ug mga ilhanan ug mga katingalahan, “aron halos ipahisalaag ang Pinili.” “Apan mini nga mga Cristo, mga dinihogan, magapanungha, ug magapahisalaag sa Pinili kon mahimo pa.”

174 Karon bantayi pag-ayo. Ayaw'g pakyasa kining maong pamahayag, tungod kay kini angay'ng paminawon.

Ginapahimutang lang niya ang mga teyp dinhi sa micropono, aron dili kini manglupad. Kaganiha pa ako gipaningot; nagtulo diha sa teyp, nakita ninyo.

175 Ug busa magakaanggid gayud kini sama Niini, ang Biblia, nag-ingon nga maingon niini. Kita n'yo?

176 Matikdi, dili mini nga mga Jesus. "Mini nga mga Cristo!" Sila nagatoo nga sila mga dinihogan, apan nasayud sila nga dili sila si Jesus. Kita n'yo, tin-aw ra kaayo kana. Kon ang tawo mitungha ug miingon, karon, "Tan-awa ang mga ulat sa akong kamut. Tan-awa ang akong kilay. Ako mao si Jesus." Bueno, karon, kita nahibalo nga sayup kana. Ug, hinumdomi, si Jesus wala gayud nag-ingon nga silang mga tawhana magapanungha. Siya miingon nga adunay magapanungha nga "mini nga mga Cristo." "Mga Cristo," dinaghan, mga denominasyon, ug uban pa, *mga dinihogan*; dinihogan sa espiritu sa denominasyon, ug dili sa Pulong. Ginasundan ba ninyo kini? Dili mini nga Jesus. "Mini nga mga Cristo," mini, nga mga dinihogan. Kita n'yo? Oh, unsa katin-aw! Unsaon nato. . . Siguradong dili kini ninyo mapakyas!

177 Karon, hinumdomi, kanunay ako nag-ingon kaninyo nga adunay tulo ka matang sa mga tawo. Adunay tulo ka kaliwatan sa mga tawo; Ham, Shem, ug Japheth, tulo ka mga kaliwatan. Tulo ka matang, ug ako nag-ingon, nga mao kana ang magtotoo, nagpakaaron-ingnon nga magtotoo, ug dili-magtotoo. Kini ingon na kaniadto pa, maingon gayud gihapon. Kita n'yo? Didto si Moises, ang magtotoo; didto si Jannes ug Jambres; ang dili mga magtotoo. Kita n'yo? Didto si Balaam; Si Moises. . . Kanunay ang kanang tulo ka matang sa mga tawo, tulo ka matang; magtotoo, tigpakaaron-ingnon nga magtotoo, ug dili-magtotoo.

178 Karon hinumdomi, ang dili-magtotoo, ang iglesiang iya sa denominasyon, wala man lang nagatoo sa bisan unsang ilhanan; bugnaw, pormal, tuskig, ang iglesia sa kalibutan, ang denominasyon. Apan ang nagpakaaron-ingnon nga magtotoo mao kana ang tipaka. Mao kana ang tawo nga nagapatoo-too. Ug unya adunay tinuod nga magtotoo nga matuod gayud. Karon, bantayi sila samtang nga nagapadayon sila karon, sa makadiyut lang.

179 Ug matikdi kung unsa kapangahason kining mga dili-magtotoo, o kining mga nagpakaaron-ingnon nga magtotoo ug dili-magtotoo. Na! Mga mapangahason sila, tan-awa, bisan pa gani si Satanas nga mibarog mismo sa Atubangan sa matuod nga Pulong, ug miingon, "Kay nahisulat man!" Husto ba kana?

Nganong gibuhat man ni Satanas kana? Kay tungod nga wala siya nahibalo sa Pulong alang niana. . . Siya nahibalo sa Pulong alang niadtong taknaa, apan iyang giduhaduhan

kining mapaubsanon nga gamay'ng Tawo ingon nga mao kanang Pulong. “Kon Ikaw Anak man sa Dios. Nahibalo ako nga ang Anak sa Dios moabot, tungod kay Kini nag-ingon nga Iyang pagabuhaton kana. Ug nahisulat kini, ‘Siya magahatag ug sugo sa Iyang mga Manulonda aron pagbantay Kanimo.’ Kita mo? Pamatud-i kini kanako! Pagbuhat ug usa ka milagro! Pakitaa ko nga ginabuhat Mo kini.” Kita n’yo? Kita n’yo?

Kita n’yo, ang dili-magtotoo, nagapakaaron-ingnon nga magtotoo, manunundog. Tan-awa si Judas mismo sa ilang taliwala, sa mao ra nga panahon, nagpakaaron-ingnon nga magtotoo! Kita n’yo? Matikdi, ug didto ang matuod nga Pulong.

¹⁸⁰ Daw unsa sila kamapangahason! “Karon, ayaw paghatag ug bisan unsang pagtagad nianang walay kapuslanan. Wala ra kana. Ayaw pag-adto didto. Usa ra kana katapok sa kasaba. Walay anaa diha Niana. Tinumotumo lang Kana tanan. Sa imong hunahuna ra Kana.” Kita n’yo, nakita ninyo kung unsay akong ipasabot? Motindog mismo diha sa Atubangan sa Pulong ug moingon niini.

¹⁸¹ Si Satanas mianha mismo. Sama sa giingon sa Biblia sa Judas, “Bisan ang Arkanghel, sa dihang nakiglantugi kang Satanas, miingon, ‘Ang Ginoo magabadlong kanimo.’” Batok sa Pulong Mismo!

Ug ania ang anticristo, ang dinihogan, nagatindog mismo dinhi batok sa tinuod nga Pulong sa maong adlaw, si Jesus Cristo, ug miingon, “Nahisulat na.”

¹⁸² Tan-awa ang katapusang mga adlaw. “Kini magkahiduo! kaayo nga mopahisalaag sa Pinili kon mahimo pa.” Oh, sus! Ang hinungdan nga ang Pinili dili mapahisalaag, nasayud ba kamo kung ngano? Tungod kay sila mao ang Pulong. Kita n’yo? Sama gayud sa maong Kinabuhi nga anaa sa gamut, naingon ko na dili pa lang dugay, dili malimod Niini ang Kaugalingon. Kita n’yo, Kini mao ang Pulong ug diha sa panahon sa Pulong. Husto kana.

¹⁸³ Sama kang Jeremias, siya nahibalo. Bisan pa kon unsa ang giingon Hananiah, siya nahibalo kung asa gayud siya. Mao kana ang tukma nga sama sa gibuhat ni Moises, ug—ug ang uban pa kanila. Kana mao, iyang nahibaloan, bisan kung unsa pa ang giingon sa mini nga profeta, didto atua ang Pulong sa Dios. Kini nahisulat na.

Mao kana ang hinungdan nga si Micheas nakaingon, “Sige, paghulat lang kamo ug tan-awa.”

Si Ahab miingon, “Ako nagatoo sa akong mga profeta. Ang akong organisasyon husto. Sa akong pagbalik diha sa pakigdait. . . Ibanlod kanang tawhana didto sa bilangoan. Ako na ang bahala kaniya! Hatagi siya ug tinapay sa kagul-anan. Isalikway siya, ayaw man lang kamo pagpakig-tipon uban kaniya. Sa akong pagbalik diha sa pakigdait, kita na bahala nianang tawhana.”

184 Si Micheas miingon, “Kung makabalik ka pa, ang Ginoo wala magsulti kanako.” Siya nasayod nga aduna siyay MAO KINI ANG GINAINGON SA GINOO, ug ang iyang pananawon tukma gayud uban sa MAO KINI ANG GINAINGON SA GINOO; dili sa kung alang sa uban nga panahon, kondili alang nianang panahona. Amen! Hallelujah! Ang maong panahon!

185 Mapangahason, nagabarug ug nagapakiglantugi sa usa ka Arkanghel! Kini gikaingon na, nga, “Ang mga buang-buang nga suot ang linansangan nga sapatos magatunob diin mahadlok gani ang mga Manulonda paglakaw.” Husto kana.

186 Ang hinungdan nga ang Pinili, si Jesus miingon, dili mapahisalaag, tungod kay sila mao kanang Pulong. Sila dili mamahimo nga uban pa. Dili sila makapaminaw ug uban pa. Wala na silay nahibaloan nga uban pa. Husto kana.

Hinumdomi, si Moises wala nadala sa tanan nilang mga pagpanundog. Nadala ba siya? Si Moises miingon, “Karon, paghulat sa makadiyot lang, Faraon. Nasayod ka ba kung unsa? Ang Ginoo nagsulti kanako sa pagbuhat niini, apan, himaya sa Dios, akong nakita nga ang imong mga kalalakenan makahimo sa samang butang. Ngani, pagsulti kung unsay akong pagabuhaton, makighiusa ba ako kanimo?” Huh! Morag dili kana profeta sa Dios kung paminawon. Dili, gayud! Siya mibarug nga hugot gayud kutob sa iyang mahimong pagbarug. Siya nasayod, sa tukma gayud, nga ang Dios pagaatimanon ra kini bisan unsaon pa, tungod kay Iyang gisaad. “Ako magauban kaninyo. Dili Ko kamo biyaan.”

187 Siya nasayod, mao nga wala siya nakighiusa kanila. Oh, dili. Siya nagpabilin mismo uban kanila. Dili niya gusto ang bisan usa sa ilang mga denominasyon. Siya nagpabilin mismo uban sa Dios. Wala siya nadala sa tanang mga butang nga ilang mahimo. Sa dihang nagbuhat sila ug usa ka butang. . . Siya nagpagula ug mga kuto; sila nagpagula ug mga kuto. Siya nagpagula ug dugo; sila nagpagula ug dugo. Iyang gipagula na ang matag butang; ilang gisundog siya sa matag paagi, subay mismo. Nagpabilin lang siya sa gihapon. Siya nasayod gayud sa tukma kung unsa. Ang Dios mao ang nagapamuhat.

Nasabtan na ninyo karon? [Ang kongregasyon nagaingon, “Amen.”—Ed.] Pagkuha’g duha ug duha, ug mahimong upat? [“Amen.”] Dili man gusto ninyo mainitan pa pag-ayo. Busa, busa inyo—inyong sabton, kita n’yo.

188 Ngano man? Dili sili mapahisalaag niini. Ang matuod nga magtotoo, sila mga Binhi nga Gipili nang daan nga magabarug gayud sa maong adlaw.

189 Mao, usab, si Jesus nag-ingon niini, “Daghan ang magaduol nianang adlawa, sa Akong Ngalan, ug moingon, ‘Ginoo, wala ba ako nagpagula ug mga yawa sa Imong Ngalan?’” Si Jesus miingon, “Sa katapusang mga adlaw, sa dihang ang panahon

matapos na tanan ug ang dakung pagkabanhaw moabot, nga daghan ang magaduol ug molingkod sa Gingharian.” Ang Gingharian sa Dios anaa sa sulod ninyo.

Daghan, ang mga sagbot magaduol ug magapanglingkod mismo kauban sa Trigo, moingon, “Karon, sa makadali lang, Ginoo! Nagsulti ako ug laing mga dila. Nakasinggit ako. Nagsayaw ako sa Espiritu. Nanghingilin ako ug mga yawa. Nagsulti ako sa laing mga dila. Nabuhat ko na kining tanang mga butanga.”

Unsa may Iyang igaingon? Matikdi. “Kamong mamumuhat ug kalapasan, wala gani Ako nakaila kaninyo.”

¹⁹⁰ Unsa man ang *kalapasan*? Pangutan-a ang usa ka tawo. Kini “ang usa ka butang nga imong nahibaloan nga imo kinahanglan pagabuhaton, ug dili mo kini buhaton.” Nahibalo sila nianang Pulonga. Ilang nadungog Kini. Nagapaminaw kamo niining teyp. Nagapaminaw kamo niining Mensahe. Inyong nakita nga ang Ginoong Dios nagsulti sa ingon; inyo Siyang nakita nga nagapanghimatuod niini, ginapamatud-an kini. Ug nahibaloan ninyo Kini sa ingon kaklaro sama sa adlaw nga nagadan-ag diha sa gawas, apan kamo nga nagakupot sa inyong denominasyon, nagahupot diha nianang mini nga mga butang; kamo nga mamumuhat ug kalapasan!

“Oh, oo, adunay akong dagkung mga tigum. Nabuhat ko *kini*. Nabuhat ko *kana*.”

Miingon, “Pahilayo kamo gikan Kanako, kamo nga mamumuhat ug kalapasan, wala ako makaila kaninyo.”

¹⁹¹ “Bueno, ang Espiritu Santo mikunsad kanako.” Wala ako magduhaduha niana bisan gamay. “Ako nakasulti ug laing mga dila. Nakaawit ako diha sa Espiritu. Akong nabuhat. . .” Wala ako magduhaduha niana bisan diyutay. Walay malalis niana. Oh, igsoong lalake, igsoong babaye, unsa mang matanga sa kahimtang!

Mao na kini ang kuyaw nga panahon. Asa na kita karon? Kining Pulong nagapaingon na sa Kinabuhi karon. Matikdi.

¹⁹² Oo, Siya nag-ingon nga ilang buhaton kana. Matikdi, “Kamo nga mamumuhat sa kalapasan.” Aniyay akong usa ka Kasulatan nga nahisulat dinhi. Wala ko mahibalo kung hain na kadto. Daku nang panahon ang akong nagamit. Pangitaon ko kini, sa makadiyut lang, ug tan-awon kung unsa kadto. Ako adunay—ako adunay nahisulat nga Mateo 7:21. Ako—ako wala lang mahibalo kung hain na. Ako, usahay ako dili nagasulat ug butang nga uban niini, bueno, ako—ako nagawali ingon niini, akong—akong malimtan kung unsay akong ginapunting diha nianang Kasulatan. Mateo 7:21.

Dili ang tanan nga nagaingon kanako, Ginoo, Ginoo, makasulod sa gingharian sa langit; kondili ang

nagatuman sa kabubut-on sa akong Amahan nga anaa sa langit.

Daghan unya ang magaingon kanako niadtong adlawa, Ginoo, Ginoo, dili ba nanaghimo man kamig profesiya . . .

Mga profeta, mga dinihogan! Husto kana? “Dili ba mga profeta man kami? Dili ba mga dinihogan man kami, usa ka dinihogan? Wala ba ako nagpanagna sa Imong Ngalan? Ug sa Imong Ngalan wala ba ako naghingilin sa mga yawa?” Unsaon man nga imong mabuhat kana, ug magdumili sa pagpabautismo sa Ngalan ni Jesus? Kita n’yo? Oh, sus! Tan-awa kung unsa ka malimbungon? Nahiabot na nianang maong punto mismo, dayon mahulog pabalik. Sila paingon na ngadto sa Pulong, dayon mahulog pabalik. Karon bantayi kini. Atong ipagawas kini, sa makadiyut lang.

Daghan unya ang maga-ingon kanako . . . Ginoo, Ginoo, dili ba kamig nanaghimo man ug profesiya, mga profeta kaming daan? . . .

Oo, ako nang gihisgotan kana sa Mateo 24:24.

. . . ug sa imong ngalan . . . nanagpagula ug mga yawa? ug sa imong ngalan nakahimo sa daghang kahi . . . daghang mga buhat?

Ug unya magaingon ako ngadto kanila, wala ko gayud kamo igkaila: pahalayo kanako, kamo nga mamumuhat ug kalapasan.

“Sa dihang Kini gipahimutang na diha sa inyong atubangan ug nakita ninyo Kini, ug nakita Kini nga nagapanglihok, nakita na nga Kadto mao ang Pulong; ug tungod sa katuyoan sa inyong denominasyon, kamo nanghawid na lang diha niini. Wala gani ako makaila kaninyo. Dili ko igsapayan kon unsa pa ka daghang mga yawa ang inyong napagula, kon unsa man ka daghan ang inyong nabuhat *niini* ug *niana*; wala akoy nahibaloan bahin kaninyo.”

Si Balaam nag-ingon, “Ako nagpanagna mismo, sa Imong Ngalan. Kini nahitabo.”

¹⁹³ “Husto kaayo kana, apan, sa pag-abot na sa Pulong, nagdumili ka Niini.”

Oh, igsoon, nakita ninyo ang malimbungon nga bahin? Dili “profeta,” gayud; kondili sa Pulong, matuod nga Pulong, ang gipanghimatud-an nga Pulong nga napadayag. “Kamo nga mamumuhat ug kalapasan!”

¹⁹⁴ Sulayi, si Satanas naningkamot sa tanang kapanahonan sa pagsundog sa matuod nga Pulong. Nahibalo kita niana, dili ba?

¹⁹⁵ Matikdi, nahiabot na ngadto sa utlanan ug miundang. Tan-awa dinhi, Siya miingon, sa Mga Hebreohanon ang ika-6 nga

capitulo, karon, atong gibasa dili pa lang dugay. Gisulti ko kaninyo ang pagbalik ngadto niini, ug atong buhaton sa sunod nga pipila ka mga gutlo. Siya miingon:

... apan ang mga sampinit ug mga kudyapa... nga hapit na ngadto sa pagkasalikway; nga ang katapusan niini mao ang pagkasunog. (Hangtud ra sa utlanan!)

... kamo nga nakatitaw na... sa langitnong gasa, ...

“Nakatitaw na,” sa laing pagkasulti, nakita na ninyo Kini! Dili lang ninyo [Pinapiti ni Igsoong Branham ang iyang mga ngabil pagdungan—Ed.] ginatitawan Kini pinaagi sa inyong baba. Apan nakita gayud ninyo Kini, ug kamo nahibalo nga Kini mao ang Kamatuoran. Nahibalo na kamo nga Kadto mao ang Kamatuoran. “Nakatitaw na sa Langitnong gasa.”

... ug nahimo nang mga umalambit sa Espiritu Santo, maingon nga Kini mikunsad diha kaninyo,

... nakatagamtam na sa pagkamaayo sa pulong sa Dios, ...

“Nakatitaw na,” inyo nang nakita Kadto nga husto. “Ug ang Espiritu Santo nga nagakunsad diha kaninyo,” ang sagbot sa uma.

... ug dayon nanagpamiya, ...

“Ginapanghimakak ang maong Cristo nga nagpabalaan kaninyo, ug nagtawag kaninyo, ug nagbutang nianang dihog diha kaninyo.”

... wala nay nahibilin pang halad alang sa sala, tungod niana.

Kini dili na mapasaylo! “Dili na gayud mahimo alang kanila ang paghiabut ngadto sa kahibalo sa Kamatuoran.”

Tungod kay dili na mahimo alang kanila kinsa... nahimo nang mga umalambit sa Espiritu Santo,

Mikunsad diha sa mga sagbot, kita n’yo, “Nakasugod na diha kang Jesus, ug, ‘Ginoo, mopadayon gyud ko,’” apan sa dihang imong mapunting ang Pulong, ikaw nagabalik. “Nahimong mga umalambit sa Espiritu Santo, ug nakatitaw pa gani, o nakita na ang Pulong Mismo nga napadayag.” Ug unya mitalikod gikan Niini, “Kini dili na gayud mahimo alang kanila nga makita pa gayud Kini o makaduol pa Niini.”

Kana ang MAO KINI ANG GINAINGON SA KASULATAN. Karon, kamong. . . “Ang mga Langit ug yuta mangahanaw, apan Kini dili.” Nakita ba ninyo kini? “Dili na gayud mahimo.” Ang Biblia nag-ingon niini, ug ang Espiritu nagasaksi niini.

¹⁹⁶ Matikdi, hatagan ko kamo ug gamay’ng panag-ingnan. Tan-awa kadtong mga katawhan nga ninggawas ilalum sa panagna ni Moises, ninggawas gikan niadtong organisasyon, ug ninggawas gikan sa tanang butang, ilalum sa panagna, nakita

ang gamhanang mga buhat ug mga katingalahan, ug mga butang sama niana, ug nahiabot na sa utlanan aron sa pagsulod na.

Karon, Lee, diha na nagasulod ang imong “ngalan sa Libro.” Kita mo? Imo nang napahiluna kini. Ug kamo nga wala dinhi, ug sa gawas diha sa—diha sa mga nakakonekta, si Doktor Lee Vayle kini nga nagalingkod dinhi. Iyang ginapasubay sa gramatika kining libro sa Pito Ka Kapanahonan Sa Iglesia. Ug ang problema miabot, o ang pangutana, mahitungod sa inyong “ngalan nga papason gikan sa Libro sa Kinabuhi sa Cordero.” Kita n’yo, kini nakapalibog ug maayo sa daghang mga ministro. Apan hulata hangtad nga makuha ninyo ang libro, mahisabtan ninyo kini kung aduna may Kahayag diha kaninyo. Kita n’yo?

¹⁹⁷ Matikdi, karon, inyong ilingiw ang inyong ulo ug dili gani motan-aw Niini kon dili ninyo gusto motan-aw Niini. Sama sa ginasulti sa akong inahan kaniadto, “Dili ka makakuha ug dugo gikan sa usa ka singkamas, tungod kay walay dugo diha niini.”

¹⁹⁸ Matikdi, ang Kahayag kinahanglan moabot; wala kini sa kangitngit. Ang Kahayag nagaabot diha sa kangitngit, ug ang kangitngit wala nakasabot Niini. Matikdi karon ang mga dinihogan niining adlaw.

Maingon nga si Moises gipagawas kadtong mga anak sa Israel; ug sila nagpatalinghug ug silang nangalibog sa niadtong gamhanang nasud didto. Karon, ang Israel interdenominasyonal. Walay iyang yuta, walay puloy-anan. Kini nagapaingon pa sa usa ka puloy-anan.

Walay atong iglesia. Kita dili... Kita—kita paingon pa ngadto sa usa ka Iglesia, ang Iglesia sa Panganay, ang Iglesia nga anaa sa Himaya; dili ang iglesia nga ania sa yuta, pinaagi sa tawo. Ang Iglesia nga anaa sa Himaya, ang mga tinawag pagawas, gikabut-an nang daan ngadto sa Kinabuhing Walay Katapusan, kita n’yo, nagapauli na ngadto sa ilang Puloy-anan.

Ug sa paghiabot na nila sa dapit aron sa paglabang, ilang giduhaduhaan ang Pulong, ug namalik. Human nga si Joshua ug Caleb ug sila nakaadto na ug nagdala pagbalik ug pungpung sa mga ubas, aron ipamatuod kanila nga ang yuta tua didto, ang Pulong nga gisaad sa Dios, “Kini usa ka maayong yuta, sa gatas ug dugos.” Ug gidala kini pagbalik, diha nianang dapita, aron ipamatuod kini kanila. Ug ilang gipangtilawan kini, ug miingon, “Oh, oh, dili nato mahimo kini, bisan pa.” Unsa man ang nahitabo? Sila nangamatay didto sa kamingawan. Nagpabilin sila mismo didto ug nag-organisa sa ilang mga kaugalingon, ug nangamatay, ang matag usa kanila.

Apan ang uban nga nakalabang na ug nangdala pagbalik, si Joshua ug si Caleb; si Moises gibalhin na. Usa ka tipo sa pagpaabot alang sa Iglesia; ug sa pagkabanhaw sa Daang Tugon, Bag-ong Tugon; ug sa gilalin nga Lawas. Nakita n’yo ang tulo diha? Kinahanglan nga mapabilin silang tigtulo

nga nagakakuyog, kita n'yo, busa, diha sa magtotoo ug dili-magtotoo. Kita n'yo?

¹⁹⁹ Matikdi kung giunsa kadto sa “kinatibuk-an.” Hinumdomi, wala gayud sa Dios gipasaylo katong maong sala. Karon unsaon na man nila pagsulod? Kung kini mga tunok na, sa sinugdanan pa, tunok kini sa katapusan. Ang mga gipili nang daan mao lang ang makakita Niini.

²⁰⁰ Matikdi pag-ayo karon. Sama lang sa mga adlaw ni San Martin, sa wala pa mismo ang Mangitngit nga Kapanahonan; usa ka diosnong gamay'ng tawo. Pila man ang nakabasa na sa mga sinulat ni San Martin? Daghan kaninyo ang nakabasa na. Kami miadto aron pagkuha sa mga sinulat ni San Martin; ang pari miingon, “Apan wala siya nahimong santos.” Tinuod, dili siya nahimo; dili pinaagi kanila, apan na-santos siya pinaagi sa Dios. Ang Espiritu Santo nagsulti kanato nga siya ibutang diha sa ikatulong panahon sa iglesia. Kita n'yo?

²⁰¹ Tan-awa kung unsa kadiosnon siya nga gamay'ng tawo; tinawag, pinili nang daan. Ang iyang mga ginikanan, pagano. Ang iyang amahan, usa ka sundalo. Iyang kinahanglan sundon ang iyang linya, ang pagka-sundalo. Ug, sa dihang iyang nahimo, ug kanunay'ng nagtoo nga adunay Dios bisan diin; usa ka tawo sa kalasangan, ug mahimo nga makita ang Dios. Usa ka adlaw milabay siya sa usa ka ciudad, ug dihay usa ka libodsuroy nga tigulang nga nagalubog didto, himalatyon, nagahangyo sa kang bisan kinsa. . . Siya gitugnaw niadtong gabhiona. “Oh,” nag-ingon, “taga-i ko ug butang nga akong ikatabon; mamatay na ako karong gabii.”

²⁰² Walay bisan kinsa ang mobuhat niini. Ug si Martin mihunong didto sa daplin ug naniid kaniya kadiyot. Walay bisan usa nga mobuhat niini. Aduna siyay usa lang ka americana. Kurugon siya sa katugnaw, sa iyang kaugalingon, tua siya sa oras sa iyang pagtrabaho, kung iyang—iyang ihatag kanang americana. Busa iyang nahunahunaan, “Kaming duha may higayon pang mabuhi kung akong bahinan siya.” Busa iyang gikuha ang iyang kaugalingong americana, ug gibahin kini sa duha pinaagi sa iyang espada, ug giputos niini ang tiguwang nga libodsuroy. Iyang gitabon ang americana palibot sa iyang kaugalingon.

Ang matag-usa miingon, “Tan-awa kanang gwardiaha kung unsa ka kataw-anan tan-awon. Tan-awa nang sundaloha kung unsa ka kataw-anan tan-awon, katunga sa americana nagputos sa iyang lawas!”

²⁰³ Pagkasunod gabii, pagkahuman na sa oras sa iyang pagtrabaho ug nagahigda na sa iyang higdaanan, nahigmata siya. Mitan-aw, nagatindog didto sa lawak, ug didto nagtindog si Jesus Cristo nga naputos niadtong daang bisti nga iyang gitabon kaniya. Diha-diha iyang naila, “Kon unsa man ang

inyong ginabuhat diha niining Akong mga gagmay, kana inyong nabuhat Kanako, sa Akong dinihogan,” nagalubog didto.

Siya usa ka bantugan nga alagad sa Dios. Gikataw-anan siya sa iglesia, naglutos kaniya, nagsipa kaniya paggawas, ug tanan na, apan siya usa ka profeta sa Dios. Kon unsa ang iyang giingon nagakatuman. Adunay daghan ang mitoo kaniya niadtong panahona, usab.

²⁰⁴ Buot ko ipakita kaninyo kung unsa ka malimbongon ang Yawa. Usa niana ka adlaw siya nagalingkod diha sa iyang pagtuon. Miabot ang usa ka gamhanang manulonda, may korona sa iyang ulo, nagsul-ob ug sapatos nga bulawan, may laso sa iyang mga bisti nga bulawan, ug miingon, “Martin, nakaila ka ba kanako?” Siya miingon, “Ako mao ang imong Ginoo ug Manluluwas. Ako Mao ang nagluwas kanimo. Simbaha ako, Martin.” Apan kadtong manalagna, nakahibalo nga adunay gamay’ng butang nga lahi didto, iya siyang gitutokan. Siya miingon, “Martin, ako mao ang imong Manluluwas, si Jesus Cristo. Simbaha ako! Wala ka ba makaila kanako, Martin?”

²⁰⁵ Mitutok lang si Martin ngadto kaniya, ang Kasulatan nagapangsulod sa iyang hunahuna. Matud niya, “Satanas, pahilayo gikan kanako.” Matud niya, “Aduna kay korona diha sa imong ulo. Ug ang Pulong sa Dios nagaingon ang Iyang mga ‘balaan maoy magpurong-purong Kaniya’ sa katapusan sa panahon.”

Dili ba kaha kato usa unta ka pang-Pentecostal nga paon? Bantayi kanang Pulong, igsoon. Dinha diin kini nagakapuslan.

²⁰⁶ Usa ka adlaw, usab, sa monasteryo, adunay ilang usa ka karaang balaan didto, sa pundok sa batan-ong mga monghe. Adunay usa kanila nga daw masuk-anon. Bantayi kini, ania kining usa ka maayo—usa ka maayong sambingay karon. Gusto siya nga mahimong si kinsa diha nilang tanan. Gusto niyang ipakita ang iyang kaugalingon, nga may gahum, ingon ug daku-daku, ingon nga mas maayo, labaw nga matang, nahibalo na mo, ug ingon nga usa ka bantugan. Kinahanglan nga siya usa ka klasiko. Kanunay’ng gusto nga ang ubang kaigsoonan dili . . . Nahibalo na mo, kinahanglan nga lahi gayud siya. Kita n’yo? Siya, bisan kung unsa pa kato, hilabihan siya ka mapahitas-on. Siya ang bugtong bato sa lapyahan. Walay si bisan kinsang makatandog kaniya. Karon bantayi kung unsay nahitabo. Kinahanglan aduna siyay usa ka dakung butang. Kinahanglan nga ikatandi siya uban sa—sa dinagkung katilingban. Nagsunod ba kamo kanako? Kita n’yo? Busa, miingon siya, siya nagpanagna. Siya miingon, “Ang Dios naghimo kanako nga usa ka profeta, usab. Ako usa ka profeta.”

Karon, dihay usa ka nailhan nga profeta sa kayutaan, ug kato mao si San Martin; siya natawo nga usa ka profeta.

²⁰⁷ Apan kining bata miingon, ang batan-ong lalake miingon, usa ka batan-ong monghe nga mga kaluhaan ug lima ka tuig ang panuigon. Siya miingon, “Ang Ginoo naghimo kanako nga usa ka profeta, ug akong pamatud-an kini kaninyo.” Miingon, “Karong gabii ang Ginoo magahatag kanako ug usa ka daku, maanindot nga bisti, ipasul-ob kini kanako, usa ka maputi nga bisti, ug ipahimutang sa taliwala ninyo. Ug unya kamong tanan mangduol kanako, kita n’yo, ug kamo magadawat ug mga mando gikan kanako.”

²⁰⁸ Karon itandi kana karong panahona, kita n’yo, “Ako mao ang mahimong ulo sa organisasyon. Atimanon ko kamo, kamong uban pa nga mga monghe.”

Ug mao gayud, “Niadtong gabhiona, adunay mga kasanag nga mitungha sa gambalay,” ingon sa ginasulti sa sinulat ni San Martin. Basaha kini. Ug kini tinuod. Kini kasaysayan. Ug ang mga kasanag miabot, ug ang tanang uban pa nagbantay, ug ania na. . . Siya nagsul-ob sa puti nga bisti, nagabarug sa taliwala kanila. Siya miingon, “Nakita n’yo na kung unsay akong giingon kaninyo?” Apan sukwahi kana sa Pulong.

²⁰⁹ Ug sa dihang miadto siya ug gikuha ang tiguwang nga decano sa kolihyo, paadto ug paanhi siyang milakaw diyutay, miingon, “Anak, morag dili kana husto.” Siya miingon, “Adunay usa lang ka paagi.” Ania kini! “Adunay usa lang ka paagi alang kanato sa paghibalo. Kini supernatural kon tan-awon.” Sus, gikuptan na unta kato sa Pentecostal, gamut, tingga, pisi, taga, ug tanan na! Siya miingon, “Ang milagro morag maayo man, apan kini morag dili nagatakdo sa Pulong. Karon, adunay atong usa ka tawo, usa ka dinihogan nga profeta, nga gihinganlag Martin. Ari ka, pag-adto sa iyang atubangan.”

Ang lalake miingon, “Dili, dili! Walay labot si Martin niini.”

²¹⁰ Ug miingon, “Bisan pa niana, moadto ka.” Ug ila siyang gilabni diha sa bokton, aron dalhon siya sa atubangan ni Martin, ug ang bisti mibiya kaniya.

²¹¹ Kita n’yo, “Mopahisalaag sa Pinili kon mahimo pa.” Kita n’yo, nakaila sila kanila. Si Jesus miingon, “Ang Akong carnero nakaila sa Akong Pulong.”

“Oh,” moingon kamo, “nagapaminaw sa Akong “Tingog.””

Mao kana ang Iyang Pulong. “Ang tawo dili mabuhi sa tinapay lamang, apan sa matag Pulong.” Kita n’yo? Ang mga pinili nang daan nakahibalo niini. “Usa ka langyaw’ng pulong, o usa ka langyaw’ng tingog, ilang dili sundon.”

Mao kadto ang pamaagi sa maong mga lalake didto; dili sila mosunod. Nahibalo sila nga si Martin atua didto, usa ka profeta niadtong panahona, giila sa Dios pinaagi sa Pulong, nahibalo sa Pulong. Ug kadtong tawhana dili motindog sa atubangan Niini.

²¹² Iyang giingon usab, “Kon diin gani ang mga Gipatay’ng Lawas,” o ang Pulong, “diha, sa tukmang panahon, ang mga agila magakatapok.” Karon mao kana ang sa Mat...Gusto ninyong isulat kana, kana sa Mateo 24:28. Nauna lang diyutay, Mateo 24:24; upat ka mga bersiculo nga nauna niini, Kita n’yo, kung gusto ninyo kuhaon kini. “Kon diin gani ang mga Gipatay’ng Lawas,” ang Manna, ang Pulong, “atua didto ang mga agila magakatapok.”

²¹³ Karon kinahanglan kong magdali. Gitan-aw ko didto ug nakita ko kung unsang oras na...Kini—kini pito na kagutlo o walo ka gutlo nga lapas na sa alas dose. Dalion ko na pag-ayo, o mahimong tapuson nato kini karong gabii, bisan hain sa usa nga gusto ninyong buhaton kini. Karong buntaga o unyang gabii? Huh? Pila man ang kinahanglan mopauli karon human sa panagtigum, pakitaa kami sa inyong kamut, kita n’yo. Oh, sus, maayo pang ipadayon!

Akong gikasubo sa pagpalangan kanilang mga tawo diha sa mga telepono sama niana, apan ako nang dalion. Kini bililhon pa kay sa inyong salapi. Nagtoo ako nga mao kini, alang kanako, kita n’yo. Ang inyong mga salapi mangahanaw. Kini dili; Kini mao ang Pulong. Kita n’yo?

²¹⁴ “Kon diin gani ang mga Gipatay’ng Lawas, didto magakatapok ang mga agila.” Kon diin ang Gipatay’ng Lawas, kon diin gani ang—ang—ang pagpamatay, didto magakatapok ang mga agila. Kon diin gani ang lab-as nga Karne, ang Pulong sa maong panahon, didto magakatapok ang mga agila.

Apan sa dihang kini dunot na, nan ang mga buitre manghugpa ngadto niini. Oo. Nakita ninyo kung unsay akong ipasabot? Sa diha ang pagpatay nabuhat na, ania nagapangabot na ang mga agila; apan human nga kini nagpabilin diha, ug dunot na, nan ania nagapangabot na ang mga buitre. Ang agila wala na nagapasilabot niini. Kita n’yo?

Si Jesus miingon, “Diin gani ang Gipatay’ng Lawas,” kon diin ang Manna nahulog, sa gabii nga ang Manna lab-as pa nga nagakahulog, “didto ang mga agila magakatapok alang Niini.” Mao kana ang Manna alang sa maong adlaw. Kita n’yo? Matikdi.

²¹⁵ Apan human nga kini nadunot na, ang mga ulod mosulod niini, dayon ania na ang mga buitre nagapangabot. Dili sila makapanimaho niini hangtud nga kini dili nagakadunot. Dili ikatingala nga si Jesus mibarog didto ug miingon, “Jerusalem, ikaw nga nagbato sa matag profeta!” Matikdi kanang pang-personal nga pulingalan, Kita n’yo, “Jerusalem, Jerusalem, sa makadaghan nga Ako...” Kinsa man kato Siya? “Sa makadaghan gipangandoy ko pagtigum unta kaninyo maingon sa usa ka himungaan diha sa iyang mga piso, kamo nga nagbato sa matag profeta nga akong gisugo diha kaninyo,” kanang daku nga iglesia, ang Jerusalem.

216 Ang Jerusalem nga dili dinhi sa yuta, “apan kita iya sa Jerusalem nga atua sa Itaas,” diin ang Pulong nagagikan, gikan sa pagpamili nang daan, kita n’yo. Dili ang karaan nga Jerusalem nga nagakahanaw; ang Bag-ong Jerusalem nga dili mahanaw. Dili ang karaang Jerusalem, nga gitukod sa tawo; kondili ang Bag-ong Jerusalem nga gitukod sa Dios, kita n’yo, ang Pulong didto sa itaas karon ingon nga gikapadayag na. “Sa balay sa Akong Amahan adunay daghang puy-anan. Moadto Ako ug andamon sila alang kaninyo,” ang Magbubuhat nga nagabuhat sa mga dalan nga bulawan, ug uban pa. Mao kana ang Usa nga dili nagakahanaw.

217 “Jerusalem, Jerusalem, sa makadaghan nga Ako,” gikan sa sinugdanan sa panahon; dili ikatulo nga Persona, laing uban pa, apan, “Gilumluman Ko unta kamo maingon sa usa ka himungaan diha sa iyang mga piso, apan modumili kamo. Apan karon ang inyong takna miabot na.” Kita n’yo?

“Kon diin gani ang Gipatay’ng Lawas, ang mga agila magakatapok.” Apan human madunot ang patay’ng lawas, dayon ang mga buitre magaalirong. Kita n’yo?

218 Matikdi. Si Moises, wala gayud niya hatagi ang mga anak sa Dios. . . Si Moises usa ka agila, ug wala gayud niya hatagi ang mga anak sa Dios sa mga salin ni Noe. Kita n’yo? Adunay siyay lab-as nga Pulong sa Dios. “Ang Ginoong Dios nakigtagbo kanako sa kamingawan, ug gipamatud-an ang Iyang Pulong, ug mipadala kanako dinhi aron pagpagawas kaninyo.” Ug unya may mga nangabot nga mga manunundog, nga nagapanundog niini. Kita n’yo? Apan atua kaniya ang Pulong sa maong takna.

Tungod kay, ang Dios miingon kang Abraham, ang usa nga maoy adunay saad, “Ang imong binhi magapuyo sa langyaw’ng yuta, sa upat ka gatus ka tuig, apan duawon Ko sila ug kuhaon sila paggawas pinaagi sa usa ka bokton nga kusgan.”

219 Si Moises miingon, “Karon, ang Ginoong Dios makigsulti kanako ug ipakita kanako, ug nagsulti kanako kung insay buhaton, ug sultihan ko kamo.” Miingon, “‘AKO MAO’ maoy nagpadala kanako.”

“AKO MAO!” Dili nga “Ako kadto, o mahimo sa umalabot.” “AKO MAO,” niining panahona, ang Pulong karon. Dili ang Pulong kaniadto, o ang Pulong nga umalabot pa; ang Pulong nga mao sa karon. Kita n’yo? Nakuha ninyo kini? “AKO MAO!” “AKO MAO” mao ang Pulong. “Sa sinugdan mao na ang Pulong, ug ang Pulong kauban sa Dios.” Husto ba kana? “AKO MAO.” “Ang Dios nagpadala kanako ingon nga Iyang profeta, aron panghimatud-an kini nga maoy tinuod. Ako mao ang tubag alang niining Pulong, nag-ingon kanako nga mokanaug dinhi ug buhaton kini.”

220 Ug sa dihang gibuhat niya kini, si Faraon miingon, “Bueno, adunay among daghan nga mga kalalaken-an dinhi sa among pundok nga makahimo niana, usab,” mga manunundog.

Si Jesus miingon, “Karon, kana masubli pa pag-usab sa katapusan nga mga adlaw,” kita n’yo, ginaangkon ang samang butang. Bantayi kung kinsa ang nauna. Bantayi kung kinsa ang nagpabilin sa Pulong. Mao kini. Mao kana kung unsaon kini pag-ila, aron inyong makita.

221 Atong namatikdan, si Moises wala gayud naghatag kanila kung unsa kaniadto ang sa kang Noe nga panahon, “Magbuhat ta ug arka karon, tungod kay kana mao ang Pulong, nahibalo kamo. Si Noe nagbuhat ug arka usa niadto ka adlaw.” Dili, ang mga buitire mao nay nagakaon niana. Dili, dili. Dili.

222 Kini mao ang gisaad nga Pulong. Matikdi, kay ang iyang mensahe nga atua kaniya gikan sa Dios, atua kaniya ang tinuod nga ginahin nga Pulong sa Dios alang niadtong taknaa.

Ni si Jesus wala midulot kanila sa kang Moises nga salin. Si Moises adunay iyang Pulong alang niadtong taknaa, apan usa ka profeta si Moises. Ania Mismo ang Dios, kita n’yo, wala gayud Niya gihatag kanila ang kang Moises—kang Moises nga salin.

Apan tan-awa lang ang mga buitire didto niadtong organisasyon, nagbinusawan niini didto. “Nakahibalo kami! Anaa na kanamo si Moises! Wala na kami magkinahanglan Kanimo.”

223 Siya miingon, “Kung nakaila kamo kang Moises, makaila kamo Kanako, tungod kay si Moises nagahisgot man bahin Kanako.” Oh, sus! Kita n’yo?

“Kung diin gani ang Gipatay’ng Lawas, ang mga agila magakatapok.” Mga agila! Ang lab-as nga pag-ihaw sa Pulong, ang Pulong nga gipatubo ug gipatambok, ug gipadayag ug gihatag nga Pagkaon alang sa mga anak.

Karon, ang karaan nga gipatay’ng lawas nga napahimutang didto sa gatusan na ka mga katuigan, didto kini magapabilin.

Mao sa gihapon karon! Si Luther adunay mensahe sa paghinulsol; apan, kamong mga pundok sa Lutheran nga mga buitire! Ang Baptist adunay mensahe; apan, kamong mga buitire nga Baptist! Kita n’yo? Ang Pentecost adunay mensahe; nagapauli na karon, mga Pentecostal nga buitire!

“Apan kon diin gani ang Gipatay’ng Lawas, didto magakatapok ang mga agila.”

224 Hinumdomi, dili ninyo mapakaon ang usa ka Lutheran, balik kaniadtong mga adlaw (mahimo na ninyo karon), sa usa ka dunot nga unod nga iya sa Katoliko. Dili, sir. Siya kaniadto adunay lab-as nga pagkaon. Mao kadto ang panahon sa maong iglesia.

Dili ninyo mapakaon ang Methodist, sa mensahe sa Lutheran. Oh, dili, dili niya gusto nianang usa ka dubok. Kini dunot na. Kita n'yo, ang Kinabuhi human na mibiya niini ug miadto na sa lain. Mao kadto ang daan nga lindog nga patay na, kaniadto. Ang maong Kinabuhi nagapadayon pag-isug.

Ni mahimo ninyo ang pagpakaon ug Pentecostalismo sa Pangasaw-onon ni Jesus Cristo. Dili, dili gayud! Giulod na nga mga organisasyon; walay makabuhat! Dili, dili gayud!

Tungod kay ang saad mao, “Ug dili pa moabot ang kanang daku ug makalilisang nga adlaw, Akong ipadala kaninyo si Elias nga profeta. Iyang pabalikon ang mga kasingkasing sa mga anak balik ngadto sa Pagtoo sa mga amahan pag-usab.” “Kining tanang mga saad nahimo na sa Biblia, Akong buhaton kini, ug didto ang mga agila magakatapok.” “Ang tanan nga gikahatag Kanako sa Amahan magaari Kanako.” Kita n'yo?

²²⁵ Wala gayud ni Jesus gisulayan kana. Apan sa pag-abot ni Jesus, Iyang hingkaplagaan silang mga panon sa mga buitire, “Anaa kanamo si Moises ug ang kasugoan.” Kita n'yo? Bueno, maayo kana kaunon kaniadto sa dihang gipatay kini ug gihatag ngadto kanila. Kita n'yo, maayo pa man kini kaniadto.

Apan mao kini ang gitagna na ngadto kang Moises, sa kaugalingon niya mismo, nga nagpatay sa halad, giingon, “Ang Ginoong Dios magpatindog sa inyong taliwala, gikan sa inyong kaugalingong kaigsoonan, usa ka Profeta. Kini mahitabo, nga ang matag usa nga dili mokapyut ngadto nianang Profeta ug sa kung unsay Iyang ginaingon, pagapuohon gikan sa taliwala sa katawhan.” Ug kato nahitabo.

²²⁶ Tan-awa kung unsaon nangatuman ang mga unom ka gatus ka nagkalain-laing mga profesiya mismo didto, sa Daang Tugon, kang Jesus Cristo. “Ilang gipalagbasan ang Akong mga kamut ug Akong tiil.” Mga hapit, nahikalimot na ako kung pila ang nangatuman sa ulahing pito o walo ka oras sa Iyang kinabuhi, nga gisulti nilang tanan nga mga profeta, sa hingpit.

²²⁷ Kung nagpanagna ako karon nga ang usa ka maong butang mahitabo sulod sa usa ka tuig gikan karon, tingalig adunay akong—adunay akong kaluhaan ka porsyentong kahigayonan alang niini nga mahitabo, kung kini man husto o sayup. Ug kung akong gisulti nang daan nga kana mahitabo, ug dili nag-ingon kung kanus-a, adunay akong mas gamay'ng porsyento. Kung akong gisulti nang daan kung kanus-a kini mahitabo, nagahatag kini kanako ug mas gamay pa nga porsyento. Kung akong gisulti nang daan ang dapit diin kini nahitabo, kini nagahatag niini sa gihapon ug usa ka mas gamay'ng porsyento. Kung ako gisulti nang daan ang... kung kang kinsa kini mahitabo, nan sa gihapon aduna na akoy usa ka gatus sa usa ka liboan nga porsyento niini nga mahitabo gayud, kung dili kini tinuod.

Ug ang matag Pulong, hallelujah, nga sinulat mahitungod niadtong Mesias, nangatuman gayud letra por letra. Hangtud gani usa niadto ka adlaw, samtang nagabasa sa Kasulatan, Siya mihunong mismo diha sa tunga-tungang han-ay sa pulong, ug miingon, “Ang Espiritu sa Dios ania sa ibabaw Kanako aron pagwali sa Maayong Balita, ug ipalingkawas ang...” Ug mihunong mismo diha sa tunga-tunga sa han-ay sa pulong, tungod kay ang uban niini alang na sa Iyang ikaduhang Pagbalik. Amen! “Ang mga Langit ug yuta mangahanaw; ang Akong Pulong dili gayud.” Kita n’yo?

228 Siya mao ang Pulong niadtong tongura, nga mao ang nagapakaon kanila kaniadto. Si Moises nagsulti kanila sa Kamatuoran; apan, kita n’yo, kanunay silang nagapamuhat ug denominasyon gikan niini, alang sa mga buitre nga...

Aduna pay pipila nga nahibilin pa Niini human nga nakakaon na ang mga agila ug namauli na. Dayon sila nagapaabot nga makita ang uban pa. “Ang Pulong,” sila nagaingon, “dinhi Kini dapat moabot. Adunay atong karne sa usa kagahapon; adunay atong carnero ugma.” Nakita ninyo kung unsay akong ipasabot? “Adunay karaang unod sa usa didto, nagapasigarbo, apan adunay atong carnero nga umaabot karon. Hain man kini karon?” Nakita ninyo kung unsay akong ipasabot? Pagkaon nga iya sa mga Manulonda! Ang katawhan nga nagakaon sa manna usa ka adlaw, kung ilang gisulayan pagbilin niini alang sa sunod adlaw, kini nangadaut. Dili ba ninyo nakita ang tanang maong mga tipo, kung unsa kahingpit? Mao ra karon!

229 Matikdi, ang mga buitre sa adlaw ni Jesus nagapanghingilin usab ug mga yawa; mga dinihogan diha sa karaang gipatay’ng lawas. Husto ba kana? Nagpanghingilin sila ug mga yawa. Si Jesus nag-ingon niini.

Ug hinumdomi, adunay ilang mga profeta niadtong mga adlaw. Si Caiaphas, ang labaw’ng sacerdote, nagpanagna. Pila man ang nakahibalo niana? Si Caiaphas nagpanagna. Matikdi ang kahimtang sa maong sagbot diha sa kaumahan; kini gibisbisan sa managsamang dihog. Nganong nag-ingon man ang Biblia nga nagpanagna siya? “Tungod kay siya mao man ang labaw’ng sacerdote niadtong tuiga.” Usa ka dautan nga nagakaon sa mga dubok, usa ka sagbot ug usa ka kudyapa, nagapahiluna taliwala sa mga Trigo; apan ang Espiritu anaa diha kaniya, ang tinuod nga Espiritu Santo sa Dios. Ang Espiritu Santo sa Dios anaa kaniya, aron pagwali, pagpanagna, ug magapanagna niini aron nga matuman; ug gilimod ug gilansang ang gipanghimatud-an mismo nga Pulong sa maong takna.

Oh, kalo-oy, igsoon! Unsa pa kadugay nga atong kinahanglan pang ipangsulti kining mga butanga, kita n’yo, unsa pa kadaghan pinaagi sa Kasulatan? Dalion ko. Adunay

akong mga napulo ka panid pa dinhi, nga mga Kasulatan, kung unsa nga ginapamatuod ang tanang butang. “Ang adlaw nga nagasidlak diha sa matarung ug sa dili matarung, mao ra.”

²³⁰ Si Jesus miingon, aron pamatud-an kini. “Kung maghingilin ako’g mga yawa pinaagi sa tudlo sa Dios, pinaagi man kang kinsa ang inyong mga anak nagapanghingilin?” Karon, sila nagapanghingilin ug mga yawa. Nagapanagna sila. Husto ba kana? Apan wala nag-ila Kaniya ingon nga mao ang Pulong sa maong takna, (ngano man?) tungod kay wala Siya nahisakop uban kanila.

Karon kuhaa ang Mateo 24:24, “Mini nga mga Cristo,” mga dinihogan, “magapanungha, ug magkaadunay mga mini nga profeta nga nagapanagna niini,” kita n’yo, “magapahisalaag sa Pinili mismo kung mahimo pa.” Nakuha na ninyo kini karon?

²³¹ Matikdi ang mga anak. “Pinaagi kang kinsa nagapamuhat ang mga anak. . . Kung nagapanghingilin ako ug mga yawa pinaagi sa Pulong sa Dios,” kinsa, Siya mao ang Pulong sa Dios, “pinaagi kang kinsa man ang inyong mga anak sa denominasyon nagpanghingilin kanila?” Karon, ug ang Dios lang maoy makahingilin sa yawa, nahibalo kita niana, ang Dios lang. Kay, ang tawong kusgan kinahanglan nga labi pang kusgan kay sa usa nga anaa sa iyang balay. Aduna silay gahum sa pagbuhat niini.

Nasayod kamo, diha sa mga Pinadayag, giingon nga iyang. . . kanang anticristo nga mitungha sa katapusang mga adlaw, “Nagpamuhat ug mga ilhanan ug mga katingalahan, nga naglimbong bisan pa sa katong mga nagpuyo sa ibabaw sa yuta, ug naglimbong sa matag usa kanila, sa mga Cristohanon ug tanan na, nga kinsang mga ngalan wala mahisulat diha sa Libro sa Kinabuhi sa Cordero,” tubag sa Mateo 24:24, “kinsang mga ngalan wala mahisulat diha sa Libro sa Kinabuhi sa Cordero sukad pa sa pagkatukod sa kalibutan.”

Kanang maong Kinabuhi nga atua sa gamut nianang—nianang tinuod nga kahoy’ng orange, nga nagaadto sa tanan niadtong mga citrus ug sa tanang uban pa, ug mitunol ug naghatag ug bunga diha ibabaw sa maong punoan, ibabaw sa tanan nga nahisugpon nga mga pangdenominasyon nga sumpay ug mga sanga. Nakuha ninyo kini? Dalion ko. Ang tawong kusgan. . .

²³² Hinumdomi si David karon, siya matitud-anon, matinuuron, nagapaningkamot pagbuhat ug usa ka buluhaton sa Dios, ug wala gikatudlo sa pagbuhat niini.

“Sila,” ang mga dinihogan; apan si Jesus miingon, “Sila nagapanudlo ingon nga Doktrina ang pagpanghubad (sa mga Kasulatan) sa tawo,” kita n’yo, dili ang Pulong sa Dios, dili ang Iyang gipanghimatud-an nga Pulong; nagapanudlo ug usa ka pangkasaysayan nga Cristo, kita n’yo, butang nga nangagi na.

Ug ang Biblia nag-ingon, “Siya mao.” “AKO MAO,” dili nga “Ako kaniadto o mahimong sa umalabot.” “AKO MAO, karon mismo.” Siya mao kanang Pulong nga nagakabuhi hangtud karon.

Siya kaniadto, ang sa sinugdanan, Siya mao kaniadto ang . . . Siya mao kaniadto ang sa—ang sa mga dahon; Siya mao kaniadto ang sa lindog; Siya mao kaniadto ang sa tipaka; apan karon Siya anaa na sa Lugas.

²³³ Karon, baliki ninyo ug sulayi pagpakabuhi pag-usab? Unsa kaha kung kanang maong Kinabuhi mibalik sa ubos, nagadahum ba kamo nga kanang (mibiya nang) maong Kinabuhi makahimo pa pagsulti, mobalik human kanang gulang na nga tipaka nalaya na, mobalik pa gyud ug magkinabuhi diha niini pag-usab? Wala gayud kini ginahimo. “Tungod kay dili na gayud mahimo alang kanila nga sa makausa nalamdagan na,” ug dili mipadayon uban sa Pulong samtang kini nagakatuman, “sila mga patay na, wala na; ug ang mga tunok ug mga kudyapa nga nagkahiduol na sa pagkasinalikway, kinsang katapusan mao ang pagkasunog.” Husto ba kana?

Karon ako nang ginadalidali ingon sa akong mahimo.

²³⁴ Matikdi ang Kasulatan karon. Nagapanudlo sa usa ka pangkasaysayan nga Dios, kita n’yo, sama lang nga nagapaninguha silang magkinabuhi sa mga nangagi na, sama, “Bueno, si Wesley nag-ingong *kini-ug-kana*. O, si *Kini-ug-kana* nag-ingon ug *kini-ug-kana*.” Kamo nagadumili sa gisaad nga Pulong sa maong adlaw, ang Manna nga sa tataw giila sa maong adlaw. Ilang ginapaningkamotan pagbutang sa ilang karaang Lutheran, Baptist, Pentecostal nga mga bino diha sa atong bag-ong mga sudlanan. Dili kini magsilbi. Ug ang atong bag-ong Bino, diha sa ilang karaang mga sudlanan, dili magpulos. Kung ilang paningkamotan pagbutang niining bag-ong Bino diha sa denominasyon, ang ilang mga binuang madayag. Dili nila mahimo kini. Kini magapabuto kaniya.

²³⁵ “Karon, igsoon, akong nakita ang Pulong sa Dios, sa hingpit pinaagi sa Pulong!”

“Karon, tan-aw diri, Doktor, kung . . . Kami—kami dili mahimong maanaa Niana.” Ned, nagtoo ko nakasinati ka sa pipila niana bag-ohay pa. “Kami, kami dili gayud mahimong maanaa Niana dinhi karon. Ako—gustuhon ko pa nga tingali mopadayon ra kamo.” Nahibalo na kamo. Kita n’yo, dili kini magsilbi. Mobuto kini.

“Dili ka nagatapak ug usa ka bag-ong panapton diha sa daan nga sinina, tungod kay imo lang mangagisi sila.” Kita n’yo? Dili ba nag-ingon si Jesus niana? Dili mo mahimo ang pagsulod sa bag-ong Bino diha sa daan nga mga sudlanan. Ginapabuto sila niini. Ang bag-ong Bino adunay Kinabuhi niini. Bueno.

²³⁶ Matikdi ang usa ka butang dinhi, sa labing dali karon, samtang ato nang ginatapus ang . . . atong panaghigot. Matikdi ang Pinadayag 16:13 hangtud 14, kung gusto ninyo nga isulat kana. Wala na koy panahon pag-adto pa niini. Gusto ko kaninyo nga masigurado ug nga makita kini. Karon matikdi, kini mao ang pagpatunog tali sa Ikaunom ug Ikapitong Panaksan.

²³⁷ Karon atong—ato nang tapuson sa makadiyut na lang, kon inyo lang mahimo sa hamubo pang mga gutlo. Ginatapus na karon.

²³⁸ Matikdi ang Pinadayag 16:13 ngadto sa 14, tunga-tunga sa Ikaunom ug Ikapitong Panaksan, “Tulo ka mga mahugaw’ng espiritu nga morag mga baki” (namatikdan ba ninyo kana?) “migula gikan sa baba sa kon kinsa.” Karon matikdi, sa dali. Andam na ba mo? Pag-ingon, “Amen.” [Ang kongregasyon nagaingon, “Amen.”—Ed.] Usa ka trinidad sa mga espiritu!

²³⁹ Karon igsoon sa denominasyon, pagpabilin paglingkod sa makadiyut lang. Ayaw pagtindog ug pagbiya sa lawak, diha sa gawas nagpaminaw niining radyo, mga nakakonekta sa telepono. Ayaw palunga ang inyong mga teyp recorder. Pagpabilin lang paglingkod sa makadiyut, ug pagpatalinghug. Kamong gipanganak sa Dios, buhaton ninyo.

²⁴⁰ Usa ka trinidad sa mga baki! Ang usa ka baki mao ang mananap nga kanunay’ng nagatan-aw sa likod. Wala gayud siya nagatan-aw kon asa siya padulong; siya nagatan-aw kon asa siya nagagikan. Kita n’yo? Dili ba ninyo nakita? Diin man nahimugso ang trinitaryanismo? Hinumdomi, “tulo ka mga mahugaw nga espritu,” tagsatagsa ka mga espiritu. Nakuha ba ninyo kini? [Ang kongregasyon nagaingon, “Amen.”—Ed.]

²⁴¹ Matikdi, sila nagalingi ngadto sa Konseho sa Nicaea diin ang doktrina sa trinidad nahimugso, dili sa Biblia. Walay ingon nianang butanga. Sila nagatan-aw balik sa Konseho sa Nicaea didto sa Nicaea, sa Roma, diin ang trinidad nahimugso.

Matikdi kon diin sila nagagikan. Matikdi. Ug ang trinidad sa mga baki migula gikan sa usa ka karaang trinidad, nanganak sa usa ka bag-ong trinidad, ang ilang inahan. Unsa may ipagawas niini? Usa ka trinidad, “ang dragon,” kita n’yo, “ang mapintas nga mananap,” ug “ang mini nga profeta.” Usa ka trinidad, bag-o. Kay kanus-a man kining mga baki nanungha? Kanus-a man kini? Matikdi, sila anaa na diha sa tanang panahon, apan wala kini mahipadayag hangtud sa tunga-tunga sa Ikaunom ug Ikapitong Panaksan, sa wala pa ang mga Timri naablihan aron sa pagpadayag niini.

“Tungod kay diha sa Mensahe sa ikapitong manulonda, ang mga tinago sa Dios igapahayag na,” tanan kining mga butang sa trinidad, ug mini nga mga bautismo, ug ang tanan igapadayag na. Tabangan ta sa Dios sa pagkakita kung unsa

ang Kamatuoran! Ug dili nagahunahuna nga kini usa ka tawong nagapaningkamot pagsulti ug butang aron . . .

²⁴² Akong mabati kanang espiritu nga nagapakigbatok Niana, nakita ninyo. Wala ako nagahisgot mahitungod sa akong kaugalingon, igsoon. Ako nagahisgot mahitungod sa Manulonda sa Ginoo nga ania dinhi sulod sa campo. Mao kana ang matuod.

²⁴³ Matikdi, usa ka trinidad! “Ang dragon,” pila man ang nahibalo kung unsa kaniadto ang dragon? Mao kadto ang Roma. “Ug ang dragon mibarog sa atubangan sa babaye aron tukbon ang iyang anak inigkahimugso na niini.” Husto kana? Unsa man ang kahulogan sa “mananap” diha sa Biblia? Gahum. Bueno. “Mini nga profeta, usa ka mini nga profeta,” usa ka mini, usa ka dinihogan. Kita n’yo?

²⁴⁴ Asa man nagsugod? Kini mao ang “mini nga profeta,” usa ra. “Mini nga profeta,” ang unang santo papa; ug gikan didto migula “ang—ang babayeng bigaon, ug inahan sa mga babayeng bigaon,” ang kinatibuk—ang butang.

Usa ka mini nga trinidad nga nagabangon; dili sa unang mga adlaw, dili mahimong madayag sa unang mga adlaw, kini mipadayon uban niini. Apan sa paghiabot na sa Pito ka mga Timri, ug gibuksan kadtong maong mga tinago ug gipadayag na sila; diha niana “ang mga baki, tulo ka mga mahugaw nga espiritu sama sa mga baki, mitungha aron ipadayag ang ilang kaugalingon,” usa ka doktrina sa trinidad batok sa Kamatuoran. Kita n’yo? Huh!

Kita n’yo kung diin kini nagagikan? Kita n’yo kung diin kini nagabalik? Sa Ecumenical Council. Managsoon na man silang tanan, bisan unsaon; mao rang mga espiritu, managsamang butang.

Ug bantayi. Hilabihan kamalimbungon, nagapamuhat ug mga milagro! Ug kini sila mga yawa nga nagapangsangyaw ngadto sa tanang mga dios sa yuta, nagapamuhat ug mga milagro, aron pagpahisalaag kanila sa katapusang adlaw, ug molampus sa pagbuhat niini. Unsa man ang giingon sa Dios bahin nianang dautan nga espiritu?

Miingon, “Mokanaug Ako ug mosulod diha sa baba niadtong mini nga mga profeta ug papanagnaon sila ug usa ka bakak, aron pag-aghat kang Ahab sa pag-adto didto aron pagalaglagon.”

²⁴⁵ Ang Dios miingon, “Lakaw. Molampus ka. Imo silang mapatoo niini. Wala sila diha nianang Pulonga, sa sinugdan pa.” Kita n’yo? “Lakaw, kay imo siyang haylohon. Ikaw ang maong mobuhat niini, sa dihang ikaw makasulod na kanilang mga mini nga profeta, tungod kay siya nagasalig mismo diha kanila. Ug walay iyang nahibangkaagan mahitungod sa Pulong, ni siya maninguha man pagtoon Niini. Dili niya kini mahimo, tungod kay siya usa man ka kudyapa, sa sinugdanan pa.” Kita n’yo? Kita n’yo? “Molampus ka.”

246 Tan-aw dinhi niining mini nga mga baki, nga nagatan-aw sa likod, “Aba, nahibalo ba kamo kung unsay ilang ginaingon didto kaniadto sa Nicaea?”

Dili ko igsapayan kung unsa may ilang giingon bahin, didto sa Nicaea. Akong ginasulti kung unsa ang ilang giingon sa itaas dinhi sa Trono sa Dios; kung unsay mahitabo, dili sa kung unsay kaniadto; kung unsa ang mahitabo, tungod kay Siya mao ang “AKO MAO.” Kita n’yo?

“Mini.” Tan-awa kana. Huh! Matikdi kung diin sila nagagikan.

247 Karon paminaw ug maayo. Atong makita sa tin-aw, human nga ang Pito ka mga Timri naablihan na, kana maoy pagpadayag nianang maong tinago. Unsa kanang trinidad? Kita n’yo? Diin man kini sukad gitawag nga trinidad? Kita n’yo? Diin man sa Biblia nga gisulti Niini ang pulong nga trinidad? Diin man nga dunay mahimong tulo ka mga Dios, nga magsimba ta ug tulo ka mga Dios ug nga dili mahimong mga pagano?

Unsaon man nila pagkahimong magkabalag-bulag, sa dihang Siya nag-ingon, “Ako ug ang Akong Amahan Usa ra”? “Gawas kon motoo kamo nga Ako mao Siya, mangamatay gayud kamo diha sa inyong sala, kita n’yo, sa inyong pagkadili-matinoohon.” Ang sala mao ang pagkadili-matinoohon. “Mangamatay kamo diha sa inyong pagkadili-matinoohon.”

Oh, kinsa man Ako sumala kaninyo, asa man
Ako nga inyong giingon nagagikan,
Oh, nakaila ba kamo sa Akong Amahan, o
masulti ba ninyo ang Iyang Ngalan?
Ako Mao ang Rosas sa Sharon, ang Mahayag
nga Bitoon sa Kabutangan.

Matug-an ba ninyo kanako kung Kinsa Siya?

Ako Mao kadtong nagsulti kang Moises sa
nagdilaab nga sampinit sa Kalayo,
Ako Mao ang Dios ni Abraham, ang Mahayag
nga Bitoon sa Kabuntagon.
Ako Mao ang Rosas sa Sharon, Oh, asa man
Ako nga inyong giingon naggikan;
Oh, nakaila ba kamo sa Akong Amahan, o
masulti ba ninyo ang Iyang Ngalan? (Amen!)

Ako Mao ang Alfa, Omega, ang Sinugdanan
gikan sa Katapusan;
Ako Mao ang kinatibuk-ang kabuhatan, ug si
Jesus ang Iyang Ngalan.

248 Husto kana. Walay trinidad! Wala, sir. Usa kana ka sayup nga butang.

Ang Pito ka mga Timri, nagabukas niadtong mga tinago nga “kinahanglan mamatuman na,” ginapakita. Ang naablihan nga

Timri; ginapahimutang, ginapakita, ginapatin-aw ang tinago nga mga Kamatuoran nga gitago sa mga Timri niining mga katuigan, sa tanan niadtong mga kaiglesiyahanan ug mga denominasyon.

“Ang bantugang bigaon,” sa Pinadayag napulog pit . . . Kinsa man kato siya? Apan siya mao ang “ANG INAHAN SA MGA BABAYENG BIGAON,” usab. Kita n’yo?

²⁴⁹ “Karon, inyong gitawag sila nga mga ‘buitre,’” moingon kamo, “Igsoong Branham.” Husto kana.

Apan, hinumdomi, ang buitre usa ka langgam. Siya dinihogan sa paglupad, usab. “Ang duha ka mga espiritu mahimong magkaduol kaayo nga mopahisalaag niini sa Pinili . . .” Ang buitre mao ra kadaku sa usa—sa usa ka agila. Makahimo siya paglupad sama nianang agila; ug dinihogan sa paglupad, o sa pagwali, o sa pagpanagna, matikdi, susama sa agila. Apan dili siya makasunod sa agila diha sa gihabogon. Dili, dili. Kung mosulay siya pagsunod sa agila, ang iyang mga kabuang madayag ra. Oo, sir. Dili siya makahimo pagsunod sa agila.

Oh, makaingon siya, “Ako nagatoo kang Jesus Cristo ingon nga Anak sa Dios. Ako nagatoo sa Dios nga Amahan, Makagagahum sa tanan, Magbubuhat sa mga langit ug yuta; si Jesus Cristo nga Iyang Anak, ug uban pa.” Oh, sigurado, mabuhat nila kana. Apan unsa na man Siya ingon nga mao sa gihapon kagahapon, karon, ug hangtud sa kahangturan? Kita n’yo?

²⁵⁰ Ang agila maoy usa ka talagsaong binuhat nga langgam. Walay sama kaniya, dinhi sa yuta. Kita n’yo? Siya—siya . . . Kung ang buitre mosulay pagsunod kaniya, o bisan unsa pang langgam, mobungkag siya. Ang iyang mga binuang madayag, sigurado gayud. Mobuto siya kung iyang sulayan pagbutang sa bag-ong Bino diha sa karaang sudlanan. Kita n’yo, mobuto siya. Mobungkag siya. Wala siya buhata, wala siya . . . Ang iyang lawas wala gipangtaud uban sa estruktura aron mohawid kaniya didto sa itaas. Sa dihang nagakadangat na siya sa itaas sa mga kawanangan didto, kung wala siya buhata, gikatudlo, gikabut-an nang daan, natawo nga agila, mobuto siyang nagkawatas-watas. Kita n’yo? Ang mga balahibo mangaibot gikan sa iyang mga pako, ug mahulog siya sa yuta. Sigurado. Dili siya makasunod sa agila, diha sa kahabugon. Kung iya mang sulayan, ang iyang kabuang madayag ra. Husto kana. Dili ka makahimo.

²⁵¹ Ngano man? Dili siya makakita sama sa agila. Unsa may nakaayo niini ang pagsulay sa paglukso ug hataas kaayo, ug dili makakita kung hain ka na sa dihang atua kana didto sa itaas? Ug kung iya man gyud sulayan, bisan sa pagsulay pagsundog niining agila, diha sa mga kahabugon, nagakahimo siyang buta gayud nga dili siya mahibalo kung unsa ang iyang pagaabtan. Husto

kana. Siya nagasiyagit ug nagasinggit, ug nagapatuyang; apan isulti lang ang Pulong diha kaniya, sus, diha ang iyang binuang madayag.

Hisgoti kaniya mahitungod sa bautismo sa Ngalan ni Jesus Cristo, o, Siya ingon nga mao sa gihapon kagahapon, karon, ug hangtud, ang tanan—tanang na nga sama niana, ug sultihi siya. “Aba, oh, karon paghulat sa makadiyut lang!” Kita n’yo? Oh, oo, diha ang iyang mga balahibo nagakahulog. Kita n’yo, siya anaa na sa tanang paglukso-lukso, ug pagpanagna, ug paghingilin sa mga yawa, ug pagsulti sa laing mga dila, ug pagsinggit, ug pagpatuyang, sa pagdagan-dagan nganhi ug ngadto sa salog. Apan ayaw pagsuway ug sunod ngadto sa Itaas; aba, sigurado siyang mailhan.

Apan bisan pa, siya gikatudlo. Siya dinihogan. Makahimo siya paglupad. Makapanghinimbang siya sa iyang kaugalingon, makapahitaas didto, apan dili. . . ingon-ana lang kataas. Kita n’yo, mahimo niya ang pagkaon sa dunot na nga unod, apan dili siya makahimo pagkaon sa lab-as nga Karne nga nagagikan sa Trono.

Siya buta. Kanunay nagakatandog ang iyang mga pagbati, apan wala siya nahibalo mahitungod sa kung unsa man ang maong pagbati. Kita n’yo, kanang mao rang Espiritu nga mikunsad kaniya, sama sa ulan, aron pagpatubo kaniya nga trigo; dili siya usa ka trigo sa sinugdan pa. Siya mobuto. “Oh, dili ako maabni sa ka. . . Oh, dili, sir! Nahibalo ako nga si Doktor Jones nag-ingon. . .” Sige, padayon. Kita n’yo? Pagpadayon, kung gusto ka.

²⁵² Dili, matikdi, wala siya gitawo, o gibuhad, o gikabut-an nang daan, nga mahimong ingon nianang matanga sa langgam. Makahimo siya. . . Siya usa ka. . . siya tingalig usa ka lemon nga nagatubo diha sa usa ka punoan nga orange, apan wala gayud siya magagikan sa gamut. Siya usa ka butang nga gidugang. Ug sa dihang hataas na sila kaayo diha sa ilang mga denominasyon nga dili na nila makita ang ginahin nga Pulong sa Dios nga gipanghimatud-an, dayon ang ilang binuang madayag ra. “Oh, kanang butanga, Halo sa ulo, ug tanan na, oh, kini walay kapuslanan.” Kita n’yo? Mahibaloan ra.

²⁵³ Dili siya gibuhad aron makakita sa ingon ana ka-layo. Makakita lang siya sa gilay-on nga ginatugot kaniya sa iyang pangdenominasyon nga antiyuhos. Apan, lampas niana, siya ingon kabuta sama sa usa ka kabog. Dinha dayon ang iyang binuang madayag. Kita n’yo? Mao kana diin ang matuod nga agila nagapahimutang aron mokaon. Oo, sir. Diha diin ang tinuod, pinili nga mga agila makakita kung unsa siya. Sa dihang dili niya makaon kanang Pulonga, diha-diha ilang mahibaloan nga siya usa ka denominasyong buitire.

²⁵⁴ Nganong, nganong dili siya makalupad? Tungod, tan-awa kung unsa ang iyang gipangkaon. Siya nagakaon sukad pa diha sa dunot nga karne sa denominasyon. Kana dili—kana dili magapahimong espirituhanon sa iyang lawas, dili magapahimutang kaniya diha sa espirituhanong katakus, sa laing pagkasulti, aron sa pagdala kaniya ngadto labaw pa sa pangdenominasyon nga mga panagkalahi. Kita n’yo? Kita n’yo, siya igo lang gipakaon sa dunot nga mga butang; ang iyang lawas gibuhat gikan niana. Dili siya makalupad sa itaas didto diin kanang lab-as nga Karne nagadala nianang agila. Dili gayud niya mahimo kini. Kita n’yo?

²⁵⁵ Kana nagatuman sa Mateo 24:24. Siya nagalupad-lupad, nagalukso-lukso diha sa hangin, nagakapa-kapa sa iyang mga pako, apan dili lang siya gayud makapahitaas kaayo. Kita n’yo? Husto kana. Kita n’yo, dili siya makaabot, dili niya mahimong mopaingon sa igong kahabugon aron maabot kanang lab-as nga Manna. Makaon niya ang daang manna nga ania sa ubos dinhi sa yuta, ang karaang patay nga rabbit nga naligsan sa miaging semana, ug usa na ka bulan, o kap-atan na ka tuig ang milabay, nga kahugawan. Mahimo niyang kaonon kana, ug giganahan pa niini, ug moi-yagak ug mosinggit, ug magpalabi, molukso ug molupad sama sa usa pa ka agila. Siya dinihogan, sama sa ubang langgam.

Ug siya usa ka tipo sa usa ka agila, ang usa ka buitire. Nahibalo kita niana. Siya mao gayud, apan dili siya makasunod sa tinuod nga agila. Kita n’yo? Dili gayud niya mahimo kini. Dili, sir. Ang iyang lawas wala buhata; siya sukad nagakaon diha sa nagkalain-laing dubok nga unod, kita n’yo, ug kini dili mahimo. . . kini dili—kini dili mahimong mao ang lab-as nga Karne, ang lab-as nga Manna. Kini mahimong mao ang butang nga giingon ni Luther, giingon ni Wesley, o giingon ni Doktor *Kini-ug-kana*. Dili kini mahimong mao ang giingon ni Jesus alang niining taknaa.

²⁵⁶ Moadto na kita karon, patapus na. Mga dinihogan, “Mga Cristo,” sa katapusan nga mga adlaw, apan mao ang “mini nga mga magtutudlo ug mini nga profeta.” Matikdi kung unsa ka makapakurat! Karon buot ko nga inyong itandi kini; wala nay atong panahon pagbasa pa niini, sa Mateo 24:24 uban sa Ikaduhang Timoteo 3:8.

Ang Mateo 24:24 nag-ingon, sa katapusan nga mga adlaw, kita n’yo, “Magapanungha ang mini nga mga Cristo,” mini, nga mga dinihogan, “mini nga mga profeta, ug magapakitag mga ilhanan ug mga katingalahan,” tukma gayud nga sama sa Usa nga tinuod—Usa nga tinuod, “ug maga—magapahisalaag halos sa mga Pinili mismo.” Karon matikdi, kato mao si Jesus nga nagasulti.

²⁵⁷ Ania si Pablo, diha mismo sa Iyang luyo, ug miingon, “Karon, sa katapusan nga mga adlaw, magapanungha ang mga tawong relihiyoso, kita n’yo, nagabaton ug dagway sa pagkadiosnon. Ug magapamihag sa mga babayeng mahuyang, nga ginadaldal sa tanang nagkalain-laing matang sa mga kalibutanong pangibog.”

Ug nahibulong sila, nga nagaingon, “Nganong imo man ginaigo kanunay silang mga kababayen-an?” Oh, alang sa ikaayo . . . Dili gani nila makita Kini.

“Magapamihag sa mga mahuyang nga kababayen-an, nga nahimug-atan sa nagkalain-laing mga pangibog,” pahilayo gikan sa mga butang nga sama niana . . . sa . . . Kita n’yo, “Ug nga sama si Jannes ug Jambres . . .”

Mateo 24:24, “mini nga mga Cristo,” mini, nga dinihogan, nagapamuhat ug mga ilhanan ug mga katingalahan aron pagpahisalaag sa Pinili.

“Karon maingon nga si Jannes ug Jambres misupak kang Moises, maingon man usab kining mga sinalikway; sinalikway nga pagpanghunahuna mahitungod sa Pagtoo.” Dili nga “usa” ka pagtoo. “Ang Pagtoo!”

“Usa ka Pagtoo, usa ka Ginoo, usa ka bau . . .” Dili ka makabaton ug “usa ka Pagtoo” kon dili nagatoo sa “usa ka Ginoo.” Dili ka mahimong magkaadunay duha ka mga bautismo, ug dili ang usa alang sa Amahan, ug sa Anak, sa Espiritu Santo. “Usa ka bautismo,” Jesus Cristo. Husto kana. Kita n’yo, mini nga bautismo!

²⁵⁸ Matikdi, itandi silang tanan karon sa dihang nakapanguli na mo. Matikdi ang Mateo 24:24, si Jesus nga nagaingon; si Pablo, sa Ikaduhang Timoteo 3:8; daghan pang uban. Ug karon ipangtandi kana.

²⁵⁹ Ug unya ibutang ang usa pa ka Kasulatan, ang Lucas 17:30, ang Malaquias 4.

“Maingon nga Jannes ug si Jambres misupak kang Moises,” ang dinihogan nga Pulong sa maong takna, “maingon man usab kining mga tawhana,” dili usa ka tawo, “mga tawo,” mga dinihogan, “nagasupak sa Kamatuoran.”

²⁶⁰ “Sa maong adlaw gayud nga ang Anak sa tawo igapadayag na.” Pinadayag 10:1 ngadto sa 7, basaha kini sa dihang nakapanguli na mo, “ang Mensahe sa ikapitong manulonda, ang pag-abli sa mga Timri.” Unsa man kini? Dili ang manulonda mao ang Anak sa tawo; apan ang mensahero mao ang nagapadayag sa Anak sa tawo. Mahimo ba ninyong mabulag kini karon? Mao kana kon diin kini morag malisod kaayo alang kaninyo, nakita ninyo. Dili ang Anak sa tawo, Mismo; kondili ang ikapitong manulonda, ang ikapitong mensahero, maoy nagapadayag sa Anak sa Tawo ngadto sa mga katawhan, tungod kay Kini mihiya

na sa tipaka. Dili Niya Kini mahimong organisahon. Kini mao na ang Lugas, Mismo, usab.

“Ug nianang adlaw, si Jannes ug si Jambres magapakigbatok,” mga dinihogan (nagpakaa-aron ingnon nga mga magtotoo ug mga dili-magtotoo, ang iglesiang pormal ug mga Pentecostal) manindog batok sa matuod nga Lugas, “apan pasagdi sila; ang ilang binuang madayag ra, sama kanila kaniadto.” Kita n’yo? Nasabtan na ba ninyo karon? [Ang kongregasyon nagaingon, “Amen.”—Ed.]

²⁶¹ Ang Pinadayag 10, nag-ingon, “Sa mga adlaw sa pagtingog sa trumpeta sa ikapitong manulonda.” Karon hinumdomi, ang ikapito, ang Panahon sa Iglesia sa Laodicea. “Ang pagtingog sa trumpeta nianang maong manulonda,” sa dihang nahimo nang denominasyon kanang panahona sa iglesia ug nahimong usa ka panahon sa iglesia, sa dihang kini natapus na diha sa Pentecostal niining organisasyon; sa dihang ang mensahero diha niana . . .

Unsa man ang matag-usa ka mensahero? Unsa man kadtong si Martin Luther? Usa ka badlong sa Katoliko. Unsa man kadtong si Wesley? Usa ka badlong kanilang mga Lutheran. Unsa man kadtong Pentecostes? Usa ka badlong ngadtong uban pa kanila. Asa man mipaingon na ang maong Kinabuhi karon? Mipahilayo sa organisasyon. Wala nay tipaka; Kini na ang Lugas. Unsa man kini? Usa ka badlong sa Pentecostal, kita n’yo, aron sa pagtuman sa Kasulatan alang niining taknaa. Kita n’yo?

²⁶² Matikdi, sa mismong adlaw nga kining mensahero . . . Dili sa dihang nagasugod siya, kondili sa dihang nagasugod na siya sa pagpahayag sa iyang Mensahe. Kita n’yo? Ang Unang Pagbira, pagpag-ayo; Ikaduhang Pagbira, pagpanagna; Ikatulong Pagbira, ang pag-abli sa Pulong, ang mga tinago nga gikapadayag. Wala na, wala nay hataas pang han-ay sa pagpadayag sa Pulong, gawas sa mga profeta. Apan ang bugtong paagi nga ang profeta mapanghimatud-an maoy pinaagi sa Pulong. Ug, hinumdomi, ang Ikatulong Pagbira mao ang pag-abli kanilang Pito ka mga Timri, aron sa pagpadayag sa natago nga Kamatuoran nga sukad pa naselyohan diha sa Pulong. Nakita ba ninyo kini? [Ang kongregasyon nagaingon, “Amen.”—Ed.]

Kini sa maong higayona, nianang adlaw sa dihang kining butanga magakahitabo, nga si Jannes ug si Jambres, ang mga manunundog, manungha na pag-usab. Sama sa gihapon sa ilang gibuhay sa pagtungaha ni Moises nga uban ang orihinal nga Pulong, aron pagsulti Niini; sila nanungha aron sa pagsundog Niini. Husto gayud kaayo. Karon nakita ninyo kung unsa ang Mateo 24:24? Kita n’yo, mga dinihogan!

²⁶³ Karon adunay tutolo ka mga butang nga atong isulti sa dili pa nato tapuson. Mao kini. Gusto kong maminaw kamo pag-ayo karon sa dili pa nato tapuson. Tulo ka mga butang, hinumdomi,

tulo ka mga butang ang nangatuman na. Tulo ka mga butang ang gikaladlad sa inyong atubangan karon.

²⁶⁴ Una. Ang kalibutan ania na sa kahimtang sa Sodoma. Si Jesus nag-ingon nga kini mahitabo. Tan-awa ang kahiwian; ang atong mga kababayan-an nanagpaninguha paglihok nga sama sa mga lalake; ang atong kalalaken-an nanagsulay paglihok sama sa mga babaye, nagbinayot na; dubok, mahugaw, bastos, gipangyawaan, ug wala mahibalo niini. Ang Biblia nag-ingon nga mahitabo kana, ug diha kung asa na kini karon.

²⁶⁵ Ang Ikaduha. Kini anaa na nianang takna, sumala sa Kasulatan dinhi, nga si Jannes ug si Jambres nagapanungha. Sa ikaduha.

²⁶⁶ Ang Ikatulo. Anaa na kini diha sa mao rang takna nga ang Anak sa tawo igapadayag.

²⁶⁷ Anaa diha ang inyong magtotoo, ang inyong nagpakaaron-ingnon nga magtotoo, ug ang inyong dili-magtotoo. Anaa diha ang usa ka matuod nga Pulong nga padayon nagabarug, gipanghimatud-an; anaa diha ang nagpakaaron-ingnong magtotoo nga nagasundog Niini; ug anaa diha ang dili-magtotoo nga nagasalikway sa maong tibuok butang.

Apan maga-Kahayag sa mga takna sa kagabihon,

And dalan sa Himaya imo gayud mahikaplagan. (Husto ba kana?)

Mga nasud nanagkabulag, ang Israel nagakahigmata,

Ang mga ilhanan nga gitagna sa atong Biblia;

Ug naihap na ang mga adlaw sa Gentil (Sodoma), nga adunay kalisang nga midatog;

Pagbalik, O nangatibulaag, sa inyong kaugalingon.

Ang adlaw sa pagtubos haduol na,

Mga kasing-kasing sa tao nagakalusno, diha niining kahadlok;

Magpakapuno sa Espiritu sa Dios, ipangandam ug panghinloi ang inyong mga lamparahan, (aron inyong makita ang Pulong sa maong takna,)

Paghangad, ang inyong pagtubos haduol na!

Mga mini nga profeta nanagpamakak, (ilang gikaingon nga maania sila; mga dinihogan), kamatuoran sa Dios ilang ginapanghimakak,

Nga si Jesus ang Cristo mao ang atong Dios.

Mao kana, dili sila nagatoo Niini. Ang Biblia nag-ingon nga magakahitabo kanang butanga dinhi. Ania na kini!

Apan kita magalakaw diha sa gilakwan sa mga apostoles. (Mao ra nga Kahayag! “Ug pabalikon ang Pagtoo sa mga amahan ngadto sa mga anak.”)

Ang adlaw sa pagtubos haduol na, haduol na kaayo,

Mga kasingkasing sa tao nagakalusno tungod sa kahadluk, (ang kalibutan nagakahugno na);

O, magpakapuno sa Espiritu sa Dios, ipang-andam ug panghinloi ang inyong mga lamparahan.

Paghangad, ang inyong pagtubos haduol na.

Nagatoo ba kamo niana? [Ang kongregasyon nagaingon, “Amen.”—Ed.] Atong iduko ang atong mga ulo kung mao na.

²⁶⁸ Didto sa mga yuta diin kining maong Mensahe nagapaingon, gikan sa Sidlakan nga Kabaybayonan ngadto sa Kasadpan, gikan sa California ngadto sa New York, padulong ngadto sa Habagatan, pataas ngadto sa Amihanan, paggawas ngadto sa mga misyon, ug bisan hain Kini padulong, ug dinhi niining maong tabernakulo. Mga kabus kita. Walay ato niining mga bantugan, dinagkung, mabulokong mga butang, ug mga sibya sa telebisyon. Nagapaningkamot lang kita pagbuhat ug pinakamaayo nga kutob sa atong mahimo. “Apan ang tanan nga gikahatag Kanako sa Amahan mangari.”

²⁶⁹ Karon, buot ko nga inyong mahibaloan nga kini siniguro, ug kamo nga nagapaminaw niining teyp. Tingalig karong adlaway inyong nahunahunaan nga naningkamot ako sa pagsulti niana mahitungod sa akong kaugalingon, ingon nga ginadala ko kining Mensahe. Wala gayud ako Niini ni diyutay, wala gawas sa usa ra ka tingog. Ug, ang akong tingog, bisan pa sa akong pinakamaayong pangatarungan; gibuot kong mahimong mangangayam. Apan ang kabubut-on sa akong Amahan mao ang akong ginapahayag nga buhaton, ug nahukman nang buhaton.

Dili ako katong Usa nga mipakita didto sa suba; igo lamang ako nagtindog didto sa dihang Siya nagpakita. Dili ako ang maong Usa nga nagapamuhat niining mga butanga ug nagapanagna niining mga butanga nga nagakahitabo ingon kahingpit sa ilang pagkahitabo; Ako lang ang usa nga haduol sa dihang Iyang ginabuhat kini. Ako mao lang ang tingog nga Iyang gigamit, aron isulti Kini. Dili kini sa kung unsay akong nahibaloan; kini kung unsa lang ang akong gitugyan sa akong kaugalingon, nga Siya misulti pinaagi niini. Kini dili ako, kini dili ang ikapitong manulonda, oh, dili; kadto mao ang pagpadayag sa Anak sa tawo. Dili ang manulonda, ang iyang mensahe; kadto mao ang tinago nga gipadayag sa Dios. Dili kadto usa ka tawo; Dios kadto. Ang manulonda dili mao ang

Anak sa tawo; siya mao ang mensahero nga gikan sa Anak sa tawo. Ang Anak sa tawo mao si Cristo; Siya Mao kanang nagapakaon kaninyo. Wala kamo nagakaon diha sa tawo; ang tawo, ang iyang mga pulong mopakyas. Apan kamo ginapakaon diha nianang dili mapakyas nga Lawas nga Pulong sa Anak sa tawo.

²⁷⁰ Kung wala ka pa bug-os nakakaon diha sa matag Pulong, aron hatagan ang imong kaugalingon ug kusog sa paglupad ibabaw sa tanan niining mga denominasyon ug mga butang sa kalibutan, mahimo mo bang buhaton kini niining higayona, samtang nagaampo kita?

²⁷¹ Minahal nga Amahan, usa kini ka malisod nga butang. Dili sayon sa usa ka mortal ang pagbuhat niini. Nasayod Ka sa tanang mga butang. Ug nagaampo ako Kanimo, minahal nga Dios, nga dili kini masaypan sa pagsabot. Apan, diha sa Kahayag sa Imong Pulong, hinaut ang katawhan magalakaw.

²⁷² Ug, Amahang Dios, wala ako mahibalo kung kinsa ang Pinili; Ikaw ang nahibalo. Wala ako mahibalo kung kanus-a ang Imong Pagbalik. Apan nahibalo lang ako nga Ikaw nag-ingon nga kung kini nagakahitabo na, kining mga mini, nga mga dinihogan; dili na husto diha sa ilang pagsugod.

Gipasagdan lang sila ni Moises, tungod kay walay iyang mahimo bahin niini. Igo lang niya isulti kung unsay Imong ginaingon. Imo siyang gisultihan pagtawag ug mga pulgas; dayon sila nanagtawag kanila. Imo siyang gisultihan nga himoong dugo ang tubig; unya ilang gibuhat kini. Si Moises igo lamang nagtuman, Pulong sa Pulong, sumala sa Imong giingon, apan pagkahuman Ikaw mao ang Bugtong Kinsay nagpadayag sa maong binuang.

²⁷³ Karon, Amahan, Ikaw mao ang Dios, bisan pa. Ang mao ra nga Pulong nga nag-ingon nga kini mahitabo sa katapusan nga mga adlaw. Daghang matinud-anon nga tawo, sama sa atong gikasulti sa miaging Dominggo, nanangbutang sa ilang kamut diha niadtong Kaban sa usa ka bag-ong caromata, ug dili sa mga abaga sa mga Levita, nangatumbang nangamatay, “patay sa sala ug mga kalapasan,” nagapakiglantugi batok sa ilang kaugalingong mga konsensya.

²⁷⁴ Daghan mga ministro ang nagalingkod diha sa iyang pagtoon, nabasa nianang Pulonga, ug sa kalit ginabalhin ang panid; aron paglikay sa pagpamadlong, sa paghibalo nga mawala kaniya ang iyang kabutang pangkatilingban sa publiko, sa iyang simbahan ug sa iyang denominasyon. Dios tabangi kami nga dili gayud buhaton kana!

²⁷⁵ Hinlo-i ang among kasingkasing, Ginoo, gikan sa tanang kahugawan sa kalibutan. Ginoo, nagabarug ako nga andam na alang sa paghinlo. Nagabarug ako nga andam na, uban niining iglesia ug uban sa tanan nga nagapaminaw niini, ug si kinsa

man nga magapatalinghug niining teyp. Nagabarug ako, Ginoo, ug nagapangayo alang sa paghinlo. Ginoo, dad-a ako ngadto sa balay sa magkokolon ug dugmoka ako, umula ako nga usa ka alagad sumala sa Imong gusto.

Kay, Ginoong Jesus, “Ako usa ka tawo nga mahugaw ug mga ngabil,” sama sa gituaw ni Isaias, “nagapuyo taliwala sa katawhan nga mahugaw ug mga ngabil; ug alaut ako, tungod kay akong nakita ang pinadayag sa Dios nga gikapahayag,” maingon sa nakita ni Isaias ang mga Manulonda diha sa Templo. Nakita ko ang katapusan nga panahon, Ginoo, ug alaut ako ug ang akong panimalay; alaut ako ug ang akong katawhan. O Walay Katapusan nga Dios, kaloy-i kami. Ako nagapakilooy alang sa akong kaugalingon ug sa katawhan. Ayaw itugot nga mangalaglag kami uban niadtong mga wala nagatoo, apan hinaut nga kami mangabuhi uban sa mga magtotoo.

²⁷⁶ Ang matag denominasyon, Ginoo, matag lalake ug babaye. . . Dili ako makapangayo Kanimo nga panalanginan ang usa ka denominasyon, sa dihang ako nahibalo ako nga supak Ikaw niini. Apan makaingon lamang ako, Ginoo, kung Ikaw aduna may Imong carnero gikan sa taliwala kanila, hinaut nga makadungog sila niining teyp. Hinaut nga ilang hidunggan Kini, Ginoo, ug hisabtan Kini uban sa pagsabot nga Imong ihatag kanila, ug hinaut nga sila manggawas ug dawaton Ka. Hinaut nga sila dili malimbongan pinaagi sa pagkabuta ug sa tradisyon niining panahona. Hinaut nga dili sila mosulay pagkaon ug butang nga. . . o patay’ng lawas sa miagi pang panahon. Hinaut nga ilang dawaton ang Pulong.

Mao kana ang paagi nga ang mga Fariseo nanaglansang Kanimo, Ginoo. Sila nanagpangaon sa patay’ng lawas sa panahon pa ni Moises, ug misulay sa pagpasigarbo pa niini; human nga gikahatag na Nimo ang tipo, sa kamingawan, bahin sa lab-as nga manna matag gabii, nagakahulogan nga sa matag-kaliwatan. Mao kana diin sila nangapakyas. Kini nagpahilo kanila. Kini ang nagpatay kanila, sa pagkaon niadtong mahugaw nga pagkaon.

Ug, sa espirituhanon, ginahimo kini ang mao sa gihapong butang karon; ginapatay sila, sa espirituhanon, sa usa ka denominasyon.

Tabangi kami, minahal nga Dios. Anaa na kining tanan sa Imong mga kamut karon. Sa Ngalan ni Jesus Cristo.

²⁷⁷ Uban sa pagduko sa atong mga ulo, atong awiton kana samtag nagahimo kamo sa inyong desisyon. Kamo ba magapadayon hangtud sa katapusan?

I can hear my Sav-... (ug Siya mao ang Pulong) . . . -ior calling, I can hear . . .

“Oh, ako naglatagaw sa hataas nga panahon, apan, sa tinud-anay, karon mismo ako Siyang madungog, ‘Umari kamo Kanako,

tanan kamong padayong nagapangapakap.’ Patalinghugi, ‘dad-a ang imong krus, pagsunod Kanako sa matag-adlaw.’ ‘Oo, bisan magalakaw ako latas sa walog sa landong sa kamatayon, dili ako mahadlok sa bisan unsa nga dautan; didto sa mga malandong ug lunhaw nga mga sibsibanan, ug diha sa mga tubig nga malinaw.’”

And where He leads me I . . .

“Ginoo, nakita ko kanang trinitaryan nga binuang. Nakita ko ang tibuok kalibutan nga gipugasan niini; ang mga sagbot nagapanurok sa bisan diin. Apan kung hain Mo man ako pagagiyahan karon, Ginoo, mamahimo akong sama niadtong anaa sa Mga Buhat 19. ‘Sa ilang pagkadungog Niini, sila gipangbautismohan pag-usab sa Ngalan ni Jesus Cristo.’”

. . . follow, (“Ako nahiadto na sa bahin sa dalan,
Ginoo, igo na aron pagdawat Kanimo.”)
Now I’ll go with Him all the way.

[Si Igsoong Branham nagasugod sa paghugong *Where He Leads Me*—Ed.]

²⁷⁸ Minahal nga Dios, ako nagasalig nga kana nagagikan sa akong kasingkasing. Nagasalig ako nga kini nagagikan sa kasing-kasing sa matag-usa nga nagaawit niining orasa, tingali sa daghan nga magapaminaw niining teyp, nga wala dinhi karon ug wala nagapaminaw niini karon. Hinaut nga kami matinguhaon, Ginoo, bisan pa kung unsa ang bili. Giingon, “Sama sa usa ka tawo nga makigtambo sa lain pang sundalo, usa ka sundalo, usa ka hari; una siya nagalingkod ug nagakuwenta, kon mahimo kaha niya pagbuhat niini, mabiyaan kaha niya ang mga butang sa kalibutan? Makahimo ka ba sa pagbiya, moipon sa mga sundalo sa Pulong nga sinulat sa Dios; magamartsa uban sa Iyang mga sundalo, magalupad kauban sa Iyang mga agila?” Itugot kini, Ginoo, sa Ngalan ni Jesus.

²⁷⁹ Nagatoo ba kamo? Ginadawat ba ninyo Siya? Maayo. Makigkita kami kaninyo dinhi pag-usab, karong gabii, kung itugot sa Ginoo. Nagatoo ba kamo niana nga mao ang Kamatuoran? [Ang kongregasyon nagaingon, “Amen.”—Ed.] Igo na ba ang katin-aw niini? [“Amen.”]

Then take the Name of Jesus with you,
Child of sorrow and of woe;
It will joy and comfort give you,
Take it every- . . .

Karon, pagpakiglamano sa inyong mga katapad karon.

Precious Name, O how sweet!
Hope of earth, the hope of earth, joy of Heaven;
Precious Name, O how sweet!
Hope of earth and joy of Heaven.

At the Name of Jesus bowing,
 Falling prostrate at His feet,
 King of kings in Heaven we'll crown . . . (Siyay
 Dios, kung in-ana)
 When our journey is complete.
 Precious Name, precious Name, O how sweet!
 O how sweet!
 Hope of earth and joy of Heaven;
 Precious Name, O how sweet!
 Hope of earth and joy of Heaven.

²⁸⁰ Siguro ang tanang mga ministro nailhan na niining buntaga, gipangpaila na.

Sa dihang ang usa ka tawo nag-ampo tibuok semana, nahibulong kung unsa, nga nakita kining mga Kasulatan, silang napahimutang mismo diha sa inyong atubangan. “Ug alaut ako,” miingon si Pablo, “kondili ko ginawali ang Maayong Balita.” Sa kinatumyan sa iyang dalan, siya miingon, “Wala ko man gililong kaninyo ang pagpahayag sa tibuok Katuyoan sa Dios maingon nga Kini gikahatag kanako.”

²⁸¹ Usahay malimot ako sa pag-ila sa mga butang, pagtanyag, paghalad sa mga bata.

Si Billy miingon, sa miaging adlaw, usa ka tawo miduol, miingon, “Kanunay na ako nagaanhi dinhi sulod sa duha na ka tuig, sa pagpahalad sa akong bata.”

Si Billy miingon, “Ayaw’g pagkasubo niana. Aduna koy bata, usa na ka tuig; siya wala pa gayud mahalad, wala pa. Ngani hulaton ko na lang hangtud nga siya igo na modaku sa paglakaw didto sa kaugalingon niya mismo, siguro.”

²⁸² Busa atong makita igsoong lalake, igsoong babaye, dili kini—dili kini, kita n’yo, akong . . . Ang usa ka butang, nga kinahanglan atong ihalad ang atong mga anak.

Ato kinahanglan mabautismohan ang matag usa. Adunay bautismohan; aniyay tubig. Kung ugaling wala ka pa, unsa man ang nakapugong kanimo? Aniyay tubig. Pagduol dayon karon. Ayaw paghulat hangtud unyang gabii; ari na dayon. Aniyay tawo nagatindog dinhi nga magabautismo si bisan kinsa nga naghinulsol na ug nakapahayag na. Kon ikaw nabautismohan man sa napulog duha na ka higayon, sila magabautismo kaninyo sa Ngalan ni Jesus Cristo alang sa kapasayloan sa sala. Kita n’yo? Mao kita kana.

²⁸³ Apan, kita n’yo, ang Mensahe anaa sa akong kasingkasing. Kinahanglan ko Kining ipahigawas. Mao kana ang usa ra nga katuyoan ko, bisan kung unsa pa ang ikaingon sa akong asawa, ikaingon sa akong anak, ikaingon sa akong pastor, sa akong bisan kinsa man. Kini mao ang akong Ginoo. Kinahanglan akong ipahigawas Kana. Mao kana ang bugtong kong katuyoan.

²⁸⁴ Ug karon, sa kadaghan nang higayon, ako nahikalimot sa pagpaila sa mga ministro. Siguro tingalig . . . ang atong igsoon, si Igsoong Neville, usa ka bililhong tawo. Kining uban pang mga kaigsoonan dinhi, nalipay kami nga ania kamo uban kanamo.

²⁸⁵ Dili nga kay kami wala miuyon kaninyo, igsoon, aron malahi. Daghan kaninyo dinhi tingalig trinitaryan nga mga magwawali. Dili kami buot nga masuko kaninyo. Nahigugma kami kaninyo. Kung kami dili pa, kung dili man ako nagtoo niana, dili gayud ako mobiya niining simbahan hangtud nga nakaluhod na ako didto ug nakaingon, “Dios, tul-ira ako.”

Dili ko gusto kanang mapahitas-on, espiritung dalo nga misagul kanako. Gusto ko nga ang akong espiritu mahimong putli ug hinlo, may gugmang inigsoon, balaan pinaagi sa Espiritu Santo. Karon, kung aduna may usa nga nagabuhat ug dili maayong butang kanako, sige lang. Ug bisan pa kon aduna koy katungod sa pagbalus kanila, dili ko gusto kana sa akong kinabuhi. Dili, ako—gusto kong adunay gugma. Gusto kong mahimong andam pagpangtul-id nga may gugma, uban sa gugma nga sa bug-os nagatubag unya didto alang niini.

²⁸⁶ Wala ko kini ginatuyo aron magpakalahi. Methodist, Baptist, Katoliko, Presbyterian, bisan kung kinsa ka pa, wala ko ginasulti kining mga butanga aron malahi, nga mapahitas-on diha kaninyo. Kung nabuhat ko man, ako usa ka maut ug dapat nga ania ubos niining altar, padayong nagaampo diha sa Dios.

Apan kini ginasulti ko, tungod sa gugma, ug akong nakita kung hain na kamo padulong. Karon, wala ko kini ginasulti sa akong kaugalingon, ug ginaingon nga ako nagapanaghap. Ang ginahatag ko kaninyo MAO KINI ANG GINAINGON SA GINOO. Kana mao ang Kamatuoran. Ug gihigugma ko kamo alang nianang mga butanga. Ang Dios magapanalangin kaninyo.

²⁸⁷ Karon samtang atong awiton ang usa pa ka bahin niining awit, atong, sa dili pa kita manglakaw. Gusto namong maania kamo karong gabii, kung inyong mahimo. Kung dili ninyo mahimo, ang Dios magauban kaninyo hangtud nga magkita kita. Mag-ampo lang kita nga ang Dios maga—magapanalangin kaninyo ug magahatag kaninyo sa pinakamaayo sa Iyang yuta, kita n’yo.

Take the Name of . . .



ANG MGA DINIHOGAN SA KATAPUSAN NGA PANAHO CEB65-0725M
(The Anointed Ones At The End Time)

Kining Mensahe ni Igsoong William Marrion Branham, una giwali sa Ingles niadtong Domingo sa buntag, Hulyo 25, 1965, sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2009 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org